

柳溪詩徵

嘉善周

斌志頤輯

上海中華書局印行


國民政府內政部註冊二十六年五月十七日執照警字第八六八三號

民國二十五年十二月發行 柳溪時微 (全一冊)

民國二十六年六月再版

上海實售中儲券七十一元六角

(郵運雜費另加)



編者 嘉善周斌

校閱者 吳江柳亞子

發行者 中華書局有限公司
代表人 路錫三

印刷者 上海中華書局印刷所

總發行處 上海福州路 中華書局發行所

分發行處 各埠 中華書局

柳序

亡友嘉善周君志頤既沒後二年介弟志成出其遺纂柳溪詩徵六卷將付手民索余一言按柳溪今名陶莊屬浙江嘉善縣地瀕分湖之南志頤世居斯土曩有柳溪竹枝詞正續百五十首行世敬恭桑梓網羅文獻吾無間言詩徵之輯猶此意也余祖籍江蘇吳江縣北庫區之大勝村在分湖東北隅先高祖古楨府君且有分湖小識勝溪竹枝詞諸遺著暨余稍長徙居同邑之黎里去湖稍遠然竊慕劉季歌風每謂千秋萬歲後魂魄當猶眷戀斯湖焉蓋分湖爲吳越間巨浸汪洋數十里南屬嘉善北屬吳江浩淼烟波頗鍾靈秀故能誕育鉅人長德劍客酒徒咸郁郁彬彬無慚作者之倫余曩時鄉居無俚擬輯分湖詩徵暨分湖金忠旣屬陶莊於志頤遂以西塘屬嘉善蔡文鏞周莊屬青浦王德鍾蘆墟莘塔黎里僉澤分屬同邑沈昌眉凌景堅顧无咎陸明桓北庫則屬諸族兄鳴鴻造端宏大有志未成十年以還世變益亟去鄉益遠駸至赭衣塞路羣盜滿湖曩者歌呼文酒之場淪爲嘯聚萑苻之窟余偃蹇春申未知死所遑問歸期而同好諸子自蔡凌以外已盡爲異物讀向子期思舊之賦有不激昂慷慨涕下沾襟者哉猶幸志頤斯集之先成而介弟復能傳播之也雖在流離

顛沛之中不可以無詞酒酣耳熱天地蒼茫擲筆狂吟舉杯遙奠志願志願尙能盡此一觴
否耶中華民國二十四年乙亥三月二十一日吳江柳亞子敘於海上虜樓

沈序

詩之爲教上通乎道德而下達乎人情自孔子刪詩以傳國風楚屈平作離騷其後詩人亦往往三致意於時政之得失民族之隱微詠歎所及時足補傳志之闕疑而工部一集世宜以詩史稱之其亦文獻淵藪也哉顧詩之傳世必賴人力爲之先矧草野巖穴之士閤修寂處生而名不出里巷其身後之遺什不久亦必澌滅以盡耳是以後之君子慨然有詩徵之輯昔孔子言夏殷之禮深慨於杞宋文獻之無徵詩徵者由文以及獻因獻以存文其事則文也而導源於史固不僅總源流之變窺治亂之音而已從事於斯者要在能貫古今而徹遠近原始要終以類相繫始爲無乖於體要大抵徵郡國之詩常忽於僻遠其失在不徧故詩徵之作最宜以一鄉一邑爲之範取其約而能徧也且夫人之有其鄉猶有其家生乎百世之下上溯其鄉里之先賢誦其詩想見其爲人其嚮往篤慕之情亦若後裔之視其列祖不尤親切而有徵乎余見世之輯詩徵者多矣其純駁亦互見蓋非深於詩者要不能無譏我邑周芷畦先生斌今日深於詩者也又多識於鄉里之往事居分湖之濱曰柳溪旣老不得志乃博採其鄉先賢之遺詩成柳溪詩徵若干卷去年冬以疾卒於家越二月其弟志成

星使出稿本以授袁弘深先生謀付剞劂因問序於余余受而讀之上起宋元下迄晚近蓋向之所殘脫而無考者今皆萃於茲編矣柳溪在縣西北三十六里宋紹興中保義郎陶文幹居此故亦稱陶莊其地雖蕞爾小市而煙水清淑之氣沾溉人物代有作者芷畦襲清芬之餘緒奮其才力出則與當世賢士大夫遊入則以斯文爲鄉里倡隱然自居於後勁卽其鄉里亦爭奉爲壇坫矣今於其鄉先賢之遺著闡揚發微鄭重而手訂之固應有事哉余識芷畦垂二十年而相見之日少近三年來且未嘗獲一面孰謂今遂序其遺稿耶悲夫芷畦狀貌奇偉有才略自小卽以詩名遠近然終落落無所遇嗜古玩金石破銅爛鐵靡不蓄拙於書每與人見輒急索紙墨書示其近作走筆特絕非習見其書者多不可猝解云嘗一遊雁宕兩遊舊京著雁宕遊草及燕遊草行世其他未刊詩尙多此稿則成於燕遊歸後者余悲芷畦之才逡巡濁世卒坎壈終其身所成就者僅乃見之於一鄉之文獻然吾知其無悶也甲戌二月斜塘沈德鏞序

自序

詩徵之作不能綜歷代括郡國而僅僅限於一鄉抑陋矣雖然國風起於里巷十室必有忠信柳溪自風開陶塾題王孫之畫圖和鐵崖之遊什名流所萃淳風斯扇泊乎竹林遷居四子繼起子重杞山抒其忠憤鈞鼇文璐發以喬皇兩行震耀中外實上承一螺之遺下振抱膝之緒而東齋司寇亦皆名噪一時奮其藻采此宋元以迄有明之一盛也鼎革之際已哇隨侍於積翠山夫偕隱於蔣湖乃至瓢粟逃禪竹垞避亂僻壤窮鄉寢成詩藪水村倔起遂抗手與諸鴻博爭衡是以當日投贈之篇不脛而走寰宇此又清初之一盛也顧兵燹屢經市井未集雍乾之際文人多散於村居而東柯楊三輩卒能不墜宗風以俟後勁自瘦客振響酬和靈芬香湄父子資其輸漑丙唐繼之頤安繼之竹厂李仙又繼之時則趙田之諸袁絳田之諸吳虹殿之諸丁各守一隅流爲馨逸而青箱守研課花復鼎峙爭鳴蜚聲壇坫此又嘉道時之一盛也同光雖寢衰矣然次遊寓後濂溪疊掌文衡園馳名瀛島講易師竹亦拔幟而自成一隊流風不替有足多者他若竹居茅屋之題愁言焚餘之稿方外閨秀代起有人亦可謂彬彬乎備已脫無人焉爲之蒐討成編將何以存文獻識風土乎予自壬子

家居竊不自量慨然有志於是則就見聞所及參稽載籍徵訪友朋歷六年之久晨鈔露寫得詩若干首都如干人仿攜李詩繫魏塘詩陳例釐成如干卷名之曰柳溪詩徵其間雖有以年湮代遠志乘不詳不無遺漏之憾然得是而存之使杞宋有徵詩亡可補或亦足以備異日輶軒之採云庚申正月柳溪周斌自序

題詞

吳縣 葉楚倫

好事當年若喚咻故人如夢見山丘華燈鑿酒江樓夜刺艇尋圖水閣秋天地風波今盪決
史書評斷孰綢繆一言題外憐難寄我亦衰頹苦未休

吳江 柳亞子

南冠幾輩楚人咻狐死還憐枕首丘猶見淳龐秦父老忍輕斷爛晉陽秋風波早信年時惡
文獻終期桑土繆倫以一觴奠漁俠青山青史我休休志願自署
份南漁俠

嘉善 李康佛

投老汾南意惘然當門柳色爲誰妍一鄉文物閒徵徧扇起淳風六百年
六載多君寫稿成不教埋骨負平生如今四海倉皇日下筆難爲鄉土情

齊天樂

嘉善 余十眉

偶園已廢心香燼偶園爲吾邑金安清先生藏書處今已荒廢又鄉先輩郝彝齋搜羅鄉邦文獻著有平川詩徵後因心香閣不戒於火付之一炬 鄉社
祕儲星散謝蝶灰揚崔鴛夢杳一例飄零無算春回雪案料駭客英靈未應枯爛薇露輕研

研箋乍擘綠牕展 流光消盡古翰東
風難繪影 驂鸞人遠酒袂塵汗墨痕
淚洗溪上柳花飛滿斜煙亂水付一笛
黃昏誰家池館寄語漁娃月明休唱晚

芷畦有柳溪竹枝詞行世

前調

吳江 柳亞子

天魔舞冷湖波綠 金粟珠簾都散氣
節楊袁文章錢魏彈指枯棋劫算逃禪
公案嘆駱丞魂 枯萋弘碧爛一角漚盟
鐵函心史從頭展 韶年鼎鼎詩翰有
草堂瘦沈風流未遠游子輕 寒女郎薄
病襟上淚痕休滿汾南烟水奈弔古傷
今黃墟謝館垂老英雄江山愁晚晚

柳溪詩徵目錄

卷一

陶大甄一首

陳垚道三首

錢以道一首

陳綱一首

陳緝十二首

楊任一首

陸琦三首

朱愚十四首

沈堯中四首

朱國望一首

錢重鼎三首

錢資深一首

陳約三首

陳繹一首

陶振十二首

袁順一首

袁仁十四首

袁黃二十七首

袁儼十七首

卷二

魏 坤 十三首

許 湄 一首

孫 炆 三首

魏錫琦 一首

蔣向皋 一首

許王猷 一首

孫銀槎 二首

孫銘彝 十首

孫鉅文 一首

袁紹銑 六首

袁 璉 二首

蘇國柱 一首

袁 璿 一首

魏正鎧 一首

魏正錡 十一首

袁玉溪 一首

顧功枚 十一首

袁霖周 四首

吳元音 十首

袁寶秋 十三首

吳元麟 四首

吳元驥 一首

沈文江 六首

沈晉階 二首

丁邁祖 四首

丁子復 一首

卷三

沈丹培 一十四首

朱丹墀 一首

朱華時 首

袁 青 十二首

袁 蘇 首

袁 營 四首

張尙白 十六首

金以煥 六首

袁 鴻 一首

盧國型 十一首

袁愛棠 九首

袁蔭槐 五首

沈汝枚 五首

沈汝棠 七首

丁應谷 一首

錢 壘 二首

袁雲楣 五首

吳廷璜 五首

吳廷珪 一首

吳錫金 二首

袁昌齡 五首

袁嵩齡 六首

薛 淮 一首

袁召齡 二首

袁熙齡 三首

卷四

袁青照 十八首

沈士鐸 五首

沈士銘 六首

金 堂 四首

潘湘泉 一首

潘湘波 一首

錢慶熙 二首

袁尙瑩 一首

邵錫辰 十二首

周 詩 一首

周 禮 六首

鄭 塘 五首

袁 楨 三首

朱 璉 二首

潘乃昌 二首

張維鏞 七首

袁福燾 二首

俞 江 二首

曹駿良 十二首

袁汝錫 七首

周文炳 三首

周文俊 六首

沈汝雄 一首

沈汝豪 二首

丁清藩 二首

朱耀祖 七首

袁祖延 一首

周啓賢 一首

周啓揆 五首

許馥銓 十首

蘇明善 六首

蘇明新 四首

秦炳漢 三首

蘇君璋 七首

秦炳奎 二首

卷五 (僑廬)

楊維楨 五首

錢士升 六首

魏大中 十六首

徐石麟 二首

陳子龍 六首

張采 一首

艾丹生 八首

艾訥 一首

朱彝尊 十七首

葉 燮 五首

周 杭 一首

沈大成 十八首

王炳裕 三首

查奕照 五首

丁大椿 六首

汪如藩 三首

顧文治 二首

張聘齡 四首

秦光第 七首

孫爾榛 一首

孫錢泰 七首

李斐然 十首

謝昌年 二十四首

謝昌言 六首

謝咸慶 二首

陸擁書 六首

陳 楸 二首

董書紳 三首

計寶璜 四首

王文溶 五首

卷六 (閨秀 方外)

葉紈紈 十四首

吳 黃 四首

陸觀蓮 六首

魏于雲 九首

汪琬玉 四首

孫清瑜 五首

靈具 一首

天寥 十首

志南 三首

戈默 五首

沈氏 一首

浦潔芳 二首

寂勛 四首

實定 一首

雪舫 一首

柳溪詩徵卷一

嘉善周 斌志頤輯

陶大甄字仲才宋嘉定四年進士官安慶教授

按柳溪俗稱陶莊山陶文幹遷居得名後大章大猷大甄夢得累登科甲詩則年遠無徵偶閱明人宋詩選有陶仲才寄婁參政一詩後稽他籍知仲才乃大甄字也亟錄之

寄婁參政

西子湖頭別夢頻。緋桃翠柳幾經春。自還鄉里安絃誦。敢羨朝堂正笏紳。有水有山靈秀地。可耕可釣太平民。一書遠報婁夫子。我已煙波作散人。

錢重鼎字德鈞宋末以詩經發解初爲通州人入元後遷居分湖之涯趙子昂

爲繪水邨圖

按橋李詩繫謂水邨在分湖之涯吳山縣志未載浙江省志嘉興府志嘉善縣志均詳絃之疑當時未分疆界析縣後始歸於嘉善歟姑錄之以俟再考

題趙鷗波臥雪圖

在昔洛陽雪深丈餘士也高臥來令尹車。今年吳淞雪復何如積素一色鷗鷺有無之子江

臯修亭是居有琴有書有酒有魚賞靜獨眺聊以自娛挹茲清風凜凜起予此景此圖再卷再舒

水邨隱居歌

舟搖搖兮風嫋嫋兮波鱗鱗兮鷗翩翩兮扣舷漁歌兮孰知其他兮。

題靜春堂集

閉戶雪臥遠詠史風情留有詩三百篇令子手所哀汝翁秀儒林殖學媿前修六經窮窈奧萬象工雕鏤廣矣雅音正悕矣騷情幽照耀明珠珍重珊瑚鈎一讀令人喜再讀令人愁李杜骨已朽江河名同流憶昔託末契東城得追游平時少契闊暇日多唱酬櫟材自揣劣藻思誰與儔老我歲冉冉霜髻風颼颼索居破茅屋寒擁敵貂裘夜來清夢飛故鏡松江頭夢中不識路修亭渺悠悠粲然見梅花二月香影浮性情閱千古感發卒未休神交付冥冥知我雙白鷗

陳垚道字宗遠自號竹林處士元末由嘉興徙此遂家焉有竹林集

按分湖志垚道由嘉興徙此嘉府典故續編垚道居陶莊構李詩繫竹林處士嘉興人復有陳布政約嘉興陶莊人元儒竹林先生長子則柳溪自先生徙居無疑月泉吟社

所載義烏人陳垚道氏系不符或另有其人邑志載垚
道由義烏徙此者誤也今考其遺址似在大陶圩市浜

松瓢齋爲王好問賦

身外纘微皆長物。一瓢飲足寄蒼虬。壺中日月懸林表。天下瓢瓜下澗幽。器大從來成淺落。時危那復事沉浮。只憂尙渴陶唐化。未放先生學許由。

挽邁里古志

小范胸中有甲兵。檀公身後壞長城。大星墜地中軍愴。白馬憑潮霸主傾。碧血不隨金石化。丹心長貫斗牛明。會稽高與浯溪並。誰與磨厓刻姓名。

春日田園雜興

化日邨田樂。春風耕織圖。秧肥蝌蚪動。桑暗鶉鳩呼。罷社翁分胙。占蠶媪得符。傍花隨柳處。此事不關吾。

錢資深字原父重鼎子

題趙榮祿水邨圖

屋後青山門外溪。疏疏蘆葦護漁磯。地緣清絕人堪愛。長是三春雁不歸。

錢以道重鼎姪

延祐四年將會試於京師見家叔圖後水邨隱居記謹賦小詩

簾捲蒼茫野色。屋連演迤清流。歲晚晚兮自適。蹇誰留兮中洲。

陳 約字博文。垚道長子。明洪武初以求賢至京。授大理卿。終山西布政有

一默居士集

種竹所

種竹承母命。母沒不敢違。種竹蕃且殖。子心如母時。憶昔種竹初。一人當一枝。全活至千百。厚德天所知。鮮碧淡煙雨。空青映軒墀。亭亭冰雪容。森森歲寒姿。別來四五載。竹茂青雲齊。所植既蕃衍。所活恆倍蓰。維舟武川上。望見青猗猗。主人許逕造。操觚來賦詩。

錦屏

赤城多奇山。錦屏亦殊勝。不知是何仙。遺跡在幽境。松霏灑石牀。竹雪墮風磴。徘徊對巖花。考槃樂笙磬。

偶成

京華二月天氣好。寒食已過清明來。畫樓珠箔燕新語。綠樹清江花亂開。

陳 綱字簡文號歸耕約弟

題畫

五湖煙水綠生波。一葉扁舟鼓柁歌。愁殺故園戎馬後。千章喬木已無多。

陳 繹字思文別號如醉道人綱弟仕嵩明州判官

桃根接梅

未見東風着小桃。先看蓓蕾綻紅椒。種從王母來時度。魂向羅浮夢裏招。妙奪天香回造化。巧將雪色補嬌嬈。一聲鐵笛春歸也。回首秦源道路遙。

陳 緝字熙文號觀白繹弟有觀白居易集

和大兄十四夜月

桂老金爲粟。蟾孤玉作團。明朝應更好。此夜不勝寒。弟妹他鄉共。關山幾處看。南飛有烏雀。未得一枝安。

次吳景長秋興韻

十年朋舊總凋零。喪亂無書問死生。深院銀燈挑錦字。小樓明月理瑤笙。霜寒菊逕思元亮。秋老瓜田憶邵平。悵望東南淚如雨。夜深腸斷楚歌聲。

秋夜懷明本

溪聲浙瀝起蒹葭。溪水潺潺漱白沙。大地星流還化石。小窗燈冷不成花。江淮烽火三千里。城郭人民八九家。避地欲尋張博望。月明滄海泛靈槎。

海上述事三首

浮生南北任流萍。漫刺江湖憶彌衡。雁去關山秋萬里。潮來江海月三更。燐光夜伴蛩螿急。妖氣晴連蠮螋橫。欲向靈氛問人事。中原何日可休兵。
野逕荒荒日欲晡。林棲水宿遞相呼。汀洲霜冷蒹葭老。山路秋高首蓓枯。屈子壯心能忘楚。武侯遺恨在吞吳。便從海島尋蓬島。先向鴛湖下鷓湖。
憶昔扁舟過洞庭。長懷七十二峯青。三年跣弛吳中客。十載漂零水上萍。作賦便思招海賈。移文無復愧山靈。碧山寥落秋如洗。願借仙家白鳳翎。

春波漁傲爲王原魯賦

猩袍自脫換羊裘。鼓枻長歌上釣舟。山澤有人能去漢。熊羆無夢可興周。綠波芳草西湖上。細雨斜風古渡頭。不是忘君與忘世。盛時原自有巢由。

送周煥文從唐伯剛之吳興

碧瀾堂下卽吳興。十里芙蓉繞石城。山簡歸時應倒載。侯醉後尙談兵。蘋洲雨過秋聞雁。橘里春深曉候耕。事簡好將樵唱曲。水晶宮裏坐吹笙。

春日

湖頭誰復載吳娃。鷗鳥多情戀白沙。涪萬春深無杜宇。武陵何處有桃花。雨餘石燕晴歸穴。市近山蜂午報衙。看到前朝丞相墓。野人翻土種桑麻。

禁煙日懷大兄

留春無計願春遲。花落空山有子規。翡翠樓香來杜若。牽牛引蔓上棠梨。文園多病猶爲客。杜老應門亦有兒。田野寒煙不須禁。罷民無食已多時。

弔古

投筆渡江江水空。朝馳淮海暮吳中。江東壯士輕王猛。吳下諸公失呂蒙。山鬼有靈啼夜月。

野花無主怨東風盡將骸骨填溝壑誰在雲臺第一功

竹枝詞

贈君曾出雙南金別君曾彈紫綺琴。斷金還比阿奴意。斷弦還比阿郎心。

陶 振字子昌號釣鼈生晚號潯陽口叟洪武庚午舉明經授吳江訓導改安

化教諭有釣鼈清嘯等集

按分湖志湖隱外史皆稱振吳江人而樞李詩繫云振陶莊人為吳江教諭隱於九峯一夕死於虎王善達輓以詩曰昔為海上釣鼈客今作山中飼虎人曝書亭集跋釣鼈集謂陶莊西數里即是吳江陶神童墓即振無疑陶神童墓在大火圩陶家池上姑據此錄入容俟再考柳亞子云沈剛中分湖志陶神童墓在圓妙山旁為陶氏盛時瘍子明代孫詢有陶神童墓詩云神童墓上艸茫茫舟泊陶溪訪舊莊記井尙聞當日鮑探環深想昔時羊侍賓禮讓何須教過眼詩書不再忘天道何為先短折一丘黃土蓋文章其非釣鼈甚明竹培附會而志願復踵其說皆謬也校勘至此亟誌之以正亡友之誤庶自附於直諒歟

哀吳王汝歌

哀吳王汝非他人姓系本卯金刀高祖封汝沛五十三城濠冀汝犬牙相制磐石牢汝胡招致亡命卽山鑄錢海水私自熬下收民心蠲賦徭睥睨劉家社稷使動搖汝之初有反相高祖臨遣汝訓戒嘗昭昭汝後以子故失藩臣禮文帝不加戮賜汝几杖老不朝汝之末兵起

馳書六國、膠東、膠西並受招、連山大澤羅旌旄、景帝又殺諫臣、錯謝六國、復汝元惡而頭不
汝鼻、汝胡殺使者、不奉詔、氣益驕、嗚呼吳王、汝獨不聞前時烹韓盧、醢彭越、翦伐九江、王布
如蓬蒿、胡乃視死輕鴻毛、漢家條侯將中豪、奏揚天兵誅汝曹、剗汝腸、喋汝血、擣汝穴、破汝
巢、汝子授首、汝母將安逃、致令六國灰飛而煙消、嗚呼哀吳王、汝之罪、何滔滔、千古竹帛猶
腥臊、

送張彥德遊錢塘

錢塘之地何雄哉、秀壓玄圃越蓬萊、大江如龍天際起、山從佛國西飛來、雲間三百六十寺、
含丹凝紫開樓臺、湧金門前浪花白、好峯兩點青如苔、宋朝文物已草莽、荒碑遺碣高崔巍、
黃龍白虎消王氣、金鳧玉雁飛寒灰、鷗夷浮江去不返、渺渺萬里雲濤堆、吾生守拙門不出、
結屋依傍山之隈、會稽未及探禹穴、赤城未及遊天台、每懷此地不得到、矯首遙望空徘徊、
今君遠遊別我去、南風十幅蒲帆開、望湖樓前吹鐵笛、冷泉亭下傳瓷杯、問君此去何時回、
安能西子湖頭放歌逐、君去一洗胸中結轡之塵埃、

紫簫歌爲貝廷珍賦

湘江老竹飽霜雪，圓如赤瓊勁如鐵。摩挲碧蘚生秋香，尙帶湘娥淚痕血。梧溪老人人中龍，一朝入手誇奇逢。截作漁家紫玉管，學得丹山雙鳳鳴。雌雄年來移家東海嶠，眼前獨恨知音少。相逢海上春山老，慨然擲贈同袍開懷抱。老人渴飲酒一瓢，醉披謫仙宮錦袍。乘舟卽泛大江濤，起坐篷窗吹此簫。海天月白雲寥寥，起舞水底百尺之潛蛟。恍若東坡夜遊赤壁下，草木振動山崩搖。老人老人真不俗，餘子焉能繼高躅。十年海上居絕塵，門對蒼煙秋一幅。旣不肯，掉舌下七十城，又不屑，折腰爲五斗粟。但知吹簫醉酒學神仙，此樂平生無不足。

聽雨樓

一年過京口，帆飛疾如走。半江疏雨隔篷聽，瀉下驪珠三百斗。一年過漢陽，雪山翻怒瀧。黃鶴磯頭泊船住，醉聽秋雨眠西江。一年過東海，急雨亂灑船窗外。洞庭帝子鳴鈞天，蓬萊仙人鏘玉佩。故人邀宿聽雨樓，玉山顛倒恍然醉。一笑使我消離愁，公本孳雲夫我亦聽雨客。明朝大晴當奮飛，萬里天風振鵬翼。

題拙庵

婁江之側有崑丘，拙庵道人居上頭。江聲到枕或成雨，海色滿簾都是秋。守株曾得山中兔。

托跡竟比林頭鳩。有愚還學柳州柳。有憂却作囚山囚。平生自笑何太拙。恥向權門事干謁。
分甘巢許一身閒。不掉蘇張三寸舌。所以頭最拙。有髮不能冠。所以手最拙。有琴不能彈。鄭
衛之音有耳不能聽。毛嬙子都之色有眼不能觀。嗟嗟若人誰得似。漢陰丈人差可擬。既看
形骸若槁木。想見寸心如止水。分明有類抱朴翁。只疑便是玄真子。釣鼈先生來海門。相見
婁東黃葉邨。手持先天書一卷。白日共向林間論。騎牛却入山中去。濁酒同傾老瓦盆。

題美人織錦圖

大嫂二十餘。小姑年十九。大嫂織倦花下行。小姑弄梭不停手。纖纖玉指柔且溫。機聲似鳳
啞啞聞。一尺一尺復一尺。織成一片湘江雲。東家郎君太驕劣。倚闌漫把春情說。玉梭信手
忽自拋。白日觸翻雙齒折。

早朝次韻

日華初轉萬年枝。鳩鵲蓬萊殿影遲。十萬貔貅環紫禁。三千鸞鷺拜丹墀。河東客獻揚雄賦。
海上臣降陸賈詞。要識中原新氣象。黃河清淺已多時。

題梅道人畫二首

山中種木園書閣無數好枝生屋頭。白浪吹雲湖艇晚。青松含雨石窗秋。賦詩當似韓宣子。作器定從樊敬侯。更愛小亭深樹裏。竹根洗硯細泉幽。

江南春盡雨涔涔。繞樹篔簹含積陰。園曲疏泉石筍滑。籬根繫艇漲痕深。山寒翡翠巢密葉。日暮鷓鴣啼遠林。此時世慮淡於水。聯床燈火百年心。

題分湖客館壁

草堂新築東湖上。琴劍相隨逆旅中。脫穎休誇趙毛遂。草玄甘學漢揚雄。蘆花絮被秋雲白。苜蓿堆盤曉日紅。應勝京華冠佩客。早朝辛苦大明宮。

題趙文敏蘭管夫人竹合作卷

水精宮中春晝長。紫蟾新浴墨花香。王孫應抱大夫恨。寫此楚國之幽芳。當時夫人更清絕。亦寫叢篁見高節。六月飛來渭水秋。一枝尙帶湘江雪。夫人畫法既清真。學書兼學衛夫人。蓬萊閣上曾進見。龍顏一笑天回春。藏之內苑羣玉府。所重不減連城珍。何年好事爲收拾。蕙竹聯芳竝蕭瑟。天風吹夢繞黃陵。九點蒼梧暮天碧。五雲閣吏爭品題。茅山道人重歎息。我今看畫憑高臺。斷雲零落從西來。鷗波回首渺蒼靄。王孫夫人安在哉。

題雲林贈琛長老畫

山中喬木已無多。留得殘株在澗阿。詩絕豈能忘惠遠。畫工猶自憶祇陀。短簾風起秋先覺。雲石苔生雨乍過。我喜幽尋到禪寂。興來同作考槃歌。

楊 任字子重洪武間由人才擢知袁州府壬午之變與黃子澄同殉難後追

謚烈愍人忠義祠

按魏塘香齋傳任居後楊港族誅後妾沈有孕知縣徐本縱之生男宏五世孫淵有幸存圖藏於家云云現後楊港楊姓疑卽其支派也

爲禮部黃侍中觀題翠微書舍

射策列朝署官登少宗伯仁獸翔夏林天驥驟風陌夙學壯則行舊隱情未釋仰瞻玄雲敷俯挹時雨澤翰忠在經綸回夢託泉石丹絃榮綠蘿華軒貢蒼壁人生慎終始於道明損益
崢子功業成還理謝公屐

袁 順字巽之號杞山靖難後出逃吳江作絕命詞投河遇援旋蒙赦返

按袁氏族譜袁氏世居陶莊淨池灘始祖稱爲文天祥幕府同赴北死難杞山其從孫又邑志杞山居陶莊淨池上袁家牆門疑卽其遺址

絕命詞

北風蕭蕭秋水綠。木落松陵野老哭。周武豈不仁。乃恥食其粟。生無益於時。九死又奚贖。吾將從彭咸。寧葬江魚腹。

陸琦字公璐一字文璐號友蘭原籍嘉興宣德改縣琦遂爲嘉善秀才奉父

坦遺命捐田創學宮並建義塾

按湖隱外史琦建義塾並夫子廟於分湖之陰學士曾鶴齡有記考其遺址在服字圩陸家港也

題雲林訪友圖次陳漢昭韻

爲愛幽棲好。乘閒一訪君。澗喧泉漱石。林暝樹藏雲。路自山腰轉。源從谷口分。坐深歸路晚。天末有斜曛。

述懷

坐惜年華似水流。湖山行樂且悠悠。一川煙雨孤邨晚。千里關河斷雁秋。金鳳幸遺天下勅。黑貂猶剩篋中裘。清樽漫醉新豐市。當道何人問馬周。

梅花

雪壓寒香凍未銷。江空歲晏轉蕭條。冷雲漠漠知何處。夢到西湖第六橋。

袁 仁字良貴號參坡順曾孫舉嘉善縣鄉飲賓後遷吳江趙田有一螺集

按一螺集袁氏世居陶莊自仁遷趙田後世選家遂有以爲蘇州人者然祖塋舊宅仍在陶莊子孫均籍嘉善故袁氏自仁以下住趙田而籍嘉善者並錄入之

樂閒歌

人事本無涯流光恆苦短不如酒飲一杯世事浮雲何足管古來英雄原不少黃金白璧
疇能保君不見韓王終悔走狗烹李斯漫道蒼鷹好又不見襄陽龐德公一犁百畝補春風
吾今優游脫塵網明月清風歸北隴朱門九仞掉臂行微才不願君王寵吁哉此樂真世無
兒讀詩書女辟纊何時待我完却向平債相攜巾杖到處醉醞醕

呈座中諸公

東風吹水江南晴草堂張宴羅羣英山肴野簌雜然陳淋漓把酒尋鷗盟諸君爲我須盡樂
莫使春光浪拋却碧桃紅杏開滿園高堂風月如可嚼我輩俱是忘形友飲酒何曾論升斗
兀然而醉恍然醒落落不知天地久人生笑臉能幾開請君試看戲馬臺夕陽滿山皆牧豎
英雄何在真堪哀

畫竹謝沈啓南

昨見石田子。惠我一幅竹。蕭然展閱生清風。丹鳳翩翩下淇澳。彷彿坐我瀟湘間。葉葉飛霞起。華屋見竹如見石。田子高節凜然凌衆木。一枝獨倚巖谷寒。江水滔滔爲誰綠。爲君深貯莫輕開。葛屐風雨愁龍觸。

幽澗泉

金谷對叢林。高人此夜情。引瓶清露裊。汲月曉寒生。漱玉雲花落。餐黃梵宇清。翻憐行路客。到處覓遺甕。

弔梅道人墓

日落霜飛百草枯。橡林暮雨咽寒烏。空留妙墨驅塵世。猶有清風拂酒壚。古壠煙浮閒夜月。空林露冷滴庭梧。只今歌舞樓前月。不照梅花塔影孤。

送錢子元會試

送子寒江滌。臨風折柳枝。人從千里別。舟逐片帆移。夜雨三年恨。春風一戰奇。龍門如有信。飛報莫教遲。

香和庵

竹鎖芳庵野水邊。松篁滿地護茶煙。三千法界元非遠。五百聲聞別有緣。斷碣臥雲疏雨裏。香臺橫草落花前。山人自證無生訣。不學空門五味禪。

寄文徵仲

詩似開元字永和。吳門小隱舊曾過。騷壇有雪諧鳴鶴。筆冢無雲負白鵝。細草愁生今夜雨。空山落盡隔年蘿。相逢欲話雕蟲事。爲問先生意若何。

久雨

四月沉陰水拍扉。客窗猶未減寒衣。澗逢急溜沙難度。竹鎖殘雲濕不飛。苔蘚上堦連草綠。蟪蛄啼雨落花稀。白頭更覺長安遠。盡日江頭坐釣磯。

哭唐伯虎

敝屣殘裘折角巾。石湖零落更傷神。廿年知己燈前淚。兩字功名地下塵。茂苑有詩追大曆。長沙無賦吊湘津。思君不見愁如織。門掩黃昏月色新。

陳氏園

長安宮殿總成塵。悵望豪華立水濱。茂苑有禽春草碧。故園無主野花新。習池錦帳風前絮。

金谷明珠夢裏人。試看武塘川上月。已沈幽澗照青蘋。

寄沈一之

衰草殘陽滿地紅。蘋花零落野塘風。一秋多少懷君夢。半在青燈細雨中。

神仙宮看竹

仙家有地只種竹。多少清風激懦夫。滿院綠陰餘晚節。桃花應合笑玄都。

聞王伯仁謫龍陽

當年談道薄鵝湖。此日揮戈靖國魔。夜靜燈前看寶劍。先生應悔殺人多。

朱 愚字汝明學博鳳子嘉靖乙卯貢授魯府教授歸隱於鄉有東齋遺稿

按邑志朱鳳思賢鄉人朱氏族譜載鳳居朱家浜二子名賢愚均薦明經則南玉港朱家浜朱姓當是鳳之苗裔也

梅道人墓

問幽憑杖履。鶴化只蒼枝。高樹猶喧鳥。殘陽有斷碑。神飛名在墓。情到石留詩。千載梅花夢。春風細草知。

胥山

畫船簫鼓振山靈。伍子無碑陸有銘。寒食古今多涕淚。春風花柳半飄零。重泉不照深杯月。怪石空遺老劍星。慷慨峯頭歌一曲。遊人爭倚醉中聽。

獻山仰高亭秋眺用八音冠

金鼇峯頂試春袍。石磴雲梯步步勞。絲奏五絃虞氣象。竹開三徑晉英豪。瓠形俯視滄溟小。土力終成泰華高。革豹有懷天咫尺。木犀花發已多遭。

景德八詠

幽瀾泉

昔聞神女降。鑿出靈泉異。一勺何清泠。惠山可同志。

大悲閣

高閣湛虛明。一心照千佛。本向西方來。不隨西日沒。

羅屋月

青山在屋上。碧蘿曉明月。照見屋下人。浮生落秋葉。

竹爐煙

活火煎活水。日夕沸空聞。客來且喫茶。坐暖瀟湘雲。

雨花臺

忽散瑤臺雨。天花世所奇。山人無結習。清淨守寒飢。

翻經室

一室斗來大。退藏聊洗心。楞嚴有秘旨。披覽極幽尋。

補衲亭

老衲密密縫。百結煩千辛。已交木上座。不染世間塵。

洗鉢池

齋餘散禪慮。恍靜不聞鐘。持鉢臨流洗。有時驚臥龍。

和林和靖梅花八詠之二

不待東風也。自妍橫斜幾樹稱。山園吟髭欲撚先。愁白病眼貪看未。覺昏香煖羅浮春。入夢水寒湘浦夜。招魂當年李白疑。君是爲愛清光月滿尊。數株東老手親栽。想到前生我是梅。小朵半開三復嗅。高枝千折九須迴。坐中有客空愁絕。

天上無人遠寄來，猶恐酒闌花意少。故留清影浸寒杯。

穀庵先生入祀鄉賢祠敬賦

歸來漫浪丹丘老，翰墨風流絕代人。禮樂春秋新俎豆，江湖廊廟舊經綸。雲東放鶴空遺跡，淮上乘驄遠避塵。公道百年終不泯，一心千古會精神。

袁

黃字坤儀號了凡，仁子萬曆丙辰進士授知縣陞兵部主事贊畫遼陽軍事受抑歸隱趙田卒祠鄉賢有兩行齋集

借兵朝鮮呈國王

飛蝗食嘉禾，錯怨東山狐。晏安不可懷，清宵覓駒駝。毀唇必及齒，左右宜相呼。毋以廚中魚，取笑獺與鷓。借此充朝饑，一餐勝醍醐。旌旗間白日，深山伏鷗鷖。徵騎屯咸鏡，分兵守當途。胡爲縮如蝟，低首失良圖。

弔曹操塚

人生會有死，何山不可埋。古有僭竊之英雄，乃在台城之崗磁嶺之涯。設爲疑塚七十二，傍徨恐懼遺骸我。來弔之蒿我目，霜前日落玄猿哭。野水淒淒草空綠，吾恨鄴中逐鹿翁。晦

明風雨搏飛龍。壓龍爲魚不敢吼。氣凌日月撼蒼穹。紆籌割據半天下。豈無寸土可以安吾躬。蒼梧之雲淨如拭。會稽之水流如織。舜禹亦是尋常人。一身一塚遙相憶。生平自擬周文王。死後空爲鬼與蜮。乃知君心亦甚明。自信九原容不得人。非狼與豺胡爲長。疑猜早知白骨無所厝。悔殺辛勤銅雀臺。銅雀臺令人哀。

送陸五臺之任

移舟一送君。離別在今夕。耿耿秋夜長。不寐成遠憶。豈無黃金罍。可以發胸臆。我心匪白雲。卷舒焉有蹟。彈冠武水濱。坐久暮山碧。

爛溪夜泊

載酒攜琴訪翠微。前邨燈火對漁磯。孤舟自傍蘆花宿。老鶴應疑道士歸。明月滿前春樹冷。好山猶在主人非。百年心事同流水。半夜聞雞淚滿衣。

入山訪友

攀蘿尋仙蹤。雲深杳難識。相逢水石間。一笑暮山碧。

卜居

結廬菰蒲中。柴門映碧水。兼葭何蒼蒼。兩岸秋風起。

潯江

潯陽江上鷓鴣啼。茅屋青燈隔水西。獨坐孤篷傷往事。寒鴉飛盡楚天低。

林居

簾捲東風日未斜。松溪竹徑野人家。空庭寂寞無人到。閒看黃鸝啄杏花。

趙田新居

曉服松間露。晚餐雲外霞。道情隨薜荔。秋色冷蒹葭。趺坐塵容老。焚香日影斜。如何忘舊隱。落盡故園花。

感興

結屋分湖濱。漁樵自爲伍。寒蛩鳴何悲。明月正當午。士有鴻鵠志。寸心自千古。富貴會有時。簞瓢豈稱窶。握手談片時。傾囊爲君吐。風雷惜變化。慷慨報明主。長安五上書。獨立淚如雨。

送陳德夫使魯

帝曰封同姓。皇華遣使臣。河山藏漢誓。寶玉展周親。殿說靈光古。經傳孔壁新。余生好文獻。

一爲訪先民

秋興

仙仗行宮舊內居。花間往往駐鸞輿。徒聞漢帝橫汾曲。不見長卿諫獵書。天水射蛟開水殿。奚官牧馬遍郊墟。蒹葭首藉秋無限。悵望煙雲萬里餘。

北平道中見杏花酬錢湛如

燕山匹馬杏花叢。露滴春枝映日紅。一任黃鸝啼曉色。不隨桃李競東風。

農父篇

春日郊行江水綠。春雲黯淡家家哭。晝鎖千門斷野烟。白骨縱橫滿川谷。去年五月風雨多。處處長鯨吼茅屋。姑蘇城外天欲浮。苕帶荷錢春作穀。東家有女嬌如花。西家有女惜如玉。天時人事共阨危。女賣爲奴男作僕。爲奴作僕負初心。萬戶蕭條春恨深。皇家德澤浩如海。何時湛露下平林。湛露未零下落葉。室人交悔謀生拙。蹴碎床頭雨。後墾從今不復供。鋤鍤沿門殘。豈貴如金一步。一呼腸一結。杼軸宵空鳥雀稀。梧桐冷落行蹤絕。獨有鳴鷓巢嵯峨。王孫挾彈不敢訶。悠悠蒼天奈爾何。

過李司業故居

司業名自華嘉靖乙丑榜眼

國子先生墮寶弓。一行新鷺過琳宮。庭梧不識興亡事。猶是青青競曉風。

朝鮮聞報二首

昔辛漁陽今渡遼。彎弧吐月落雲鵬。可憐一夜心頭血。化作全羅萬里潮。
報國捐軀禦虎狼。天山一箭淚千行。不辭獨樹頻遭雪。但願羣枝盡向陽。

初歸

蕭蕭戰馬憶三韓。門掩疎槐五月寒。我僕既痛姑進酒。君恩未報獨憑欄。青山不逐流年變。玄思空隨短鬢殘。爲問黃梁曾熟否。而今不作夢中看。

登華山絕頂

盡道人間行路難。那知太華更巉岏。松橫古徑三峯迴。目斷危崖五月寒。漢帝雄心青嶂外。陳公遺夢白雲端。從來仙俗皆塵土。渭樹參差不忍看。

春遊引

花開綺陌明。花落人心改。寄語遠行客。春風不相待。

卜居

移家住翠微。明月落寒暉。昨夜披襟坐。南樓一雁飛。

偶題

朱門飛玉屑。峻坡摧金轍。熙然抱甕翁。披襟坐明月。

有所思

吳江楓落時。夕陽淡桑柘。悠悠有所思。獨坐青松下。

平江秋望

停杯望寒隴。霜徑野花明。邊馬猶南牧。漕帆競北征。朔風催病草。孤雁落荒城。到處蓬蒿茂。

離人淹淚行。

逢金生遠歸

昔日送君行。吳江秋水平。今朝相晤語。越岫野花明。風雨聞鼙鼓。乾坤半甲兵。如何兩地淚。

都向暮山傾。

下第

世事如春草。榮枯不上肩。嘗懷千古慮。肯爲一身悲。機息忘多難。才疎負有司。相逢更相勗。何以答明時。

對弈

千古興亡事。乾坤此一枰。戰酣明月上。謀定晚風清。黑白觀玄化。圍攻恥世情。邊庭有驕氣。乘興欲談兵。

沈堯中字執甫號瀛壺萬曆庚辰進士官刑部郎中改任開州知州纂修郡志
有沈司寇集

中秋煙雨樓望月

按堯中世居南勝原籍嘉興分縣後遂籍嘉善從子夢斗字應星中萬曆戊寅進士現南北勝沈氏皆其支派

澎湖此夜月常滿。游子數年纔得還。老去不諳新世路。醉中猶識舊家山。波光灩澦浮青雀。桂影婆娑擁翠鬟。最是橫江羽衣客。數聲清唳落人間。

海鹽觀潮

長堤東望浩無埃。萬里滄溟一鑑開。石柱近從潮外落。沙棠遙向日邊來。吞天隱見蒼龍角。

仙島參差紫鳳愁。便欲乘風慕冲舉。不知何處是蓬萊。

松泉積雪

東郭先生坐小舸。雪中棹入荻蘆汀。江天漫漫迷歸路。猶認松頭數點青。

苧村煙雨

誰道城東煙雨多。半邨桑柘半邨莎。山深不識朱衣吏。春社年年燕子過。

袁 儼字素永號若思黃子天啟乙丑進士廣東高要知縣卒於任崇祀名宦

有抱膝齋集

登南高峯偶題

江風蕭蕭風清江濁。我脂我車。有輓無軸。
驅車陟阪。阪高路窮。顧彼柏舟。與波湍東。
高山峨峨。雲墜石升。彼田既蕪。懟隣之耕。
履彼周行。枳棘其婆。仙非乘鶴。禪或鳴狐。
落葉分飛。浮雲不屬。睠我友生。生死相逐。

送龍元溫歸粵

浮雲翳天末。修霤滴空階。悠悠遠行客。翩翩度水涯。日暮入我除。贈我黃金羈。援琴再三彈。倡和離且僖。六籍出秦灰。斷簡多蕪詞。此心苟不愆。藝圃猶可治。章句結深交。無乃重歎歎。與子非一身。安能不別離。但欲乘扶搖。甯用巢南枝。

過潤州

鐵甕城邊潮欲回。浪聲不住起驚雷。征帆極望高天盡。叢竹狂吟暮雨來。萍梗百年雙短鬢。雲山萬里一空臺。鶯花雖好非吾土。莫向尊前帶露開。

與彭鍊師過鄧尉山夜飲達旦作

爲語三生約同登。二月槎鶯啼將曉。樹蝶抱欲開。花對竹兩無語。看山疑是家。吾今攜一鍤。君好作丹砂。

禁足

林樹散朝暉。愁人只掩扉。蝸文生敵榻。劍氣冷春衣。簾外一僮至。尊前雙燕飛。羊裘隨處着。不上釣魚磯。

東歸

遙望蒹葭問舊廬。吳淞森淼獨愁予。月隨銀漢當軒轉。雨霽疏星點戶虛。穉子弓強爭射石。遊人劍老不歌魚。帶將建業江頭水。自寫青蓮醉後書。

廣陵小集分韻得愁字

千年山色照孤舟。兩岸空濛一寺浮。芳草錦帆迷渡口。小簫深院合梁州。亂紅交壁飛黃鳥。叢綠圍池養白鷗。長笛遏雲來倚幙。朱弦招月下高樓。意中花發庭前豔。夢裏人來江上愁。么鳳欲飛春絮盡。海棠將睡午風柔。狂歌白苧翻新典。笑指青山問舊遊。莫道閒情消不得。主人起舞客重留。

過揚子江

風回鉦鼓動江湍。短塵胡床薜荔冠。舟岸俱馳無定影。波濤不改又前灘。園花今向征途落。籬菊翻從水次看。霞帶石城雙闕迥。征塵影裏一漁竿。

過友人園池小集

孤城急柝動春風。山轉桃源小徑通。指點千秋棋局裏。陸沈一世酒杯中。溪光草色如爭翠。

霞影花枝欲競紅。醉拔漉盧頰起舞。案頭擊碎博山銅。

秋日偶題

秋老淡斜暉。疎桐畫掩扉。悶多親角枕。力少怯鶉衣。情向愁中盡。交從病後稀。寧爲孤鶴瘦。肯作野鷺肥。

辛酉季秋吳淞道中卽事

月照西岸明。舟望東浦發。兒童指林端。問是誰家月。向水捉其影。踉蹌祝江流。竭我狂招月光。同傍菰蒲歇。

宿小九華山寺

倚欄盡日立空池。爲愛晴雲出岫遲。山遇客閒徧有景。樹隨人瘦亦無枝。欲摹鳥跡翻奇篆。好採樵歌補逸詩。夜半忽聞清吹起。沙禽啼向月明時。

同友人宿山寺

人影藤蘿上。千秋一布袍。天空羣岫小。江迥片帆高。霞氣夜彌紫。劍光寒不凋。燈前喧笑語。帶醉看吳刀。

朱國望字士翹號蘆墟萬曆乙卯舉人崇禎中舉賢良方正

按邑志國望居雨字圩朱氏族譜國望鳳從孫疑朱家浜系而遷居於雨字圩歟容待考

閒居

寂寂孤邨裏。風光儘自賒。梅花偎屋角。薜荔繞簷牙。夢破茶聲沸。詩成日影斜。門前幾株柳。不是學陶家。

柳溪詩徵卷二

嘉善周 斌志頤輯

魏

坤字禹平號水村清康熙己卯舉人曾續水村第二圖有倚晴閣詩鈔

按魏氏族譜舊居在東二歲圩與分湖尚遠
惟遐字河有魏氏遺址疑卽水村之故居歟

苦雪次東齋兄韻

東皇近溺職天醉孰與禳遂使膝六驕勢橫不可障漫漫凍雲合四野白彌望密比霜蛾攢
輕作粉蝶颺積久陣益集高下竟難狀所痛多窮檐敗絮乏纒纒夜深老屋摧僵臥且保笋
因念山人幾家得無恙緇塵藉以澗吟思或清曠亟探前溪梅觴冷一枝放

游釣突泉

歷下多名泉釣突最奇特源從渴馬至石罅澗底坵初愁地軸翻側坎忽迸出癡龍不堪睡
懼有奔雷擊茲來值蕭辰雨霽嵐翠滴驅馬出郭門水聲澹秋碧漸近見跳珠知爲激湍激
兀立湧澎湃破空瀉崩濤皎如玉柱移飛若匹練直鑿宜鬼工運綃類鮫人織皎奪月魄鮮

怒捲瀑花白高者約及尋低不越五尺噴味濺衣袖坐久寒氣逼汲泉試一啜陡覺塵襟滌
因悟造化巧豈藉枯槔力循環來無端晝夜不得息閣中有古仙臨風吹鐵笛我欲駕飛輪
從之游八極

送宮詹王阮亭祭告南海

海花十丈紅棉高珊瑚倒影翻銀濤空濛不辨萬里色長魚人立風颺颺黃木灣頭祠最古
東西二廟結構牢聖世禋宗光祀典海若欣挾羣龍翹緬維祝融冠溟渤禮薦幣璧羞溪毛
特遣名臣自鶴禁一路負矢開旌旄寒梅却當大庾發冷香簌簌吹征袍柁樓曉對嶺猿飲
驛鼓暮應朝鷄號齋廬漸近扶胥口夙戒執事虔牲醪奉冊陳詞答清宴間以高管張琅璈
百靈秘怪恍畢出圖寫疑禿龍眼毫須臾蜃樓墮水底四顧鯨鱷都潛逃先生此行功洵偉
非比金碧求王褒筆搖青羊硯翡翠光燄可奪昌黎豪側聞嶺表足奇士經歲述作棲蓬蒿
星車往招堪並載忍使寶玉名山弢歸來藉以報天子豈拾瑤草空盤敖

登黃鶴樓

江聲已吞大別口束之不住復東走萬頃怒濤天風號沙岸日斜鼉欲吼一葉翦過煙波灣

登樓憑徧十二闌，忽飛涼雨濺袖濕。白浪高於黃鵠山，山川滿眼來蕭索。吹鬢互垂且孤酌，青蓮畢竟非仙才。崔灑題詩不敢作，醉擬橫將鐵笛吹。歸向仙人借黃鶴。

珊瑚杖爲林沂澤賦

東官詩老天所縱，放脚身輕屏驕從也。知神物當有歸羅浮，道士先入夢。

先期夢羅浮道士告曰：君當得珊瑚

杖，但少子一詩耳。越日山叟來叩門，束就澗籐遠齋送。視之瘦硬皆異材，直上一條特選中。其色殷

然，瑪瑙盤勝於怪石，作清供槎枒尤類珊瑚枝。疑是外國波斯貢，倘使根蟠大海底。鐵網千尋牽不動，石家祇有四尺強。應讓過頭能出衆，巖深霜雪久剝蝕。不計何年自某種，礪何節目錯且堅定。經仙子自磨礱，一朝拄杖落君手。珍比琅玕更鄭重，長篇短什差足豪。惜闕梁王詩未誦，謂藥亭庶常余擬徧踏嶺外峯。圖繪真形五嶽共，思覓翠筇撥蒼蘚。對此不覺神骨聳，酒邊却話舊規塵。海水雲昏愁瀕洞，君今挾之將安往。獨力搯撐苦無用，不如擲向葛陂去。化作赤龍任飛控。

飲嘉樹軒

自注爲衡藩故宅

翠鈿遺處杳難搜，望裏荒煙接莫愁。留得故宮螺黛影，春山如髻滿城頭。

題羅裙譜詞

鄉緒茫茫鬢漸絲。不堪重唱翠螺詞。桃花影裏江南恨。正在湔紅簇蝶時。

送徐檢討虹亭南歸

曾訪鷗波叟。爲余畫水村。平田青接岸。深柳綠當門。百里程非遠。三高迹好論。遲君同聽雨。濁酒一開尊。

秦淮雜詠

斜日烏篷盪槳游。笙歌小隊織閒愁。劇憐一片湔裙水。曾送春江達御溝。大功坊賜中山第。閤闕空存姓已非。惟有汝南灣畔月。夜深猶上舊柴扉。寒雲漠漠覆荒榛。饜殿秋風散碧燐。聽說樵蘇行漸遠。蔣山新置守陵人。

自題水村第二圖寄虹亭

君從詩裏能尋畫。我向圖中又覓詩。一片蒼葭數株柳。分明秋色雁來時。

慈仁寺有粥孤雁者四明萬季野購畜於庭作羈雁詩邀予賦

不趁深雲結陣飛。羈孤似爾欲何依。彌天繒繳曾知避。滿地江湖却暫違。空守殊鄉驚歲晚。

難招舊侶待春歸。臨風無限回翔意。獨立閒庭對落暉。

許 湄字凌洲號拙村康熙庚辰進士湖南石門知縣

雙溪坪勘災

策蹇來投止。荒廬繞棘叢。看人惟野雉。撼壁有狂風。疴鬼邨邨聚。牂羊戶戶同。救災長吏職。無術起哀鴻。

孫 烜字奎章號立夫康熙庚寅歲貢生有華黍莊詩鈔

按分湖小識松陵詩徵皆稱烜吳江人惟居宅在華冢小港介蘆墟柳溪之間姑錄之以俟考正

顧黃門祠

水邊祠宇碧雲連。曾此棲遲撰玉篇。草樹蒙茸濃更淡。無人可繪六朝煙。

村莊雜興

此鄉風俗昔稱淳。南陌東阡每見親。直任坦懷忘檢束。不須苛禮整衣巾。消磨裘馬場中氣。游戲雞豚社裏身。聊與停杯談往事。村中猶有白頭民。

循桃花澗歷虎巖觀眞珠泉抵天門宿柳梅庵追和錢牧齋宗伯韻

丹梯直上絕塵根。天際羣山聳特尊。自是煙霞藏僻境。到來岳澗啓重門。鱗披古樹穿藤蔓。珠灑寒泉漱霤痕。不向桃花流水渡。那知此地有真源。

魏錫琦字仿韓坤子邑諸生官縣丞

和唐六如四十自壽詩韻補祝杉泉居士

三年總是倚廬身。攬揆曾經屈四旬。詩補白華常志痛。酒賒玄液不關貧。略教緩唱千秋歲。已覺空過一載春。端合東南稱第一。似君高行更無人。

蔣向皋字迪思蔣村人後遷居魏塘有無是園稿

西安雜興

漢寢秦宮事已非。漫從高閣對斜暉。五陵車馬春風逝。三輔笙簫夜月稀。幾度砧聲清到枕。重來秋色冷侵衣。等閒悵觸羈人意。一片鄉心逐釣磯。漫向西風吊井梧。六宮粉黛已全無。名香十里思鈎弋。鈿合三山問玉奴。不信興亡由弱女。怪來操縱屬庸夫。傾城傾國尋常事。贏得深宮淚眼枯。

許王猷字賓穆號竹君康熙癸巳會魁官內閣學士兼禮部侍郎

題祝翁表母舅小照

峨峨千仞松亭亭如張蓋下有隱君子外和而內介孝友鄉黨欽浩落無芥蒂余時到平川
追陪傾情話公年七十餘矍鑠邁後輩陶然酒一卮興與煙霞會古貌復古心妙手殊難繪
孫銀槎字階青號竹尹烱孫乾隆丙戌進士官安徽績溪知縣曾注曝書亭集

和潘雲皋移居

四首選一

輦紅甘謝鞠塵居豈是無才賦子虛近市偶更卜鄰宅遠遊懶執問津輿蕭疏翰墨三吳少
瀟灑襟期兩晉餘羨殺雙林同巷侶過從不費往還書

余於郭瓠雅學正處得君詩箋并傳君語促余和章

秋階新曲次用李義山碧城三首韻

灣洞里曲傍長干紅葉風輕釀嫩寒門響金銀迎吠犬庭閒珠樹集雙鸞含情脉脉橫波接
竝坐盈盈隔水看多事層樓閉重闌葵蕤鎖鑰巧鉤盤

孫銘彝字巽揚號東柯銀槎弟乾隆乙酉舉人官至山西忻州知州

煙筒

閩山小草本靈奇一縷含香引竹枝功似檳榔傳四反相思最在夢回時

火硯

宿火剗中面作凹。麩丸新試免黏膠。不須弄筆煩呵凍。和韻詩成手自鈔。

舟中卽事

解纜石頭城。崇朝至太平。大江三月滿。細雨一舟行。欵側風帆駛。波濤性命輕。薄遊還自幸。安穩得兼程。

金陵雜事

一夕南風送客舟。清明節後到蘇州。桃花笑我緣何事。不作山塘載酒遊。四境雞鳴曉渡關。水程三宿見鍾山。江風有意留人住。領取棲遲半日閒。肩輿衝雨石城橋。三月鶯花未寂寥。桃葉渡頭逢上巳。高樓重聽玉人簫。白下風流樂事多。名園良友屢經過。老來心性平原飲。還向江邊聽棹歌。

孫鉅文字煥之號心閑銘彝弟監生

桐村紀事

吾鄉有前哲奇偉俗所矜。讀書破萬卷。閱世鄙逆詐。功名慕管葛。文章擬顏謝。生當勝國初。

崛起少憑藉，匣劍必騰光。櫝珠信無價，章句陋小儒。匡濟辯五霸，筆札名卿推。師資羣彥借，樟棹任隆棟。騏驥恥泛駕，分得試掾曹。託病守清暇，桓桓金榮囊。屈致戎幕下，覘冠亦無纓。無煩縱刀靶，密與壯士偕。疾恥駿騎跨，危崖援攀藤。隘徑改緣罅，出奇首惡驚。宣威附從伯，諭令習蓄畬。許以幸寬赦，醜類漸弭服。巖疆蕩遵化，偉績宜酬庸。政亂竟停罷。

時王振亂政英宗北狩

時平薄賞行，一尉祿露乍。雄材困下僚，厚誣及長者。事白拂衣歸，遂初務耕稼。門臨通津開，日見客帆卸。蒼茫煙水中，歲月度瀟灑。農人話雨晴，漁父漫酬酢。春風楊柳晨，秋月梧桐夜。論文履盈庭，問字舟繞舍。碑版走三吳，稿脫競傳寫。詩文集繁富，流播詠非寡。奈何跡斷澗，後人費猜詫。子孫定誰某，咨訪輒嗟訝。志乘名僅垂，姓氏地久假。遙遙四百年，高風宛如昨。生以道澤人，歿令祭於社。吁嗟室廬改，塑身駁而堞。神座附佛宮，門東纔西架。金碧雙扉前，觀瀾頗豁閭。渺焉二桐樹，新種未盈把。村童演芭舞，報賽雜牒蜡。倪君積學人，文獻宿搜摭。刻意勤掌故，抗懷詩幽雅。偶來憇荒祠，卽目歎苟且。謂此繫遺獻，鄉望若恆華。豈宜任湮沒，漠視等飄瓦。先爲完塑身，次議遷廣廈。揭榜標舊基，復始異新貫。庶幾信有徵，後進足模楷。時當夏之初，秧針翠鋪野。同袍集三五，瓣香肅迎迓。蘋藻薦豆籩，甘泉注杯罍。波光淨如拭。

日影桐相射。彷彿覩陳儀。依然見亭榭。感慨彌。寧然詩以代祝嘏。

袁紹銑字香泉。號清在。別號古愚子。例貢生。住東袁埭。著有靜虛齋詩草。

柳州種柳歌

斷垣零落夕陽邊。幾度行春爲愴然。今日飛甍還舊觀。赤欄人倚綠楊煙。
風粘露浥十分榮。滿眼陽和喜放晴。溪隱遊船橋繫馬。管絃一簇和歡聲。

和益亭原韻卽以餞別一律

不厭三年白屋低。發蒙啓悟日分題。經融史貫推梅里。文雅風流屬合溪。
愧我一編終自困。憐君三絕有誰齊。明春晝永如年候。孰共清談到日西。

乃翁當日共敦推。志氣干霄矢未灰。浙水文章思顧况。柳溪吟筆愧袁枚。
芝蘭舊誼雲山合。桃李新栽閨苑開。室邇人遐從此始。寒宵更鼓莫相催。

偕清楚宗朝二丈人至心齋吳君西園賞菊賦一律

秋陰寂寞從何遣。喜報高齋菊有花。聯袂偶攜方外友。提壺先酌澗溪茶。
孤芳淡宕風前曳。傲骨離奇霜後誇。借問我儂皆晚景。可能彷彿此君耶。

苦無三徑裁秋色。喜有雙僧約看花。雅淡高人渾似菊。延齡仙酒妙同茶。餐英信識眞香冷。品格尤欽晚節誇。情話漸深景漸落。何時重得到毘耶。

袁 璉字惕三儼五世孫邑諸生

分湖捕蟹詞

白葦黃蘆夾岸明。渚青沙白雁宵征。霜華滿地一燈小。聽得扁舟過斷聲。韶濩雲山譜不成。漁歌却比棹歌清。老漁那識漫郎曲。解說琴聲是蟹行。

蘇國柱字紫峯安徽太平人乾隆末遷居陶莊

題叔祖仲直公遺照

天矯蒼虬倚碧欄。圖中五岳好頻看。盤堆火棗催瓊液。座列冰桃誦玉丹。蘭砌風清眠舞鶴。桂庭雲淨戲吟鸞。不須更學壺公術。煮得青精飯幾餐。

袁 璿字素三璉族弟邑諸生候選知縣

躋堂頌張邑侯

朗朗冰壺徹底清。悠然官閣面花城。熟聞父老傳佳政。信覺詩書起令名。心識蘭台推哲匠。

跡遠龍坂笑迂生曾借難弟聯文席

謂京師教習時

金鏡家聲意倍傾

魏正鎧字震來號冬木邑諸生有當不止此集

按魏氏族譜正鎧正錡皆居南早汲舊居而靈芬館詩話冬木水村後人有終老江鄉頽然自廢之句又沈瘦客有柳溪贈魏冬木詩疑冬木曾居柳溪也

習舞

習舞花前不論年。身材小巧越輕便。春風秋月蹉跎易。簇簇新裙又覺薦。

走馬

走馬紅粧燦若霞。晚來歸去問誰家。即今苦殺春郊外。杳杳長隄自落花。

魏正錡字于湘號石如晚號清涼庵主正鎧弟邑諸生有清涼庵詩鈔

按周字圩有清涼庵疑石如會居於此

七哀詩 選四

小人曰有父背兒近十年。一棺厝南郭衰草淒寒煙嚴霜與烈日前。和無乃穿昨朝寒食節。東風吹杜鵑行行逢馬醫。云上祖父阡大婦進麥飯中兒焚紙錢歸來謀斗酒。一滴滴九泉。空手徒躊躇涕泗交洏漣憶昔侍膝下百盡不厭添在生酷所嗜地下理亦然生男不葬祭。

何用生男焉長波動寒郊哀歌感蒼天

小人曰有母齒危髮盡禿年紀七十餘猶是營餽粥朝憂米空甌夕念薪不足春風二月初
城頭草葦蓐曝背循南牆兩手猶鞞塚拾彼道旁枝腰頑不盈掬今朝雨霏霏濕彼枝頭綠
泥滑况出難晨炊何以熟明年取金印奉母麟州屋天吳爲母裘鍾乳爲母服平頭奴指千
出入伺所欲高堂聚衆賓長筵奏靴祝金鬢白玉卮再拜千秋祝裴回看雄劍時會未可卜
長兄既早世仲兄癡莫如哀哀不得食癡亦喪其軀叔也落拓士鬢鬢頗有鬚謀生一何拙
與季真友于英儒存本性末俗競錙銖蠅營與狗苟所得亦區區杞梓自有種雁飛自有俱
四雛折其半兩雄錦翅舒高岡多竹實諒非效搶榆

季妹最羸弱嫁本儒家子學書苦不成賣藥東門市叢雜抄古方侈口談醫理豈不擇術微
糊口聊爾爾入門見阿龍三歲學步始呶呶索餅餒頭角非奇偉老嫗置我前指云酷吾似
家賤麒麟愚時來豚犬美所及同本生常時效欣喜在生當往還幸不隔鄉里煎茶話平生
無爲家事悝

題荻廬詩鈔

樂莫樂看春樂苦莫苦聽秋苦誰人直以聽秋名我之姑之子之女秋風不可聽秋雨不可聞秋風冷冷秋雨冥冥聽之總涕零零予涕感予心涕零不可制因而動苦吟有時夢爺娘有時哭藥砧有時覩花放我剪有時聽鳥停我鍼十六年來婆也聽秋越至今悲哉卷中一行一行秋之爲氣亦已深憶昔我老姑詩句本不學藏密存小稿不雕復不琢前經爾王父後經爾亡叔其間往往有句并商榷爾宗多詩人卽今猶有觥觥而嶽嶽孰令生爾詠絮才只聽秋聲凋翠幄我聞秋士每多感春女恆多思春女思之蕩秋女思之宜秋士感善豁秋女感不移清涼老仙舊有尋樂處齋名愛聽歡愉之聲陶野趣明朝况逢三月三便掩此卷扶杖看春必有嬉春句

宣城張中丞廟

淮南江北望睢陽。千里風煙接恨長。但使古城能拒敵。已令諸將得扶唐。空山遺貌須髯怒。吏部文章日月光。異代不須橫夜笛。舉看天地色蒼涼。

題王述庵司寇三泖漁莊圖

君恩乞許白頭歸。泖上煙波舊釣磯。早具綠蓑青箬笠。畫中莫誤作紅衣。

朝解金魚暮釣魚。舊衙終礙野人居。芙蓉香遠鬱環水。合讓綸竿我老漁。
題倪檢之椿蔭圖

畫裏鬚眉認宛然。文壇早歲識翩翩。因驚老醒村夫子。豈判小年與大年。
黃山憶望萬株松。十六年前怯屐蹤。畫裏如聽風謾謾。欲憑司馬問奇峯。

胥塘曲

十里胥塘開翠奩。南風吹柁浪花粘。回頭欲認新橋柳。已失城東古塔尖。

袁玉溪字媚川號愚廬住西袁埭有愚廬吟稿

送春

嬉春日日引壺觴。緩緩歸途趁夕陽。此後出門無意味。新詞應唱倦尋芳。

辣椒步韻一首

驚風凜烈乍寒辰。栽就園蔬得味真。脫去青衣爭日彩。好同紅橘鬪霜新。天生本質依然辣。
時得調羹宜用辛。知是五茄珍可折。共耽滋味合君臣。

顧功枚字惟吉號竹厂邑諸生曾寓金家灣徐河浜有深柳居詩鈔

晚春卽事

杜門頗憶春郊樂。此願何難竟未償。手抱一編閒處坐。落花何急燕何忙。
穀雨今番雨最多。書齋十日斷人過。消愁賴有紅襟燕。銜取殘花補舊窠。
落紅成陣萬花殘。芍藥遲開尙擬看。一事心頭却惆悵。送春容易送人難。

過金家灣舊宅有感

數椽小築近臨河。訪舊還從此地過。七十年前同輩少。鄰居祇覺後生多。
記曾逐隊作兒嬉。放罷風鳶竹馬騎。今日重來如過客。黃金橋畔立多時。

雪後野望

扶杖出門望。寒郊雪乍晴。恍疑塵世隔。朗若玉山行。一色浩無際。斜陽照更明。平生愛高潔。
對此愜心情。

齒落

天地先有我爾生。比我遲骨肉既同氣。甘苦共嘗之誼逾。金石交相依到耄。期憶昔文字飲。
斗酒詩百口。珍錯羅滿前。大嚼不容辭。破堅爲糜爛。交鋒每出奇。如何數年來。零落似故知。

一卒忽敗走行伍遂參差跪跪而鬢鬢勢必全局移柔茹剛則吐何以成朵頤瓮齏猶未盡
棄予竟如遺齒曰否不然盛衰各有時毛髮半垂白兩眼漸迷離留我作後勁先生亦太癡

七十自述

小時不知老倏忽老已至回想七十前恍如昨日事家世不讀書讀書自我始出就鄉先生

但求粗識字董帷特見招奇遇天所賜

受業於顧南廬夫子修膳並無

五載坐春風采芹拾芥易從此妄自

期顯揚或可冀思着祖述軼欲奮摩天翅閱歷幾星霜途窮志亦墜生事本來拙餽粥尙難
繼謀食背妻子向人籬下寄佳節返故栖每與文酒會吟詠伸雅懷談笑無拘忌殘年知己
希落落只三四境遇屢變遷光陰隨水逝身後安足稱目前貴適意愁城詩將攻娛老頗得

計

大魚骨歌

有序

乙巳春柳溪賽神神前供一魚骨徑二尺許圍五尺餘厚約三寸旁有兩小孔詢
知陸氏世業漁得此鄉人以爲奇玩戲作是歌

一鄉若狂競賽神華筵種種羅異珍就中獨詫大魚骨云是得諸東海濱家所罕有即奇玩

老幼如堵環而看吁嗟人生閱歷惟江鄉目前習見都平常豈知天地大無外山海之經難具詳大魚或長千里許鼓浪成雷沫如雨更有巍然高出望如山水底全身不能睹縱使眼孔大於箕焉得遍探宇宙奇倫遇非常驚欲倒區區朽骨何足道

送錢丈默庵重赴雲溪館舍

寄跡雲溪曾十載白頭今復赴招尋老能作客如公少別尙留詩戀我深夜月東堂欣把盞春風南浦惜分襟名園下榻多佳興到日梅花正滿林

夏日齋居

當檐畏日去遲遲課罷焚香默自思客館久居渾似主吾身多病漸知醫隨緣不問窮通理懷舊閒尋倡和詩恰怪近來貪早睡北窗孤負夜涼時

袁霖周字湘雲布衣住錢家浜

丁巳夏季媚川兄以納涼詩索和恍覺香風繞座涼氣襲人疑置身於清涼國也勉次原韻勿笑續貂爲幸

呼友開軒納晚涼風來柳下送斜陽竹枝微動飄清氣荷蓋輕翻逗遠香何處高歌聲漸近

誰家弄笛韻偏長。懸知獨向瑤台望。月照疏林。泛綠光。

遊三清殿

菊殘曾此探流霞。結契重來意更嘉。土竈頻烹井底溲。漆燈常照佛前花。心閒不碍門連市。念寂渾忘刹是家。坐久忽忘歸路晚。數聲清磬夕陽斜。

無題集唐二絕

靚影聞聲已可憐。更逢晴日柳含煙。夜來孤館人無覺。多病多愁損少年。
君問歸期未有期。感君情重惜分離。一緘書札藏何事。腸斷紅箋幾首詩。

吳元音字笠臺邑諸生住絳田

題涉趣園和楊清溪韻

石屋棋聲

築室成仙隱。朋來劇手談。子隨松子落。聲與鳥聲參。冷暖消寒暑。輸贏得再三。敲殘一簾月。舞鶴影毵毵。

橋窺月印

蟾魄印前川。焉能夜夜圓。此間巖有穴。終古月常懸。空却山河影。明無上下紋。前身今日見。盼望小橋邊。

題夢鷗閣爲許竹溪作

一閣遙臨分水隈。白蘋紅蓼對窗開。非鷗情性知鷗樂。逸趣偏從攤鉢來。

題夢琴采菱圖

湖分兩界半農家。網罷銀魚稻未花。臨水柴門無別業。要將軟角繼甜瓜。朝辭菱鏡上菱舡。泛泛如鷗破楚江。兩角玲瓏兼四角。摘時猶記刺晴窗。含華含實待佳人。來秀橋來妝樣新。向日何如背日好。翠眉不帶夕陽顰。亦似藕兄芡弟不。家家姊妹聚中流。紅繩約腕愁寒刺。撈着浮根繞指柔。咬殘菱角味如何。勞此纖纖手撥科。隔岸柳陰驅犢過。笑呼織女渡銀河。調急每因風忽聞。渡頭采采到斜曛。白蘋紅蓼占秋色。不比青菱利十分。鞞紋蝶叶月光凝。越尾吳頭露氣澂。合種分收菱一熟。充飢如穀較先升。

袁寶秋字粒我號稻香邑諸生有牧笛吟草

題夢鷗閣

忽於鬧市中。得此清幽境。路盤旋似螺。衢屈曲如蚓。旁啓兩板扉。中有小樓迴。童子六七人。圖書几席整。卷幔復登梯。點塵悉掃屏。一榻足高眠。紙帳梅花冷。

題楊青溪涉趣園雜詠

涉趣梅芬

築個茅亭境自閒。見梅花放笑顏開。閉門大有尋詩興。底用探遊鄧尉山。

含風松嘯

曲曲闌干摺幾重。參天老幹似虬龍。此間自有絲絃樂。古調頻彈風入松。

石屋棋聲

炎炎長夏日如年。巖壑居然別有天。晝靜惟聞聲落子。此中也算小神仙。

涵鏡荷風

荷池如鏡葉田田。水面風來亦自然。照出花光最明澈。教人認作並頭蓮。

閣聞稻香

吾家舊任分湖曲。時有稻花香到門。不道草玄亭子上。也將此景傲鄉村。

筠廊挹翠

清影離離綠滿身。曲廊成韻愛風筠。倘然深處留客。我欲先來問主人。

稼雲樓題壁示魯齋

樓前好景耐人思。紅荔香秔成熟時。不是閒來供眺望。艱難稼穡要先知。有餘地步儘寬然。小草閒花切莫貪。留得謝庭階一半。花惟多子草宜男。

題丁竹坪焚香省過圖

人非聖人孰無過過而能改善莫大昔賢欲寡猶未能我祖有訓常戰兢
七世祖了凡公四訓有改過之法

曉起觀荷

驟雨連番漲滿池。今年花較去年遲。朦朧倦眼侵晨起。要看新紅乍放時。

家居

做箇阿家翁。幽居仗二桐。抱孫娛晚景。惜字補餘功。自勵先人志。仍安貧士風。衷腸無限意。

欲訴與誰同。

重九一首寄耳山

僻處鄉村破寂寥。爲逢佳節一揮毫。惜無籬菊采盈把。小有土山登便高。何事王宏期送酒。漫誇夢得敢題糕。門前未遇催租客。草草詩成興亦豪。

吳元麒字茗香元音從弟邑諸生

小室古梅盛開較往歲爲特佳金菱姪詩來索和喜其興之濃也漫成五

古一章以應之

我家花樹少。此花品獨皎。不在庭之塢。而在牆之均。東風一識面。紅蕊開先早。莫嫌徐娘老。

此花約六十年矣。

梳粧尙窈窕。每當月上時。弄影尤夭矯。惜無寫生手。描成作畫稿。我今來樹下。獨

立拈花笑花。我兩忘言。抬頭思縹緲。豈必入羅浮。然後稱絕倒。羨花福命厚。幾身修得到。爰
構杯酒獻。默向花間禱。

題柳松琴焦桐吟館詩稿

兩載晨昏共。三生臭味親。林亭新著作。風月舊詞人。
君兼工剪燭同懷友。張子予同交。開尊

想者蔬。

去年君於竿木蓬萊清景足。君所居名有地著吟身。

詩思清於水。癡肥一派刪。明珠時吐艷。白璧自無斑。境曲波三折。毫纖月半彎。開編重往復。高格總難攀。

題竹溪夢鷗閣

四面湖光望裏收。蘆汀蓼渚最宜秋。何時一醒塵緣夢。來掛疏篷問野鷗。

吳元驥字丹山元音從弟

偶占

生平從未學吟詩。意欲吟詩年已遲。乞得金丹來換骨。只愁兩鬢盡成絲。

沈文江字香湄號松泉嘉慶戊午舉人住北要浜有餘霞閣集

題袁二恬水村秋眺圖

村水滌澗尺幅中。逍遙錯認輞川翁。雲歸山北晴無雨。春過江南座滿風。小醉蘆花邀月白。閒吟楓葉落霜紅。玄亭愧我頻來往。漫說劉棻問字同。

中秋旅館卽景

堂名印月昔人傳

予家有印月草堂

月照堂中此夕圓。遙想高堂應玩月。飛觴醉月坐堂前。

天心月到淨無塵。

笑指當頭月一輪。

座客團圓同月滿。何須邀月到三人。

吟仙對月話綢繆。月下題詩興倍遒。今夜南湖月更好。不知幾客月中遊。

秋海棠

西府移來種獨奇。好誇艷色鬥嬌姿。沉沉銀燭高燒後。悄悄湘簾半捲時。黃葉黃花宜伴爾。秋風秋雨總愁伊。夜深濃睡憑誰喚。錯認佳人醉不知。

題許竹溪夢鷗閣

君家小閣臨分湖。開門看月月色鋪。微風瑟瑟吹寒蘆。翩然翔集鷗與鳧。鷗眠已熟不可呼。忘機寫入夢鷗圖。結廬塵境如蓬壺。扁舟對面漁燈孤。荻花吹火烹銀鱸。洞庭春許一斗沽。錦囊詩句從奚奴。我本長安舊酒徒。卅年車馬空馳驅。睽違咫尺煙波殊。何時放權收菱租。半篷秋色分菰蒲。同君爛醉眼模糊。水上閒鷗笑客無。

沈晉堦字件龍邑諸生住南勝

白桃花和史補鰲韻

幽姿那許螭蜂狂。一段風流壓衆芳。玉洞春來魂伴月。仙源夢斷鬢侵霜。肯隨時世誇濃艷。願絕塵緣學淡妝。似與素心人夙契。臨窗倩影照釵梁。

別菊花同紱堂作

兼旬壽客伴吟詩。今日將離繫我思。瘦態惟餘籠月影。幽姿漸老傲霜枝。羲皇枕託重來夢。魏晉書添歸去辭。醉爾一杯聊送別。相逢有約九秋時。

丁邁祖字超宗號希皋邑諸生住虹霓殿港有清遠軒集

題竹籜吟秋圖

涼生小院葉墜高柯。騷人索句時聽啾啾。

唧唧鳴庭畔。颼颼響樹間。蕭齋方兀坐。高詠甚清閒。

秋景撩人吟興。拈毫欲賦新詩。不似歐陽興歎。豈同宋玉生悲。

蕉窗梧院鶯吟。肩好句來時定欲仙。秋色秋聲與秋興。憑將妙筆一齊傳。

丁子復字見堂邑諸生

題笠臺桂林課子圖

蔭彼桂之樹萬卷此讀誦靈芬護老蟾情韻吐雛鳳經訓足精研舊學根柢重濬川導厥源
作室壯乃棟秋光湛高旻催轉廣寒夢天香滿人間莫忘辛勤種

原书空白页

柳溪詩徵卷三

嘉善周 斌志願輯

沈丹培字絳堂邑廩生住南勝有青箱館集

答袁春湖見懷兼論詩法

蕭齋兀坐秋夢清吟朋隔斷煙霞鄰蒙君折簡忽惜我開函快讀詩句新慨自風騷久絕響
大雅不作正始論別裁僞體輒炫異眼前誰是真詩人從來作詩如作室堂構大勢基先成
塘垣既立乃塗茨黝堊丹漆致飾亨若恃目巧無奧阡般倕恐亦難呈能又聞詩理通畫理
龍眠白描固足稱豈知彰施藉五彩金碧渲染樓臺精蠹哉拙手炫俗艷臙支畫出牡丹春
頓令生氣索然盡醜態如效西施顰乃知作詩有秘訣巧法兩字真定評巧在法內運以迹
巧在法外運以神誠能巧法擅雙絕縱橫揮灑皆至文格調不必李杜做流派何須唐宋爭
君今騷壇思樹幟力矯庸熟尙性靈微嫌骨力欠堅挺勁敵難詭飛將軍願速返轍趨正軌
一字一句循準繩獅子搏兔用全力不作下界蒼蠅鳴笑我直道寄篇什語雖激切意頗誠

河東耆卿亦豪客，勿駭詩狂頓見曠。

惜花詞擬樂府體

有序

庭中玉蘭二枝花，時每遭風雨粉態如離芳。情欲訴倚闌，相對頗惜予心豈玉折。蘭摧乃造物忌才之意耶？爰吟惜花詞以代抒其恨云。

昨日吹花開，今朝吹花落。花好無幾時，春風太作惡。芳顏會有盡，花落不須惜。只負養花心，東君空費力。

織布詞

木棉花採乘秋暮，疊雪輕彈飛白絮。紡成萬縷雙軸纏，妙手吳孃工織素。花枝繞戶春晝長，機聲咿軋鳴曲房。繁音促節不耐聽，使我聞聲心暗傷。豪家服御誇奇品，盈箱燦爛堆雲錦。鳳衫裁紫試春遊，鴛被翻紅薦華寢。可憐寒女常守貧，蓬門不識綺羅新。一生衣食仰十指，朝紡暮織多苦辛。空閨月澹寒蛩語，經稀緯斷繫愁緒。一日三匹猶嫌遲，影伴孤燈宵理杼。天寒袖薄腕力微，倚梭懶擲爭長秋。織成纔抵官租去，小姑又索嫁時衣。

顏子坡同金秋風作

岱峯聳峙翠峩峩，人去坡荒唱晚樵。王道不難銷劍戟，賢材爭奈老簞瓢。譜稽闕里深叢中。

花落緇林伴寂寥。愁向魯城東畔望。防山古冢草蕭蕭。

流螢詞

岸草煙銷涼露滴。流螢閃閃凝愁碧。夜遊女子散香魂。飛來飛去憐秋夕。墮懷點髻巧依人。
金粉池塘夢裏身。豆花籬落棲無定。對爾宵行欲愴神。六朝自昔繁華擅。翠樹紅樓霞彩絢。
象管風飄玉樹歌。玳筵月照瓊花宴。玉樹瓊花樂事多。招涼曲院巨銀河。珠簾飛入輝犀押。
紈扇兜來映碧羅。銀燭畫屏宜夜色。歡情此際應無極。腐草江山一夢中。景華宮裏徵求歇。
祇今舊苑委蒿萊。破瓦頽垣劇可哀。黃土香埋結綺閣。綠蕪雨塌鬥雞台。夜來螢影還依舊。
千點繁星光遠逗。井畔疑隨神火移。牆邊時逐陰燐走。霸業銷沉逝流水。二分明月恨揚州。
微蟲應亦含遺恨。飛遍荒郊風露秋。

采菱詞

湖畔鴛鴦去復來。中流打槳獨徘徊。妾心菱葉浮波軟。郎心菱花背日開。
菱歌低唱移孤艇。風吹衣袂秋江冷。采罷相思歡不來。菱花鏡裏憐芳影。

贈蒯星樓用少陵醉時歌韻

帶水迢遙居隔省。霜寒楓落吳江冷。自慙負腹空食肉。未足三冬文史足。羨君讀書博且專。氣壓詞壇追屈宋。輪囷拔地豫章林。他時應作棟樑用。書淫詩癖任人嗤。絕妙文章擅色絲。相逢握手共傾倒。有如伯牙遇鍾期。情話出肺腑。深信不復疑。感恩有真意。欷歔述前師。開筵頻把村醪酌。雄辯高談氣磊落。眼前不顧俗人驚。誰識胸中具邱壑。蒼然暮色催人別。未訪雲林清秘閣。星樓有清秘書室。篷窗風峭獨歸來。相親臭味思岑苔。得一知己真快哉。頓覺塵胸掃俗埃。預約來春親載酒。談心共醉花前盃。

讀張船山詩草偶成

出奇制勝仗偏師。倚傍全空筆一枝。參透菩提眞法乳。性靈兩字少人知。峨眉突兀倚晴空。地產才人氣較雄。此老開山誇手段。要從詩界闢蠶叢。

贈計丈壽喬

白髮蒼顏傲雪姿。相逢喜值菊開時。清修花福兼詩福。老隱醫師更畫師。萬卷書撐名夙仰。三生緣淺見偏遲。玄亭倘許劉棻侍。願向蘭畦荷舌隨。

讀黃齋青夫子詩娛室詩集敬題二律

賓從追隨互唱酬。高情不數庾公樓。隱囊紗帽書千卷。狡鳥蠻花酒一甌。詩好自能消獄訟。官清原不礙風流。麻沙購遍雞林賈。莫怪波臣特地搜。
筆花艷映佛桑紅。瓊海珠江點綴工。名士談兵皆將略。吟仙作吏總儒風。才豪定許追同叔。稿富真堪敵放翁。愧我學詩無好句。瓣香敬祝仰南豐。

游仙詩六首

狡獪羣真逞少年。濫膺位業大羅天。如何參透靈飛訣。翻向人間作謫仙。
騎鶴空思傍上清。罡風吹斷玉簫聲。蓬瀛有路何難到。祇欠金丹鍊未成。
鯨鏗麗製妙香薰。艷映瑤台五色雲。却道世人花樣拙。文昌宮裏鑄奇文。
天上神仙懵懂多。引人成佛到修羅。無端又墮龍華劫。道是霓裳曲調訛。
鑄試喧傳遍上台。丹房玉局任徘徊。誰知鶴籙森嚴地。也似金吾弛禁來。
案吏爭看護玉皇。絳雲深處繞爐香。怪他桂籍名鑄就。碧落偏遺沈侍郎。

讀袁了凡先生兩行齋集題後

求士三代還全材。不世出經濟縱略優。循名難責實。譬彼演三乘禪。向口頭說袁君王佐才。

奇氣青霞鬱，衾影勵儒修。韜鈴諳藝術，長揖軍門前。快捫王猛蝨，揮扇却奇兵。名士比諸葛，倭寇闖然來。上書時伏闕，專閫儻協謀。何難回覆轍，惜遇李如松。中傷遂罷職，寂寞浣花溪。趙田三畝宅，著作傳等身。雲初留手澤，一卷黃石書。珍重前朝物，焚香耽雉頌。修到思仙骨，絕勝茂陵居。羞遺封禪冊。

餽陳荔裳銳麥芽餅賸之以詩

粉餌古爭稱，吳均傳餅說。槐葉號冷淘，手製推妙術。吳鄉重麥芽，取材真創格。配以草頭甜，圓規月可撥。傲彼郭家品，留作蓮花色。笑我守齋鹽，紅綾欠飽喫。藉此畢羅香，竊比大官食。蒸處聽呼婆，熬餘思餉客。羨君擅賦才，牢九字早識。畫餅笑虛名，樂飢意殊得起。洩喜分嘗味，美勝餽餽名。畫欠珍藏無，嫌寒具設。曾飽看荔裳所收古畫故戲及之

盆梅

莫恨寒花晚，天心要玉成。瓦盆生氣足，鐵幹古香清。瘦合依書幌，低宜伴夜檠。詩翁相對處，姿態喜橫生。

題袁丈媚川愚廬遺藁

老向人間作畫師。艱難家計強支持。閒情寫出田園景。盡是儲王的派詩。
儵然市隱柳溪深。藥圃花畦趣獨尋。難得詩孫工索句。篝燈償却苦吟心。
指春湖

朱丹墀字醒齋邑諸生

祝姊陸太君六十壽

略陳閭德欲云云。姊弟何嫌語不文。三黨望風稱孝婦。卅年茹蘖挹清芬。
女嬪星耀逢秋霽。天姥峯高簇絳雲。棗栗提攜恩意在。藉申祝頌倍殷勤。

朱華時字雲堃

祝姊陸太君六十壽

卅載茹荼兩鬢霜。自應潛德發幽光。寒機夜作星河落。短布晨興井臼忙。
天眷貞操宜與壽。人欽孝行共傳芳。閨闈懿範誰能及。彤管千秋定闡揚。

袁青字雪持璉孫邑歲貢生

題二恬叔水村秋眺圖

家住分湖東復東。秋高瞻眺興無窮。閒來放起林逋鶴。肯與籬籬燕雀同。

荻蘆四面漾秋光。箬笠蓑衣篷底藏。喚起樵青尋活計。數聲欸乃入鱸鄉。
獨往行將問水濱。筆床茶灶遠羈塵。浮家偷適天隨願。奚問江湖號散人。
自古藏修更息遊。儘教活水恬源頭。文章妙得天然趣。無限煙波筆底收。
竹林陪侍幾經年。點易朱看滴露研。會得盈虛消息透。掀髯獨立晚風前。
不衫不履意悠悠。一葉扁舟傍水隈。飽看湖光天欲暮。載將明月滿船回。
莫問高陽舊酒徒。江鄉最好是分湖。竹垞老去鷗波遠。重見水邨第二圖。

擬陶淵明秋菊有佳色

芙蓉秋江上。三醉薄小春。感此先刈秫。違惜漉酒巾。酒熟招親串。歡然忘主賓。清漣對河水。
取不復懸鶉。辛勤自食力。要使風俗淳。

構李懷古二十首選三

野王台廢宿莎鳧。翁子墳荒起暮烏。霞落煙橫何處是。半埋草廛半苔蕪。
奇氛春駐望中殊。一座名山兩處驅。曾記龍門思禹績。更聞人說始皇無。
霞橫落日月橫蘆。誰是分湖舊釣徒。墨蹟爭欽趙氏寶。煙波影裏水邨圖。

酬夢琴賀歲之作

竹籬茆舍野人家。糊就紙窗不用紗。客到三人元日後。梅含數點半開花。一年好事無多日。百歲光陰亦有涯。轟飲今朝須共醉。歸心且莫逐寒鴉。

袁 蘇字毓眉號漁村寶秋子

題夢琴圖

短檠相對足三冬。琴叟依稀夢裏逢。古調分明從學得。高山流水一重重。

袁 營字呂封號漁溪寶秋從子邑歲貢生

題許竹溪夢鷗閣圖集唐人句

蒹葭楊柳似汀洲。許渾我羨老翁居處幽。元結乘興輕舟無遠近。賈至心隨流水共悠悠。張

說

深樹雲來鳥不知。錢起海鷗何事更相疑。王維孤帆遠影碧窗盡。李白獨立蒼茫自詠詩。杜

甫

壽許母陸太夫人七秩壽慶

盛事遙聞獻壽辰。榮歸桑梓記娛親。

謂壽母令伯朗夫中丞告致事

從知玉樹生非偶。始信金萱茂有因。綵

服歡騰吟不老。華筵肆設福彌新。東來紫氣西池照。一室溫傳四座春。

悅辰仙客捧瑤觴。祝得春輝寸草長。畫閣鷗盟來鶴舞。錦堂酒煖帶荷香。課機如女真同孟。奉膳有兒恰並姜。儘有新詩祝親健。繼聲皮陸頌無疆。

張尙白字樸齋號課花廬主住北張浜有布衣詩鈔

窰戶竹枝詞

家住干窰小鎮西。燒窰手業莫嫌低。磚兒自有翻身日。土墜還來仍是泥。

二語皆吳諺

滿面煙煤略帶羞。問郎認得妾容不。瓦筒不換新花樣。願做鴛鴦到白頭。

蘆絮同絨堂作

半江飛絮暮秋天。魚網斜兜夕照邊。香襲釣翁船上被。暖裝孝子襖中綿。生涯蟹舍兼漁市。浪跡湖雲與渚煙。顛額蘆中人共老。鬢絲搔罷暗愁牽。

浣沙溪上澹雲深。千疊疏花冷艷侵。菰米同心爭晚節。柳絲一樣縮秋陰。顛狂未失溫柔性。飄泊猶存衣被心。搖落江南與江北。無人載酒棹船尋。

漁村大兄以棕竹見惠賦此誌謝

清風吹散輭紅塵。逸士登門動四鄰。本是深交金石契。贈來微物歲時新。好抽雪裏黃泥筍。藉養堂前白髮親。却願雷從平地起。兒孫頭角露嶙峋。

寄懷沈伴龍

記得殘春掃徑迎。一簾紅雨蹋初平。文章命抵桃花薄。富貴心同柳絮輕。詩解參禪求悟境。人因傲世減才名。不羣莫訝孤高甚。自有風懷可近情。

喜丁嘯岩入泮

螢窗記取十年勤。發軔公然冠一軍。笑我種花三十載。不知泮水有香芹。酒痕濺得布袍薰。累我名心宛復然。却願錦衣君早換。青衫借與故人穿。

饑民歎

癸未夏水沒青苗。癸巳秋水沒稻梢。青苗沒兮可補種。稻梢沒兮全無用。西風瑟瑟水漸落。墮指裂膚競刈穫。三畝才敵一畝收。石米貴於珠一斛。舍南舍北斷炊煙。田家老幼吞聲哭。幼者衣何單。換得糠粃煮糜粥。老者身何瘦。一日兩餐苦不足。蒼天蒼天何不雨。粟矜此哀。

鴻起諸溝壑吁嗟乎天不雨粟倉又開大府不聞穀不熟開倉十日追逋來胥吏打門錢橫
索西隣賣兒女東鄰賣房屋急抵官倉糧不敢隔一宿未識倉之鼠與雀米之酸苦可曾覺
苦者是民眼中淚酸者是民心頭肉

出門行

鼇魚爲脯海爲漿吳山越水開酒場左持一大白右招三千客欲飲不飲各一石酒酣拔劍
唱河梁歌聲激烈悲且長丈夫有志在四海何忍鬱鬱守窮鄉拜辭白頭母捐別青眼友撫
慰黃口兒分付玄鬢婦故人牽我衣此行殊否否名利驅人如耕牛江湖浪跡如沙鷗何如
守此席上珍年年索笑梅花春行人聽罷淚欲滴僮僕聞之掩袂泣幡然躍上驂驢身一鞭
紅日西風急我所思兮在泰山欲往從之梁甫艱我所思兮在桂林欲往從之湘水深我所
思兮在漢陽欲往從之隴阪長我所思兮在雁門欲往從之雪紛紛張衡句四顧茫茫何處奔
忙風風雨雨人馬郎當不如歸去息影書堂入門見阿母阿母歡非常見我無行色勸我寬
中腸澆我洗塵酒換我敝衣裳早聽故人語落魄不如此何不謝故人恩情日以親

背心授丁寄兒賦詩簡其父嘯岩

薄襯吳棉窄補身。玉樓低聳兩肩春。願他長大心腸熱。莫作旁觀袖手人。

勉兒夜讀

不必限遍數。不必計更鼓。讀書如煮飯。不熟不息火。

讀甌北詩鈔題後

吟膽渾身是將材。錦囊曾向戰場開。千鈞筆力翻陳案。一代詩豪逞霸才。自築駭壇增壁壘。不移舊料起樓臺。拜袁泣蔣同推許。合受程生長揖來。

簡絨堂

兩地訂苔岑。詩牋互送吟。縱教新識面。絕似舊知心。同抱煙霞癖。交投藥石箴。幾時婚嫁畢。把臂入山林。

問掃葉道人

剛被詩人識。隱居欲攜囊。笈出鄉閭大。江南北。君遊徧。何處青山好讀書。

贈沈蒿庵

沈郎吟苦瘦腰支。濯濯真如柳一枝。玉屑霏來風致語。慧珠滾出性靈詩。酒無限量仙應妬。

交到忘形水自知。未識幾時重把臂。花前共唱鷓鴣詞。

金以煇字康如號嘯梅一號小眉邑諸生住金家灣

贈絨堂

靜對幽梅坐。荆扉晝不開。何期佳客至。特送好詩來。吾黨論風雅。惟君具霸才。匆匆留屐印。未許掃蒼苔。

琅函承枉示。管豹得全窺。君有千秋業。我慚一字師。狂原存故態。老不合時宜。何日攜尊酒。高吟共賞奇。

詠懷二律

閒居泥飲渴如虹。白髮醜顏笑醉翁。餐糲腐儒悲杜牧。思魚食客愧馮公。靜看歲月馳駒隙。貧免兒童拾馬通。惆悵頻年鑽故紙。寒氊坐久已蒙戎。

萍漂梗泛亦前因。到處能容自在身。娛老無他惟教子。借書以外不求人。詩如小說都陳腐。語涉清談也率真。默數晨星半寥落。愴懷張緒舊丰神。指樸齋

題夢鷗閣

小築湖唇遠市囂。盟鷗心跡混漁樵。友梅種竹還多事。箕穎家風挂一瓢。

陸母朱太君六十壽詩

友人向我索詩句。一緘寄示徵詩序。讀罷清風拂紙生。是吾不可無題處。序中紀述朱孺人。孺人家住陶溪濱。十載調絃襄內助。一朝破鏡委微塵。含酸此際傷何似。誓不相從情不止。太母殷勤爲致詞。願兒暫緩須臾死。一門苦寡影隨形。爾我相依期沒齒。地下縱然樂唱隨。堂前誰復供甘旨。敬聞慈命心悽惻。婦也殷然修子職。捧盤洗手作羹湯。閉戶挑燈勤紡織。北堂頽邁病纏綿。虔拄心香禱上天。噓背分寒衣。不解問醫嘗藥。夜無眠。精誠到處神靈佑。果奉慈幃臻上壽。螟蛉蠓蠅羸茂。冀庭自覺此生猶負疚。於今身泰享華年。膝下佳兒佳婦賢。輜軒已采風人什。里黨爭彈寡女絃。吁嗟乎孺人之節。世罕有孺人之壽。堪不朽。松柏能堅。歲後凋梅花。耐冷香彌久。

袁鴻字敷台號賓秋紹銑子邑諸生

秋望

景物重陽候。黃花快此遊。霜痕明木末。雲影瘦峯頭。長嘯風生座。高吟月滿樓。登臨宜與賦。

秘思若爲抽。

盧國型字燭齋邑增生住東市有枕流閣吟草

乙未館青箱館主人建蘭一盆發筍十餘枝內有一花並蒂雙心瓣分八
出客來賞之曰此真蘭翹而兼花魁爲賦此以志異與絨堂同作

主人酷好花性命相依之異卉滿庭列灌溉勞不辭花亦償苦心逞媚多芳姿中有建蘭者
花開樣更奇雙心兼並蒂閱之解人頤恍如兩美人並立湘水湄雜佩互遺贈含睇露冰肌
課餘閒賞玩索解每生疑主人忽大笑花意我先知自君下榻來臭味無差池同心蘭寫照
感應當若斯而我不謂然此意終近私君家多令子輝映玉樹枝苕發復穎豎芳蘭盈堦墀
更有矍鑠翁樹德務求滋芳馨播遠邇香風九畹吹慧福誇雙修子孝父復慈奇葩忽湧現
休徵定在茲聊成詠花什當作祝嘏詩持此問蘭花花應無異詞

偕沈笑山小住夢鶴閣訂賞雪和竹溪韻

碧水青山色憑闌飽我看果然名士室畢竟寸心寬流水知音少陽春欲和難漁樵堪混迹
身世不妨寒

裙帶魚與絨堂聯句

新樣翻從丙穴旁。湘江拖出水痕涼。燭依蒲欲混裙腰色。薦饌還分書帶香。絨解共銀刀頰
竈婢量隨玉尺倩廚娘。燭笑他詠物題詩客。錯認羊家白練長。絨

鱧魚頭與絨堂聯句

鰲頭聳出共矜奇。燭玉頰堆盤快療飢。絨腦似晉君容濁監。燭鱗思參政許爭披。絨崢嶸薦
處宜調膾。燭美滿嘗來定解頤。絨笑比龍門燒尾宴。燭從今點額不須嗤。絨

魏塘歸舟

雨過芳郊綠漸肥。溪橋新漲野煙霏。遊因日久心偏急。帆趁風狂勢若飛。一路桃花開笑口。
沿堤柳色上春衣。生平不慣趨城市。嗜好原來與俗違。

題沈左卿放棹圖

一曲清流三月春。綠楊陰裏獨垂綸。扁舟若訪煙波客。我是鷗鄉舊主人。

沈柳橋新構精舍偕丁嘯岩晏集卽席賦贈

小隱柳溪邊。分南構數椽。徑栽陶氏菊。屋仿米家船。地僻心偏遠。庭方月自圓。啣盃拚一醉。

得句染花箋

寒窗夜讀

風雨殘編裏。頻年倚短檠。寒嚴憑酒解。韻險押詩平。白雪催雙鬢。青氈誤半生。雄心拋不得。把劍聽雞鳴。

納涼

水心亭畔夕陽時。菡萏香風幾度吹。坐到夜深明月上。滿身涼影壓花枝。隔溪女伴及笄年。水榭招涼笑竝肩。屈指今宵剛十四。明朝十五月應圓。

題錢鑄唐友竹圖

我輩原非食肉身。論交好與此君親。切磋早訂三生契。蔬笋還叨半畝春。坐右爭如青士雅。人間幾許白頭新。門前分得蕭疏影。市隱年年結比鄰。

袁愛棠字召循號竹薌玉溪子邑諸生有竹香吟稿

題許竹溪夢鷗閣

十年著意夢鷗閣。今始將身入畫圖。笑問漁莊蟹斲外。可能許我結鄰無。

春夜次朱謫亭韻

春深小院漏初交。一刻千金莫漫拋。香氣半庭簾半捲。東風料峭上林梢。銀燭高燒景倍幽。朦朧春色繞紅樓。却教好夢酣初覺。妬殺花陰月一鉤。

藕香吟樹觀荷

荷香撲鼻漫相催。小閣臨波向晚開。話到鴛鴦如有約。並頭花放便飛來。匆匆歸思片雲催。款住嫦娥不放開。小別主人頻解纜。藕花風裏送儂來。

留別徐連沂譜兄

韶光荏苒歎頻更。轉眼驪駒問去程。只道異鄉皆是客。那知旅館有難兄。分牋賭詠留新夢。翦燭論文感舊情。早識相逢劇相別。當時何事更尋盟。

留別朱少雲

領袖驪壇筆有靈。能寬禮數爲忘形。却探好句髭因斷。縱遇凡材眼亦青。執手相看將判袂。游跡無定等飄萍。原知聚散尋常事。第一難忘是謝庭。

陸母朱太君六十壽詩

六秩添籌屋。華堂笑語温。真心看勁竹。晚節麗金萱。瑤草凝仙露。蟠桃獻壽尊。正逢丹桂發。香裏自温存。

松柏徵同壽。堅貞歷歲寒。伏藜看自得。繞膝盡承歡。果進佳兒橘。羹添健婦餐。長生參妙訣。歲月若爲寬。

袁蔭槐字晉廬號午亭營弟恩貢生

和楊青溪涉趣園詩

含風松嘯

榭立松間如扇。含風聲起長吟。定使幽人遙想移。牀樹底調琴。

石屋棋聲

石屋深藏石洞。棋聲響答泉聲。客到巖間莫訪鶴。來戶外相迎。

釣磯漁躍

君亦頗知魚性。堆磯一任遨遊。不減濠梁樂趣。前生定是莊周。

層台霞彩

日暮登臺吟眺。彩霞紅上高梯。霞下主人亦可讓。與閒雲夜棲。

筠廊挹翠

千竿萬竿修竹。十步五步回廊。中有瀟灑侯在。酒杯茗碗皆香。

沈汝枚字少湄號計人文江子邑諸生有覆瓿集

暑夜

深夜斂殘暑。涼月停柴佇。獨立悄無人。壞壁一蟲語。

秋日遊寶筏庵

老僧鶴髮古神仙。方外交遊結靜緣。霜葉三秋金作地。蕉陰一院綠爲天。掛來錫杖雲生樹。烹到香茶月入泉。笑我才非蘇內翰。也思活火學新煎。

新秋

遙岑雁影滿江橫。一味新涼小院迎。蟬已無聲知夏去。蛩原有語俟秋鳴。瘦人漸覺單衣怯。微冷先從薄簾生。好向樹根書飽讀。天高其氣更清明。

妙員山

陶家墳墓久淒涼。鮑氏池亭亦已荒。祇有妙員山不朽。不教人世感滄桑。

老年

雖老色如少。秋庭艷獨誇。無花唯有葉。此葉卽爲花。來雁期無爽。經霜色更嘉。珊瑚修七尺。紅襯夕陽斜。

沈汝棠字懋伯號菖庵汝枚弟有菖盦詩稿

嘉興晤張叔未丈奉贈

夙慕張夫子。相逢在秀州。杖鄉偏矍鑠。賣字亦風流。交淡鴛湖水。情高煙雨樓。願君無量壽。椿樹共千秋。

酒後遊精嚴寺

精嚴古意自婆娑。蓮社如何載酒過。不怕遠公來笑我。逃禪往往醉中多。

秋夜吟

靜夜四無人。涼風颯然至。廬陵方讀書。淡泊涵秋味。明月照空庭。絡緯聲如沸。浩然懷抱開。乾坤有清氣。

喜黃菽田辭官歸里

東山招隱已多年。聞說君歸喜欲顛。賭墅圍棋謝安石。舉杯邀月李青蓮。名花買得無雙品。
時君新納寵宦囊何曾有一錢。從此不須頻憶荔。鱸魚鄉味十分鮮。

水邨遇張尙白

萍水相逢信有緣。清談半日各歡然。文章到此能驚世。出處由人莫問天。老去那知心益壯。
窮來翻覺志彌堅。期君載酒溪莊過。醉後狂歌五柳前。
五柳溪莊予家別墅

小病杜門錢君鑄唐汪甥均生過訪喜贈

聽得門前到故人。扶筇強步喜迎賓。病中憐我形容瘦。花裏逢君笑語頻。
字庭前桂花盛開親感情深關痛癢。友朋誼重見精神。只愁野外無供給。草草杯盤太率真。

水邨寫意

蟹舍魚村外。吾廬靜掩扉。高懷常落落。異想入非非。水月參禪去。分湖載酒歸。羣鷗皆識我。相與共忘機。

丁應谷字嘯巖邑諸生住虹霓殿港

建蘭和絨堂

閩地移來一瓣香。奇英爭放趁新涼。無言自結孤標契。競秀翻成並蒂芳。空谷幽人聯臭味。漢泉神女鬪梳妝。料因新闢芝蘭室。連理花枝獻吉祥。

錢 堃字鑄唐任中市

題許竹溪夢鷗閣

煙波深處結鷗盟。好寄閒身掃俗情。夜半夢回人乍醒。照人月色半樓明。乍晴乍雨蓼花秋。水面風來入畫樓。試問漁翁樵叟外。與鷗同夢許吾不。

袁雲楣字坤南號竹坡咸豐辛亥舉人住東袁埭

壽許母陸太夫人

琳宇瑤池夙有因。分湖偕隱亦仙真。養年不羨金丹術。介壽剛逢荷誕辰。黃絹句誇詩百幅。碧筒杯引酒千巡。母儀共仰平原望。此日稱觴集雅人。

題許竹溪夢鷗閣

十洲三島境迷離。一枕遊仙午睡時。我欲挽君同說夢。高情只合野鷗知。

題友蘭小影

柳溪西畔水清漣。僻處江鄉五十年。縱使暮塵來近市。此身常自得安便。
兀然獨立傲同羣。入手靈芝燦若雲。約我板橋榆蔭下。時還攜杖聽吹壘。
謂芥堂兄

圓覺寺賞菊示同座

秋風瑟瑟透蕭牆。賞菊僧房雅趣長。葉密寒霜凝積翠。枝柔細雨滴浮香。
只憑佛力將花護。迫索詩腸逞酒狂。我欲攜尊重去訪。陶然共醉話斜陽。

吳廷璜字紫卿元音子

寄北萊上人

蒲團默坐閉松扃。雲滿空階月滿庭。今日篷窗得詩句。要來念與上人聽。

題許午莊蓬萊散仙耕鱸圖

偶辭蓬島謫風塵。嘉耦天生有夙因。南畝躬耕農亦士。載筐餉黍敬如賓。
偕隱方期共百年。那知鷺夢遽游仙。橫經負耒平生志。爲想齊眉意惘然。
笛聲犢影夕陽中。省識田家樂事同。鴻案倘如偕老願。辟鱸燈畔話年豐。

爲君題句憶君身。稿續蓬庵著作新。試向畫圖覘品概。薦賢應更有胥臣。

吳廷珪字彤桂廷璜弟

寄懷夢琴

一角湖波葦可杭。伊人欲訪思惟長。牋云梧影牋分影。前賜札云書齋在梧影半閣故云句詠書香句亦香。

吳錫金字丹桂號剩人廷璜弟

和夢琴藕花詩集禳帖次元韻

水曲亭亭趣若斯。清陰盛放坐觀之。晤於永日豈由竹。仰引高風不在絲。情極自然隨管取。品能作合遇相知。羣遊暢詠蘭言室。靜氣虛生向暮時。

秋海棠

綠陰庭院已非春。尙有嬌花含露新。日照柔枝低檻睡。月籠小朵對窗顰。燭燒仍舊丰神好。簾捲依然粧點勻。最是秋娘生怨候。莫教愁煞看花人。

袁昌齡一名興詩字誦伯號安吟青從子邑諸生

呈夢琴舅氏

男兒詩膽大於斗。重蹋危樓夕照中。風葉忽飛鴉陣亂。愁城須仗酒兵攻。秋花寫出疏狂影。秃筆書成笑罵工。扶醉燈前勸珍重。閉門教道學坡公。

己卯元宵後一日過吟琴讀書樓作

燈又重紅月又圓。阿耶不見劇堪憐。讀書須要成名早。人影一年長一年。

元宵踏燈詞

燈期又是可憐宵。拉伴尋詩一放驕。簾裏衣香簾外月。一紅紅過赤欄橋。深深門卷水之隈。聽得遊人得得來。姊妹粘成新謎子。試他先被阿兄猜。好年光過忒匆匆。莫負華燈一番紅。誰識六街簫鼓鬧。有人垂髻颺東風。

袁嵩齡字翰生號松巢道光庚戌進士授翰林院編修

公車北上宿南沙河

昔年此地曾經過。重到殊非舊店家。一帶蕭疏門外柳。三秋零落道傍花。紅旗未報南來客。黃水能回北上車。最是可憐憔悴女。夜深猶是抱琵琶。

送朱叔陶謁選北上

鄉國暫爲別，驪歌一曲中有懷。趨此闕，得意送東風。上苑鶯聲近，名區驛路通。緇塵毋易染，親串望從同。

曾踢蓬瀛路，於今已十年。看花無我分，走馬讓君先。岸柳紛垂緒，山櫻欲放妍。濟時生更急，誰作鄭圖傳。

題柳松琴文焦桐吟館詩集

誰道蓬萊遠，分湖十里濱。煙波容嘯傲，花月寫精神。體必祛塵俗，詞惟見性真。柳州家學富，一集繼先民。

游西湖諸山與絨堂聯句

繞來湖北又湖南，松三竺風光許共探。絨澹寫眉痕山抹翠，松晴開鏡影水拖藍。絨結來文字緣何淺，松精舍詩課不果。絨訪到梅花興更酣，絨歸向善提參慧業。松蘿松精舍一枝庵。絨

題計午莊蓬萊散仙耕鑿圖

小住蓬萊傍水濱，農家願與接鄉鄰。讀書無路可通仕，安分歸田亦救貧。荏苒扶犁煙正煖，

殷勤餉黍日初春。最憐車馬風塵客。未識柴桑有替人。

薛 淮字少雲住湯家浜

美人蕉同絨堂作

石欄小立現花身。香國風流迥絕塵。紅雨滴來疑着粉。綠煙護處儼舒顰。絨愁無那芳心卷。映雪偏宜艷態新。最好夕陽斜照影。嬌羞擁扇想丰神。

袁召齡字右之號懋棠嵩齡弟咸豐辛亥舉人內閣中書

題朱叔陶表阮北上餞別圖

大鳥不飛亦不鳴。一飛冲天鳴驚人。從來神物未易量。英姿卓犖超等倫。朱君讀書更讀律。躡蹻名場嗟夔屈。不知人世有金科。能向天家披玉牒。君以玉牒館考取君今行矣應得官。慷慨一

洗儒生酸。但願絃歌化仁里。莫嫌枳棘棲祥鸞。丈夫入世貴儻攬。轡登車氣何爽。東風二月馳帝京。文杏始花柳芽放。有親堂上尙健康。內願無事牽愁腸。驪歌一曲爲君餞。努力男兒志四方。

題朱遠之小影

空山無塵俗清風拂修竹白雲靜且閒碧草芳而馥中有隱君子小立山之麓性與鶴同遠
養鶴伴幽獨聞昔張山人二鶴甚馴服且放暮始歸作歌快心曲君今企高踪樂此矢勿告
翻令侍立童神馳不自覺

袁熙齡字穆齋恩貢生分水教諭

蘆花

蒼葭十里望中明。痕染霜花韻倍清。白板亂圍詩屋小。烏篷低壓釣船輕。淡烘夕照雲無影。
冷戰西風雪有聲。欲訪伊人渺何處。滿天飛絮不勝情。

蓼花

勻蘸燕支淺渚邊。飽嘗風露自年年。千莖冷艷撩秋夢。一簇嬌姿動客憐。澹沱開殘黃葉雨。
蕭疏畫入白鷗天。傳神合倩徐熙筆。瘦蟹扶來景色妍。

題計午莊蓬萊散仙耕鑿圖

莫羨仙家遠。須知坐合歡。三春勤作息。十畝賦寬閒。冀缺風高野。淵明志入山。埋名今得所。
誰復款柴關。

柳溪詩徵卷四

嘉善周斌志頤輯

袁青照字春湖玉溪孫邑諸生有守研廬詩鈔

論詩

作詩雖小技亦頗非易事茫茫萬古人結習亦亡至各自成一家各自爲一類麻沙萬萬本
一一後人示今雖多作者已在古人次或過於謹嚴讀之昏欲睡或又矯其弊汪洋太放恣
二者得其中曰醇而後肆此言不可易此詣良非易吾里沈堂與張堂一軍樹一幟柳州琴
更奇特而我獨憔悴太息勿復道亦各言所志

休洗紅

休洗紅洗多紅漸落。從來故人面。見多情反薄。欲見不見長相思。朝朝暮暮無已時。

傀儡歌

山有木兮木有枝斧斤剗剗憑偃師刻作人形二尺修神工直比棘人猴炬光如帚臺角明

綵絲牽出小鬼驚。協以音律附以磬。嬉笑怒罵俱有情。忽焉美好忽粗醜。奸權忠孝肖某某。疑是怒雷夜劈古血墓。翻身跳出千木偶。亦復舉兵仗。歷亂舞相向。又疑伶人死後頭。手足僵未化。夜深出現更作生時樣。吁嗟乎一飯一食都不需。登場亦足供娛娛。安得斬盡南山高枝柯。于朝于市皆用他機械。更比生人多。

獨夜

雪意作黃昏。雲根別啓門。犬聲吠遙夜。鴻影下孤邨。露重風無力。山空月有魂。題詩寄屋壁。
東坡句心事不堪論。

指環

宛轉憐金縷。香痕一捻添。拈殘花片片。裹住玉纖纖。不斷連環意。難明解珮嫌。瓊瑤何日報。夢影隔重簾。

答柳松琴見題拙稿之作

一曲思歸引。天涯涕淚多。淒清雲外鶴。激烈酒邊歌。病骨支殘枕。幽情寄綠蘿。姓名能着我。勺水亦洪波。

采蓮曲

紅粉女兒村裏住。采蓮愛向南塘去。南塘埜水碧於煙。中有鴛鴦花底語。薰風日日吹水溫。蓮花半放迎朝暾。惜花私把芳情訴。底事花香心獨苦。采多恐驚鴛鴦眠。不采還愁夜來雨。花光蕩漾鏡中天。采得蓮花空自憐。

無題

金石精神定不磨。青衫留得泪痕多。蓬山遠隔三生夢。鴛牒微窺一字訛。未免有情嗟已矣。明知無益奈愁何。惟將詩句供多恨。獨夜挑燈一細哦。夜涼風送木魚聲。第一難忘罔極恩。玉洞桃花原是夢。金堦瑤草本無根。定知紅線功非小。不信姮娥月可奔。私願果能償得否。編詩留得異時論。

春日偶成

苦吟卅載瘦腰支。贏得生花筆一枝。富貴自知心未死。春來猶譜牡丹詩。春寒簾外曉鶯愁。花裏無家坐樹頭。燕子一生多艷福。紅樓到處有人留。賣花聲裏雨初收。喚到紗窗竹外樓。不買一枝紅躑躅。女兒生小未梳頭。

楊柳含愁春未知。東風只管逞狂吹。桃花有命何曾薄。笑到韶光九十時。

同人文謙呈竹坡先生

共向玄亭載酒過。笑談總與世殊科。汝南月旦鄉評重。斗北星辰寶氣多。桃李門牆無薄植。草茅風雨有狂歌。諸君况復年俱少。老筆高文待切磋。

題陸子選翰墨餘香圖

曉妝時與晚妝時。畫罷雙蛾更寫詩。寫到曉風殘月句。定將紅板一歌之。三千里外遠歸身。賦草題花故國春。落盡薔薇剛四月。陸郎從此莫遮貧。

寒夜吊張松生主人并勉其孤讀書

深林猛虎動咨嗟。室邇人遙別恨奢。想得夜台無苦况。只知客子未還家。鄉心半榻登殘枕。鬼氣一燈銜葦花。掃地麻衣憐稚子。讀書休更誤年華。

七夕一律寄錢鑄唐

盈盈河漢鵲橋填。各訴衷懷我倍憐。別意豈如涼意淡。淚珠更比露珠圓。一時良會歡今夕。兩地深情悵隔年。相見何如即相別。曉來妬煞並頭蓮。

沈士鐸更名福銜字少絨丹培子歲貢生

種菜詩爲張樸齋作

黃蘗飽喫容歌嘯。瘦骨支撐梅共傲。我久蕭然淡泊中。書堆兀坐塵緣掃。屈指父執多。惟君有同調。物外疏狂老布衣。癡獸不顧人非笑。更羨年來逸趣饒。結籬荷鋤混漁樵。小園種菜柴扉掩。妻子同心歌眼勉。三徑羊裘客往還。寒蔬供饌時親剪。傳來尺素開緘讀。高情我欲薰香祝。不祝花事盛。奇葩香萬斛。不祝畫法傳。淡墨寫千幅。祇祝課花廬。邊生計足子孫長。享田園福。君不見。庸人醉飽壓膏粱。終身不識菜根香。一朝窮餓不自了。秋風蕭瑟啼寒螿。

劉烈女詩同家大人作

弓刀隊裏走始娉。淚灑羅襦戰血腥。一縷貞魂飄玉整。千秋香骨伴銀瓶。直將巾幗羞專閭。肯戀釵裙誤弱齡。苔繡轆轤秋雨冷。表微誰爲勒幽銘。

題許竹溪夢鷗閣

吟龕小築傍分湖。蘆荻迴環一畫圖。爭羨高人能脫俗。閒鷗夢處著眞吾。

筆帽

竹皮巧樣擅風流。穎脫無須定遠投。橫掃千軍嗤兔冑。狂題百幅笑濡頭。壓來禿鬢休嫌老。語到簪花想拜侯。何日冰銜容我署。香名憑仗彩毫收。

書衣

翦取天孫一片雲。錦函巧製襲奇芬。披來寶硯紅絲映。搭上瑤琴綠綺分。袍影聊隨寒士裏。芸香不受美人薰。憐他空向青箱貯。壓綫年年枉自勤。

沈士銘字又箴丹培從子

題許竹溪夢鷗閣

寫徧雲藍百幅。筆精墨妙堪尋。絕勝兔園冊子。漫誇敵帚千金。儘許閒鷗作伴。繩床幽夢初回。棹曳菰煙十里。蘆遮蘆雪千堆。

題計午莊蓬萊散仙耕鱸圖

夫耕婦饁企前賢。借隱閑閑十畝田。如此風情如此福。頭銜合署地行仙。滄桑回首幾華年。錦瑟無端竟折絃。今日秦樓虛引鳳。簫聲便斷碧雲天。愁絕潘郎鬢已絲。煙蓑雨笠老東菑。一盃麥飯親營奠。猶記當年舉案時。

田家小隱養仙家。咫尺蓬山路尙賒。爭奈瑤台花落去。更無人與飯胡麻。

金堂字少梅。以煨子廩貢生保舉五品銜。

和絨堂養疴坐雨戲用藥名成述懷四律

青箱館裏羨團欒。四世同堂儘合歡。百部藏書探學海。千金敵帚傲詞壇。聯吟晝按龍鬚席。課讀宵嘗熊膽丸。貫衆爭誇文集富。早刊梨棗與人看。

瓦楞雨急叩柴荆。徑滿蓬蒿失遠迎。推惠瑤章能益智。勞移玉趾不留行。纔供柏子茶雙盞。未獻椒花酒一觥。準待西湖柳岸畔。桂枝香裏話閒情。

續來貂尾媿難幾。老眼空青覺昨非。附驥情殷虛遠志。登龍望重合當歸。書參薤白夢來熟。評雜雌黃識者稀。揆藻名場推巨手。佇看雛鳳並雄飛。

不矜小慧拾人牙。字字珍珠信作家。鑪燕沈香刪舊稿。欄圍寶石種奇花。儘饒佳境餐甘蔗。媿乏新詞報木瓜。懶檢古方胸沒藥。葫蘆依樣漫塗鴉。

潘湘泉

夏日游寶筏庵示明淵上人

何處堪消暑。擊舟到此庵。悠然無俗念。相與恣清談。竹籟風三徑。菱花水一潭。楞嚴留幾卷。禪理許同參。

潘湘波

丁酉九秋過西塘有感

秋風初見鬢痕新。又向漁磯喚渡頻。猶伴青州六從事。難邀白水一真人。滄桑幻滅原無著。得失雞蟲豈有因。聞說墓楊迷極目。漆燈何物不成塵。謂月樓外舅

錢慶熙字琴舫號緝庵苧子邑諸生

愛菊

黃花傲性慣經霜。不厭秋容入淡妝。剩有殘枝休便折。借伊留待賞重陽。

題張可人畫

傍山茅屋對溪開。坐聽書聲度水來。遙指煙雲村樹外。一峯高聳卽天台。

袁尙瑩字韞石監生住錢家浜

南瀕采蘆曲

郎是扁舟妾是缸。波開映出玉容雙。南潞此日風光好。水上摘來不繫樁。

邵錫辰字韻樓優貢生保舉五品銜住橋南有講易居詩鈔

游寶筏庵贈明淵上人

臨濟舊衣鉢。淵公新道場。界占柳溪曲。門對妙員莊。古蔓亂侵壁。修篁綠拂牆。禪家多靜契。閑坐話雲房。

上巳曲

三月三日天光好。垂楊煙鎖連芳草。吳娘結伴踏青去。湔裙又趁春江曉。春來景物一番新。芍藥芳蘭滿水濱。欲采贈時人不見。空從千里盼歸輪。歸來羅襪香塵透。手抱銀箏未能奏。桃花點點向人飛。不願傷春人已瘦。

詠古

買臣未遇時。負薪南山隈。一朝典名郡。騎從轟若雷。無怪舊時婦。涕泣去復回。大抵塵俗見。富貴顏乃開。回思貧賤日。窮巷無人來。

昭君在漢宮。雖美無人知。上陽增寂寞。空老絕世姿。一朝嫁絕域。涕泣玉階辭。至今青塚畔。

琵琶千古悲。所以丈夫志。不戀適意時。

重遊寶筏庵

重聽經聲上講堂。滿庭空翠擁簷簷。入山便羨僧家樂。占盡人間好地方。
日月祇園小有天。數聲魚版落花前。靈山我是曾遊地。記謫紅塵二十年。

自遊靈岩於今七年矣偶憶其勝補題三首

地湖靈巖古。攜朋勝偶探。飛亭平地起。老樹半天參。鐘磬上方出。煙雲遠岫含。茲遊原不易。
數載憶江南。

梵宇雲根出。飛樓對太湖。塔留殘照影。鳥囀好春歌。地古多陳迹。山空少客過。無窮興廢事。
千載話勾吳。

分路尋幽去。峯迴路轉通。叢花縈輦道。古木繞行宮。洞訪西施古。廊尋響屨空。題名書斷壁。
回步夕陽中。

同人文謙卽席呈袁竹坡山長

嘗筵談笑總風生。劇喜名流共舉觥。冀北一時逢伯樂。汝南從古重鄉評。文章老輩真無敵。

意氣諸君漫不平。轉瞬鵬程開萬里。好將衣鉢繼科名。

柳溪竹枝詞

數家小閣俯清溪。楊柳東風一剪齊。試向登瀛橋上望。落花紅撲淨池西。
柔情何用托微波。生長橋邊舊姓盧。郎會捕魚妾鼓柁。相思不比別家多。

周 詩字二齋太學生

壽許母陸太君七秩

萬頃湖光綠似油。有人高隱白蘋洲。特爲母壽開筵宴。試上盟鷗百尺樓。

周

禮字粟香詩弟道光己酉舉人官樂清教諭歸掌魏塘書院

按粟香先住金厓後遷蘆墟然主教魏塘書院
子孫皆籍嘉善爰援趙田袁氏例錄其詩入此

題袁友蘭小影

清癯如鶴鬢痕斑。世網能超任往還。自是君身修俠骨。不須借隱到商山。

題吳作舟扣舷圖

舟壓浪花開。吹簫客許陪。月隨杯影落。風捲市聲來。雲水雙眸洗。煙波一櫂回。平台猶戰壘。

肯使壯心灰。

題陸畹九筆捶琴圖

幾向晴窗寫硬黃。蘭襟猶漬墨華香。綠陰匝地一琴臥。颯颯松風如許涼。高山流水動遙情。古調需防俗耳驚。我欲勸君斂身手。錦囊什襲且銷聲。

題吳生江姻丈小影

眞見機心息漢陰。却從邱壑托遙深。短籬窄徑風流擅。香滿秋花綠滿林。翠映檀欒水繞門。幽棲遠市別成村。素心晨夕相從便。約對黃花酒一尊。

鄭 埔字馨齋一字敬齋行醫住陶家池

按吳輔虎吳趨詞鈔有催租陶溪遇浦仁齋主鄭敬齋爰留榻焉云
云知鄭爲陶莊人陶家池今有鄭姓遺宅先世行醫疑卽是人也

和陳又莪六十雙壽詩五排二十韻

南極星騰彩西池德耀光鶴籌綿永算鴻案慶相莊歲等庚寅再年周甲子剛麥秋時乍過
槐夏日初長筵啓榴花艷尊開竹葉香象賢堪繼美繩武漸成行預把期頤祝能令笑口張
陶然歌且舞耄矣壽而康筆重千鈞舉才高八斗量茜坡欽著望莘野惜留良結宅鄰疑舫

垂帷設講堂宦情同木石。世事話滄桑。貌古神彌健身閒。力自強。書真儲滿腹。詩豈索枯腸。弓冶傳家舊文章。假手忙門栽桃李。盛砌繞桂蘭芳。我未春風坐。君曾化雨揚。蕙蘿欣久附松柏。羨逾蒼。五福光徵瑞。三多亦兆祥。願言斟大斗。俚句頌無疆。

題計午莊蓬萊散仙耕饁圖

墨鉏筆耒硯耕田。佳耦相逢也福緣。一自彩雲容易散。願從瑤島作遊仙。感逝情知伉儷深。此生眞負百年心。他時重結煙雲侶。瑤草琪花滿路尋。依然相見敬如賓。椎髻荆釵有個人。好向山中謀種秫。胡麻飯熟餉三春。來往雲鄉許並肩。儼來眷屬樂陶然。世間不少滄桑感。誰識蓬萊別有天。

袁 楨字幹卿邑諸生

冬閨

起視薰籠火已灰。自憐孤影瘦於梅。亂頭粗服非貪懶。要待朝陽上鏡台。

綠珠

薄命何須恨美人。小桃含淚過三春。問他金谷園中客。幾個身酬石季倫。

明妃

馬上琵琶曲未終。胡塵淨掃塞垣空。君王枉殺毛延壽。千古和戎第一功。

朱 璉字鴻鈞號桐君邑諸生住遐字河

分湖櫂歌

汾陽汾澤叩禪宗。七月盂蘭勝會逢。和尚濃西斜月落。雲台天曉一聲鐘。
杏花莊外杏初花。來秀橋頭雨似麻。知是今朝寒日節。家家插柳記年華。
潘乃昌字硯雲邑諸生住六家港

夏日寄又村

籐床趺坐學參禪。漸漸凡心去杳然。忽覺耳邊聲若喚。綠槐風裏一聲禪。
綠陰深處絕塵埃。向晚西天隱隱雷。一陣涼風吹雨過。夕陽又上小窗來。
張維鏞字福基號又村住齊湖浜有水村草堂吟稿

春遊口占

舍北舍南楊柳。溪前溪後桃花。何處一聲啼鳥。板橋流水人家。

紫燕雙飛花裏。黃鸝百轉林中。如此詩情畫意，一齊付與東風。

夏日和潘硯雲

茅齋避暑靜如禪。嘿坐焚香思渺然。更喜晚涼新浴罷。綠陰深處聽鳴蟬。
暑氣微消淨拂埃。暮窗猶聽送殘雷。有時風自池心起。紅藕花香入座來。

書靈芬館詩集後

君在我未生我生君已故。前後三十年忽忽若今古。讀詩如見君。一一知肺腑。葛苦與梅酸。每向筆頭吐。少年攻詩書。兩足未出戶。儒林稜一枝。不得衣繡黼。家貧無積儲。負米敢嫌苦。中年遊京洛。交游遍寰宇。胸中江海寬。腳底煙雲聚。當時稱勍敵。袁趙詩中虎。垂老卸塵鞍。黃吳結爲伍。朝遊偕詩僧。暮出問田父。或無事閉居。把柴門深杜。偶然顯者來。強項不肯俯。恨我生也晚。光霽目未睹。讀罷默自思。一曲清弦撫。

恬庵過訪作半日談至夜而歸明日詩以寄之

地僻一孤村。君來聽叩門。昨朝同笑語。隨世話寒溫。架上書千卷。花前酒一樽。清談作半日。歸去已黃昏。

登湖心亭作

漠漠雲橫雉堞齊。萋萋芳草白公堤。裏湖更比外湖好。北峯不與南峯低。花柳有情當道艷。山禽無故向人啼。年年三月一來此。遊遍煙霞與九溪。

袁福燾字崧申住橋南

秀州塘

細雨斜風欲上潮。一枝柔櫓兩人搖。蓬頭赤腳船家婦。說道新婚第四朝。

仲夏卽景

石榴明媚傍雕闌。無處尋芳悶眼看。粉蝶翩翩翔未下。豈知忽地被蜂殘。

俞 江字文濤邑廩生住蔣村

偶感二絕

無論如何總是空。奚須矯造作西東。可憐一種浮游子。富貴臨時認主翁。當年無限英雄志。貧病纏綿盡折磨。敢說黃金心不動。多財同我悔蹉跎。

曹駿良字馴夫邑附貢生官通判有紫蕙山房詩鈔

按劇夫柳溪春泛圖詩自註云予
家世居柳溪錄其詩從其志也

自題柳溪春泛圖

鎮日東風吹作西。油油春漲自平堤。去年晴霽今年雨。一樣千條綠到溪。
擬向煙波老此生。遠山杳靄水澄清。詩筒畫稿吾家事。載酒江鄉自在行。
綠楊深處自成邨。猶有殘碑世業存。遙指石橋南畔路。一泓流水繞庵門。

庵勺軒
公建焉

橋係成化三年愚
樂公建南有靈水

隱隱青山繞郭青。沿村牧笛儘堪聽。布帆無恙常來往。不載詩瓢載酒瓶。
石馬灘前有舊居。六年烽火渺愁予。而今新葺三椽好。擬種垂楊繞敵廬。
澹泊從來最耐思。偶煩圖繪乞新詩。漁樵舊侶燈前話。恰是菜花香滿時。

春望

三日不復陰。微寒已漸退。清晨啓柴扉。浮屠遙相對。振衣聊散步。和風真堪愛。日暖花柳舒。
鳥聲如此碎。生意滿郊垌。迎眸一周際。小立水邊村。白雲起靉靄。

行舟

綠水盪行舟。隄柳剛飛絮。一幅挂輕蒲。檣燕自來去。

題顧紫珊耕煙圖

顧子與我締交二十年。城南獨占一角天。冷吟閒醉互相逐。出圖索我題耕煙。耕煙圖爲九如作。

范君九如繪圖

山靄林霏殊不惡。圖中著君亦甚宜。利鎖名韁不能縛。江南曾草插羽書。長安

復偕計吏車。看場傀儡果何物。擺脫乃就城南居。故交張

少泉吳篋

相傲狎煙墨。馳使互相壓

硯田對壑。卜秋成鄙人亦有隨身之錡。不能耕但能栽花繞圃。生花時與子同一醉。更從花下展楸枰。局罷論襟愛閒逸。圖中瑤草如鍼密。放膽呼龍龍不來。媿非長爪郎君筆。

煙雨樓遇雨

行舟逶迤到清潯。來看鴛湖浩蕩春。一派滄浪通鶴渚。萬家樓閣失魚鱗。陋非崔郾休攜屐。塾效林宗且折巾。閒步小亭商渚茗。蕭然遠思出風塵。

獲家書

盼煞平安報。披衣睡起初。睽違二千里。珍重幾行書。旅夢前宵穩。燈花昨夜舒。呼僮沽白酒。卽此一軒渠。

辛巳冬日得黃丹秋盤字韻橫幅寫作俱佳效鑿次韻
頗念香山八節灘。媿無佳句備詞壇。琴尊欲遂前塵杳。機械都忘世局寬。險韻不愁蛇足贅。
中鋒合借鼠鬚看。寒宵添得吟哦趣。如共棊聲響玉盤。

袁汝錫字湛存號稚松召齡子歲貢生有悟生叢草

秋葵

新雨初晴展嫩黃。不隨時卉鬪芬芳。秋風託伴疏籬下。雅合輕盈淺淡妝。

秋棠

薄陰輕蔭絢新栽。遶砌沿階綠襯苔。幾日小窗疏雨後。粉痕微露嫩紅腮。

秋槿

嫵娜柔條巧作籬。淡煙微雨長新枝。花開只合山家賞。高染輕紅綽有姿。

秋蘿

綠葉紛披薄靄天。綴來珠瓣最輕圓。剪裁恰趁天工力。古艷無香冷着煙。

野望

細雨灑林薄。落日揚明暉。晚晴景益佳。散步渾忘歸。綠野有餘潤。涼風動畫微。村舍起夕煙。斷岸留殘霏。野雉喜逾噪。向人故依依。迢遞入西園。俯仰還倚扉。縱觀澹衆慮。了與心無違。寄情且自得。此樂遙相推。

壬辰新秋徐學博漢涵客鶴歸來室同人集飲翌日錢茂才粹齋踵至以

詩見示書此奉和

快人天氣入秋涼。湖水平鋪匹練長。帆影乍迴停客舫。茶煙輕颺出僧房。徐熙有約曾留榻。錢起重來更舉觴。好會一時尋雅趣。綠波紅樹白雲鄉。怕惹塵氛每習禪。此生此地儘流連。俗懷似我真無賴。清福如公洵有緣。詩句欲驚鷗鷺侶。聲名應重鳳凰牋。閒來把酒尋常事。留住陽春年復年。

周文炳字梅伯號春霆詩子光緒丙子舉人宣統辛亥舉孝廉方正掌教魏塘書院住金庫浜

題吳作舟扣舷圖

平湖十里盪輕波。一舸飄然載酒過。別有吟情清絕處。壓船書畫米家多。

老去分干學釣徒。倩誰補寫水村圖。何當共載篷窗月。一曲從君乞鑑湖。

春季假館。凌溪一轉。瞬間已數閱月矣。此間雖樂久客。思歸臨別。書懷聊誌雪鴻之跡云爾。

華年轉眼幾蹉跎。草草勞人等擲梭。漫說達人能解脫。可憐老子已婆娑。安仁悼婦徒情切。伯道無兒奈命何。此後別來重到否。臨歧轉覺感懷多。

周文俊字彥臣禮子光緒壬午舉人

癸未七月次兒生。越十日赴樂清。在署恆思念之。十二月家書至。知其於十一月中殤矣。詩以悼之。

汝生始十日。我適往樂清。臨行囑汝母。切切願復情。慎汝眠與哺。毋使寒涼迎。在途十餘日。西月抵樂城。念汝不去心。靜對燈一檠。餓索懷中乳。呱呱想啼聲。屈指百日近。繡綉拜長庚。明年我倘歸。燦燦撫雙英。入門不識父。惺惺聆母擎。此時最足樂。至願慰生平。何期願不遂。曇花偶一呈。家書閱未竟。淚落魂爲驚。汝豈命止此身等。蜉蝣輕抑或我德薄致。汝殤其身。嗚呼遭此變。余心如煎烹。安得汝再來。鹿床弄瑤瓊。

樂城懷陸幹甫廷楨二律

道遠魚書音信聞。故鄉朋輩感離羣。柳湖塔挂波心月。雪漾帆飛樹杪雲。最妙圍棋千局共。那堪別酒一杯分。每懷舊雨知何處。西望山光下夕曛。

吳下才名冠妙齡。論文卓卓久心銘。家藏甫里書千卷。地闢鏡湖花一庭。蕉葉醉餘嘲水部。霜芽煮就補茶經。君性嗜茶何當共話西窗下。坐對檐前月半檣。

丙戌下第出都六月望溫州省親幹甫以詩送行次韻報之

行裝纔卸又從征。鞍馬舟車老此生。北薊皇都邀露湛。東甌蠻市雜濤聲。慚無宗慤長風志。且盡胡威省父情。最憶君時在何處。徐家巷口夕陽晴。

憶內

作客頻年百感生。寒燈剔盡夜三更。卿開鏡匣愁懷集。我聽砧聲別緒縈。鷹隼摩空新雨霽。鷓鴣啼樹夕陽明。更多一事傷心處。雛燕始生翼未成。獨坐蕭齋悵寂寥。江南風雪夜迢迢。繡鴛衾暖憐余冷。寶鴨香濃怯自燒。射策方膺賢士選。讀書終望聖恩邀。教卿此日孤眠慣。不怨他年事早朝。

沈汝雄字子飛邑諸生

自慨

門庭若市託生涯。醫業家傳普濟懷。讀罷湯頭藥性賦。夜深明月入空齋。
沈汝豪字俠夫汝雄弟

自題杏林賣藥圖

買藥先生何處家。騎驢老鐵託生涯。世人要問神仙宅。笑指深林紅杏花。
春入山邨處處花。艷粧旖旎襯流霞。笑他踏遍天涯路。紅杏當門有幾家。

丁清藩字介夫歲貢生住虹霓殿港

介夫晚好吟咏與余時有倡和之作曾出示清遠軒詩集抄本其宗邁祖昌祖及應谷全稿在焉迨亡後訪之已失遺稿亦散佚殆盡此二首由袁君益清寄來是亡前一月之作也偶然感舊曷禁泫然

寄贈袁益清

市隱如君大可師。分湖日近水漣漪。好憑炎帝千方藥。熟讀周公七月詩。此外營求無別事。箇中甘苦有誰知。吾儒豈爲蠅頭利。惜避乾坤變幻時。

五十年華一夢醒。俗儒大半誤青衿。羨君耕讀承先業。媿我癡聾守舊經。墓木已拱成老朽。
泮芹同采記芳齡。壬辰與君同遊泮水如今怕臥仙家枕。祇服仙家朮與苓。

朱耀祖字仲平長洲諸生遷住北要浜

題金研夫美人圖

月明風靜可憐宵。環珮珊珊應步搖。行到中庭秋意逗。花陰深處學吹簫。
寫生舊譜忽翻新。背倚闌干不轉身。惆悵花容難一見。空教幾度喚眞眞。
曉起提筐翠陌過。纈絲未就采桑多。怪他鎮日薰香坐。正試春衫翦薄羅。
草薰花艷攪成圍。一路春風動畫衣。欲拂輕紈還斂手。恐驚蝴蝶破雙飛。

題介甫折桂小影

金粟香飄八月時。花陰深處石床支。知君別有清高想。不數鄰家桂一枝。
前生嵒合是吳剛。斫取高枝入手長。謫向凡塵仙骨在。袖中猶惹桂花香。

東溪

門前春水綠於苔。白板雙扉鎖不開。消息殷勤向誰語。等他語燕出牆來。

袁祖延字蔚雲汝錫子邑諸生

秋夜宿陶冶庵

蘆荻蕭蕭絡緯鳴。分湖一角夜三更。多情只有庵前月。照遍天涯一樣明。
周啓賢字愛生號藹蓀文炳子邑優廩生

題蘇小墓

六代江山贖美人。一環憑弔更傷神。黃金難買骷髏笑。綠草空餘荒塚春。
周啓揆字福和號惠疇文俊子邑廩生

宮怨

絞綃滴淚淚流紅。懶畫蛾眉錦帳籠。午睡醒時斜倚枕。玉階寂寞落秋桐。
星斗橫斜月影沈。苔階小立露華侵。那知命薄難承寵。枉費長門買賦金。
閨怨

堦前月色淡於霜。欲搗征衣寄遠鄉。料得玉關寒更甚。吳綿織手爲親裝。
玉臂添寒知露重。家書和淚背君開。在君固是長征慣。奈妾何曾獨睡來。

坐月懷蔚雲坦君與李仲平分韻得觴字

塵寰小劫值紅羊。萬種愁懷付酒觴。巷裏賞秋嫌客少。柳梢挂月忘更長。人來錦水聯詩會。舟漾分溪失醉鄉。往歲中秋與兩君泛月分湖塔下鳴蛩聲斷續。叫殘清夢費猜量。

許馥荃字第花邑諸生後遷善城

壽陸鷗安六十和原韻六首

光陰如駛屢經過。六十年中閱歷多。澹泊於今真澹泊。蹉跎以後復蹉跎。江山搖落長如此。親友蕭疏可奈何。我自柳溪移武水。故鄉處處有吟窩。

先生高誼本完人。偶向桃源學避秦。分水縱無邱壑趣。蘆川好與鷺鷗親。有懷自寫堪稱傳。欲見緣慳未得因。越角吳根游釣處。悠悠林下倍怡神。

襟懷風月若忘情。名利而今肯息爭。爽氣應從何處健。新詩慣作不平鳴。有聲花木秋逾壯。無月樓台夜轉明。分付江南老居士。焚香讀畫葆長生。

楓落吳江興獨高。何年海上走風濤。未來消息渾如夢。過去年華亦足豪。且向箇中得真趣。聊從世外學名逃。分湖自古多佳景。雨笠煙蓑樂且陶。

世上浮名好冷腸。天寒猶著薄羅裳。句成假年學易談何易。飲酒吟詩閒裏忙。蓬島神仙原夢幻。雲山松柏幾星霜。遙飛一盞爲公壽。詞不求工過便忘。

老輩典型經術深。詩筒郵寄自成音。挑燈樂得禪中趣。攜杖來尋柳外吟。明月照人渾似畫。清風滿榻貴如金。放翁詩句松陵夢。左右銘之可作箴。

題戴鐵髻蘇台花影集放翁句

錦城一覺繁華夢。懶著青鞋上若耶。追憶舊遊愁滿眼。捲簾片片散飛花。

集龔定庵句再題

文人珠玉女兒喉。過日煙雲浩不收。安頓惜花心事處。東南一部小陽秋。娛情快意寫文章。翠墨淋漓繭紙香。撐住南東金粉氣。齒如編貝漢東方。

題鐵髻憶舊遊草 三首選一

春庚秋蟀歲時流。愉快前塵憶舊遊。鴻雪好尋名勝迹。鶯花曾遣寓公愁。江山攬轡悲今昔。瀛海題襟感去留。我欲葫蘆依樣畫。愧無佳句一囊收。

蘇明善字臨深號小髻布衣有小髻吟稿

同芷畦光福探梅歸遊吳門作

虎阜尋春去。獅林訪古來。詩人今有伴。一櫂赴蘇台。隨游間曳杖。聯句共銜杯。笑指寒山寺。

騎驢定幾回。

時與芷畦騎驢至寒山寺

探梅鄧尉道上似芷畦

石壁石樓遊已倦。聖因寺內又經過。探梅道上人千萬。如我題詩有幾何。

七句元旦有感

人皆怕死我嫌生。忽忽殘年七十春。晚景頽唐無樂趣。不過隨例過光陰。

寄芷畦上海

菊花開後嶺梅開。海上詩人尙未回。憔悴老人穿望眼。高吟無伴待君來。

自題竹杖

問水尋山力不支。晚年全仗此君持。杖頭怕見如臬鳥。不欲雕鳩欲刻詩。

絕命辭屬諸兒

友來吊唁無須哭。如在生前讀我詩。若遇老年同志者。要將佳句誦他知。

蘇明新字嘯山明善弟邑諸生

哭汝生人玉四絕

曾作君家童子師。亭亭玉樹挺三枝。扶筇花外書聲聽。最少原來亦最奇。
小徒偶抱采薪憂。瘡鬼相纏疾不瘳。果有輪迴能再世。試伊可認玉環不。
令子天亡心固酸。俚言相勸壯懷寬。縱無雛鳳啼聲試。儘有祥麟繞膝歡。
膝下依依少一孩。喪明未免過於哀。文孫轉瞬堪娛老。三世同堂福又來。

秦炳漢字吉人號詰丞邑諸生大學畢業法科舉人入民國舉省議會副議長

夏日將之江南蒙介甫芷畦設餞水月庵卽席賦謝

浩蕩泛孤舟。同爲水月遊。湖山餘勝迹。詩酒話風流。竹葉金尊醉。梅花玉笛秋。伊蒲叨盛饌。
盡日一勾留。

桑梓情何重。殷勤餞我行。水流月長在。詩句酒催成。本以爲貧仕。難忘送別情。江南咫尺近。
此去聽歌聲。

題李貞女生傳

恨海難教精衛填。冰霜歷盡歎華顛。枯心不作波瀾起。勁節真同松柏堅。司馬文章明大義。烏龍山色遺餘年。他時瑤管修彤史。貞孝煌煌萬口傳。

蘇君璋字杏南住市北有小眉山吟稿

漁婦詞

年年泛宅又浮家。鼓枻收綸事水涯。曉起梳粧波作鏡。鬢邊斜插水菱花。

答芷畦

頻年音問隔雲泥。使我空懷水柳西。不是故人書斷絕。只因才不敵濂溪。愧我無詩俗若何。蒙君惠贈竹枝歌。清詞麗句層層見。勝得明珠萬斛多。獨冠騷壇話不虛。奇才磊落有誰如。讀將三洗薔薇露。好作昌黎寄友書。

過叔平書室見丹桂正開感而賦此

新黃老翠入煙空。小院深深罨畫同。風過天香生筆研。月來秋影瀉簾櫳。十年老幹強能立。一點丹心暗自通。珍重一枝應記取。願君翺步到蟾宮。

七夕

今夕風光竟若何。癡看牛女渡銀河。天孫本是無多巧。試乞人間巧更多。

落葉

落葉知何處。空階滴雨所。同是報秋來。帶風自相語。

秦炳奎字偉人炳漢弟中學畢業會長正誼小學校

題芷畦柳溪竹枝詞

柳溪昔日釣遊地。舉目湖山風景多。譜出竹枝詞一卷。某山某水盡搜羅。駟橋唱過樂陶陶。鐵笛吹殘月影高。漫說陸宣成絕調。汾南今亦有詩豪。

原书空白页

柳溪詩徵卷五 僑寓

嘉善周 斌志頤輯

楊維禎字廉夫號鐵厓道人會稽人元泰定間進士明洪武徵召至京旋放還
曾遊寓分湖有鐵厓集

按鐵厓嘗寓吳江顧氏雖遊分湖及陶莊所寓似不在浙界惟嘉善縣志收入寓賢因仍其舊

陶莊

村落成行市井連。日中雲集自年年。刀錐有利圖衣食。貿易無人索稅錢。漁鼓畫橋楊柳外。酒旗茆店杏花前。陶家義塾相聞近。教子何須孟母傳。

圓覺禪院

圓覺招提隔市喧。潮音滿座自晨昏。雨來寶地天香匝。風動珠林貝葉翻。供養奇花憑白鹿。齋分珍果仗玄猿。從今結却東林社。淨土修持禮法門。

遊淨池

在陶莊鎮前一統志載不生雜草故名

分水南頭第幾灣。淨池初曉鏡光寒。漁舟曬網日將出。酒肆招帘露未乾。楊柳淡煙迷隔浦。桃花新水漫前灘。習家回首今何在。風物爭如此地看。

遊分湖分得武字

有序

至正九年三月十又六日吳江顧君遜招客遊分湖客凡七人會稽楊維禎甫里陸宣大梁程翼金陵孫煥雲間王佐吳郡陸恆汝南殷奎妓二人珠簾金粟也出武陵溪過伍子灘詣陸氏翠岩亭觀百歲棠出鐵蓬一枝云江南後唐物也予爲清江引一弄抵柳溪飲鮑氏池亭過瀛橋遂步月歸用主人武陵溪上花如錦之句分韻賦詩時期而勿至者茅山張君雨界溪顧君瑛也

盪舟武陵溪朝出伍子浦還過西陸家。仙童啓巖戶棠樹大十圍。桃花燦欲語遺我古鐵枝。色比修月斧爲作古江調。江鳥凌亂舞攜之。謁龍君湖水吹暮雨。晚飲花石岡亭臺已無主。瀛橋步月歸竹枝和銅鼓。道人早歸來脫冠掛玄武。

贈薛如鑑

銅之鑑僅以見妍媸不若書之鑑可以見是非又不若人之爲鑑可以見善惡之端禍福之

機河東薛相士自稱老鑑師一雙神瞳秋水碧三寸長舌霹靂飛曾相水邊遺嬰作貴子道上擔丁爲富兒前年山東睡漢是龍虎今年雁山處士非能罷談言一一中予奪無依違見子勸以孝見父勸以慈見臣勸以忠藻鑑道如此頗近古教規鐵笛道人學讀書與詩誤蒙進士賜緋衣龍門上客一日速十年不調官何遲吳門相見談出處許我再覲黃金墀我心自鑑復自斷子卿唐舉毋容知醉來吹笛客且去天青月在梨花枝

錢士升字抑之號御冷又號塞庵晚稱息園老人邑人明萬曆丙辰狀元官至東閣大學士有賜餘堂集

按邑志積翠庵是錢相國別墅庵在蔣村界屬柳溪

五君詠

魏給諫

孔時秉介性卓卓雞羣鶴搖筆挾風霜勵志在溝壑剛腸病貪夫冷面絕請託峭潔衆所讎形影了無怍

高總憲

吾師子高子繹聖傳宗旨研幾析毫芒靜坐觀無始德輝藹春陽心境湛秋水形解何超然
虛空起滅爾

周主事

蓼洲好奇節衝口不能咽意氣死生輕怒罵齷齪決捐軀得所求長嘯浩然別莫邪固所權
光焰耿不滅

楊副院

應山挺勁骨箴仕勵冰蘖矯矯出風塵謇謇居禁掖三朝戴國恩一疏褫姦魄惜哉蚤發機
血肉悲狼藉

李御史

仲達風雅士弱冠致青雲夙稟燁霞姿自攜冰雪文佩囊立蟠陛摩空逐雀羣一朝剝落盡
蕙草嘆芝焚。

病中示菜兒

海內幾人稱碩果眼中年少半藏舟衰翁皮袋徒相苦藥物何須強挽留。

魏大中字孔時號廓園邑人萬曆丙辰進士官行人擢工科給事中遷吏科都給事中贈太常卿諡忠節有藏密齋集

按先生自撰年譜有萬曆六年隨先都諫授蒙於陶之凌卷十九年又從先都諫徙館於陶之凌卷二十一年仍館於陶云云陶卽陶莊爲柳溪之通稱

乙丑夏五二十五日宿奉聖禪院用辛酉舊題韻

題墨當年愧碧紗。重過今日鬢生華。天心如此人誰料。臣罪伊何願敢奢。果不鑒臨惟有死。縱然歸去已無家。能垂勺露寬於海。好好朝霞與晚霞。

姚孟長以文于二祠詩見投感而有賦

年來踪跡愧簪冠。握手西風爲一彈。正以憂時圖洒血。那堪吊古頌流丹。間關海陸徵求急。咫尺雲霄伏謁難。朝列異同何日定。愴懷不獨是三韓。

簡姚孟長

落落窮年鬢髮新。嚶嚶鳴鳥又逢春。愁無道韻能游世。幸傍時名好問人。正氣只今誰領袖。偏才應許荷陶甄。乾坤知有匡扶手。自抱漁竿愜隱淪。

漂母祠

偶然一飯在塵埃。誤却千年過客來。滿地江湖尋漂母。王孫如此更堪哀。

壁立齋歌

酌酒勸君君開懷。聽我歌君壁立齋。男兒志氣會有極。壁立不立休偏側。吾無四壁賃人住。晦明風雨雜雲霧。主人其中弄兩丸。周遊太極環無端。吁嗟兒女七筋絲。東啼西號驅出門。長途奔走事衣食。自論夙昔非所存。旋已作書報妻子。前途滯壑朝朝是。丈夫此語非不祥。殷勤自護生。晶光病婦小瘡且。續緝大兒負薪小。拊拾拂天雙袖長。風吹歸乎未歸難。與期歸來解囊出。乾肺四壁笑人羞。欲死君齋壁立無安排。酌酒勸君君開懷。

廷試退朝感事

屯田策罷下彤墀。柳暖花晴正午時。北闕舉頭天穆穆。西山當面日遲遲。龍驚無首疑難定。
會榜無元人有同心未可知。欲倩東風頌芳訊。殷勤蘭谷爲嘯吹。

送瞿起田還海虞兼呈魏仲雪

此身歸未得。歸人何蹉蹉。七月送仲雪。九月送起田。一路秋柳中。舞葉相便娟。及家稻新熟。蟹肥螯如拳。親故了逢迎。仲雪來周旋。汎濫今日事。上下古人編。局倒無一成。方寸爲之權。

而我亦何爲踽踽徒自憐。滯此會須歸。歸意未可傳。

泰山

大塊擘巨靈。屹然天之東。茲來罄所慕。造化真奇雄。一步一停矚。千變相迎逢。迴馬轉黃峴。雨雪如霏氈。風吼衆壑動。奔噬驅羣龍。新盤上百仞。舉膝搥其胸。天昏磴道滑。努力還沐衷。藉茅暫一憩。翹首扶桑紅。駿鬣霽色除。末繇展瞳矚。躡冰尋絕頂。冥焉與天通。雲霧滂且鬱。播物施神功。身在最高處。乃入混沌中。千紅與萬紫。一氣歸鴻濛。意者茲山靈。隱然牖其蒙。不在覽萬象。還當遊無窮。虞巡揆孔登。此脈將無同。

茅擔小詠

六首之一

借得茅檐住。低低不埽除。星寒知怯鼠。春漲欲通魚。一徑野籬密。半牆秋草疎。雨餘添薜暈。曲曲作蟲書。

出都留別諸君子

豈有書生面。難將赭似酡。遮藏圖學繭。引閉擬爲螺。亦念君恩重。其如物態何。安危君等在。余意已煙蘿。

阻雨上封有述

萬壑千岩幾寺門。上封西叩祝融君。江連楚粵星河落。峯簇芙蓉火德分。游並真人曾霽雪。到憐遷客爲開雲。慚余聽雨衡山頂。風穴雷池併作昏。

淚盡

淚盡不歸去。慈親近若何。風塵游子髻。霜雪故園蘿。凍井牽晨汲。寒床度夜哦。白頭無一婢。春杵伴機梭。

春四日新霽經伍子塘

節物驚今日。江山感昔朝。莎晴春自碧。風暖浪還驕。雨雪長年積。煙花故苑消。英雄千古恨。倚棹欲無聊。

登胥山

孤邨水落暮潮低。春盡青山屐藹萋。埜鹿自逢煙草外。松濤斜引海雲西。乾坤此日憐杯酒。吳越當年入鼓鼙。抉目到今懸積恨。詩成小字不須題。

自笑

自笑畏譏也有無可奈何而安之意焉

自笑迂疎懶不成。惹將沙口影常腥。幾番見說頭堪白。何處相逢眼有青。只合此生供世話。那能到死悔吾醒。楊花慣解漫天起。水自泠泠花自萍。

壽李母八十

李郎別予徵予詩。阿母爲父兼爲師。及家拜母母八袞。欲踰進之青霞卮。鶴髮醅顏金鳳翹。膝前爛綵紛飄飄。颯屬翁姥爭歎息。熊丸荻畫還今朝。阿母停觴徵啓齒。兒當所爲未止此。東家有子餘栝捲。西家有子無甘旨。安得壽域開八荒。兒行持以獻天子。

徐石麒字虞求號寶摩嘉興人天啓壬戌進士官吏部尙書殉難有可經堂集

按虞求先生明清之際曾避
跡水月庵見沈湛貽安錄

去國

放臣久矣欲歸田。何事臨歧倍黯然。自恨虛糜孤雨露。沉經滿眼足戈鋌。鐘聲出寺疑宮漏。花氣侵衣憶御烟。白首窮途無一事。日依北斗誦堯天。

遙望家園

一片寒烟捧魏城。浮屠懸映日華明。重重雲樹藏予室。想有啼禽依舊情。

陳子龍字臥子一字人中松江人崇禎丁丑進士官兵科給事中殉難有湘真

閣詩稿

按王澐陳臥子年譜先生會居陶莊之水月庵託名瓢粟

避地示勝時

江潭愁鼓柁。滄海憶乘桴。此處同攜手。何人可借軀。亂離忘歲月。飄泊憶妻孥。莫作窮途慟。乾坤定有無。

計拙存謀野。時危適遯荒。友人憐豫讓。女子識韓康。周鼎無消息。秦灰正渺茫。冥鴻天路隘。何處共翱翔。

故物經時盡。殊方逐態新。恨無千日酒。眞負百年身。芝草終榮漢。桃花解避秦。寥寥湖海意。天地一遺民。

跼蹐三年內。蕭條一慨中。刺船排急難。贈策想雄風。北海孫賓石。東吳臯伯通。北來還寂寞。此義有誰同。

蘆中誰可託。土室更難期。歲月歸三歎。關河動五噫。馬遷違大雅。箕子得明夷。禮樂終千櫓。窮愁亦我師。

力窮支大廈。時異謝高墉。未遇夷門老。還從石戶農。朱紘悲匪兇。玄牝愧猶龍。淚盡人間世。天涯何處逢。

張 采字受先太倉州人崇禎戊辰進士除臨川知縣升補禮部主事有知畏堂集

按王濬陳臥子年譜臥子在陶莊之水月庵託爲浮屠同避地者婁東張受先先生也

九月同子常東郊卽事

郊行尋野勝。秋遠菊花天。溝曲初移逕。溪深好放船。冷楓當岸落。高柳隔籬穿。試共登樓望。寒城起暮烟。

父丹生初名京字彤貫號山夫邑人明諸生有貫齋集

按松陵詩徵山夫攜其配陸觀蓮子訥女默寓居蔣湖三年蔣湖卽蔣家漾境屬柳溪故錄之

吳江觀倪文正公贈徐忠襄公書畫箴幃子作歌留贈計生 并序

甲申之變詞林倪文正公元璠官戶部尙書自縊於京邸徐忠襄公石麒以司寇里居不及於難南都肇位拜吏部尙書與政府不合三疏乞骸骨去乙酉禾中師起北師平禾城陷公自縊於私第時文正公子適來禾中握一筮授客計生庚子夏五丹生過計生齋中見書畫筮童子時數數見之可識也二公天啓二年進士出朱文恪公門下是科得人最盛二公外先後死國者宜興盧公象昇海鹽吳公麟徵山陰祁公彪佳東陽張公國維漳浦黃公道周如皋李公之椿皆灼灼在人耳目倪公雅精繪事兼工草蟲花鳥此畫山水書五日集同年觀競渡詩云各出辭兵符一道散爲續命縷千絲亦近於詩讖也計生名東吳江人

君不見天啓壬戌稱得士我鄉相公典會試

謂朱文恪也

南金竹箭羅羣英威鳳祥麟照青史又

不見上虞才子倪司徒嘉善名卿徐寶摩一從軒轅歸鼎湖一望重華泣蒼梧平台憶召瀛洲客出領度支文章伯江左安危倚冢宰中朝尙有山公在三月拂衣歸南州鴛鴦湖水空悠悠編裝素甲起州城瞿然請入共籌兵邯鄲圍急銳兵至云是翩翩魏公子倉卒難分秦魏軍一握兵符付與君計至今便面入君手萋弘碧血藏懷袖玉堂點染雲煙善並馬聯鑣

曲江讌五月五日追勝遊同年同邸長相見構李夫椒事渺茫青綾一幅懸君堂可憐四萬
陳陶盡野老年年枉斷腸

湯豹處畫水歌

米公畫山得山骨五百年來紙猶濕米公畫山不畫山晴天雨天堆煙鬢湯子畫水亦如此
十日五指袖忽然倒峽與奔流寫出澄江對窗几畫濤畫雪兼畫冰低頭聽之聲泠泠
古來多少餐霞客誤落塵中人不識湯家水米家山只在虛無縹緲間說與世人皆大笑五
百年來稱二妙

補胡白叔稅婦行

自註崇禎辛巳年事時左御史光先按浙經此講
章上劾白叔有稅婦行亡去顧茂倫屬予補作

關門使者眈如虎張吻磨牙踞河滸蕪關稅貨不稅船吳關稅船復稅貨關門開婦女過豺
狼餓充舖脯朝廷縱使急丁錢關門何爲樵口賦中原窮盜已如毛不惜誅求到寡婦樓船
來簇簫鼓中有使者經關門白簡霜威騰露布船中使者氣如龍關門使者色如土吳郡山
人胡白叔年老窮愁雙目瞽耳聞此事眞眼見手製新詞傳樂府至今相去三十年樂句飄

零落何所雪灘釣。叟命我爲補亡歌。向關門淚如雨。

吳門同顧有孝訪江右陳允衡往維揚不遇

之子廣陵去。春江潮欲平。我來吳市上。獨與故人行。古巷看疏柳。津亭聽暮鶯。歸舟望不極。惟有權歌聲。

越州懷顧有孝

著書江畔自婆娑。雙髻星星奈若何。貧賤才名懸日月。死生交道任風波。孔融愛客開尊待。徐穉逃名下榻多。鏡水雲門題詠徧。知君此地舊經過。

春日登虎丘有感同朱茂昉趙溧吳鏞作

重到生公舊講台。台邊殘碣臥蒼苔。西山樓閣雲中起。五夜笙歌石上來。短簿有祠終寂寞。眞娘無墓獨徘徊。日斜倚棹煙光薄。林下提壺向客催。

答兒訥迎歸南軒韻

汝來迎我看黃花。道出吳淞江路斜。隱隱鐘聲聞隔浦。疏疏林影見歸鴉。早知多病原無藥。何用消愁定有家。晚歲回思身計錯。自增心累雪霜加。

歸舍有感

一春到處看山好。四月歸來住水邨。新綠滿庭飛燕子。不須惆悵自消魂。

及 訥字安世一字木齋丹生子

侍家大人春日登峴山

吳興風景勝襄陽。遊子驅車上草堂。遠岫參差連碧漢。高亭縹緲倚寒塘。巖邊落日晴沙迥。樹裏啼鶯驛路長。聞道此中堪極目。自憐扶持得迴翔。

朱彝尊字錫鬯號竹垞一號金風亭長秀水人清康熙己未鴻博授檢討官至

日講起居注有曝書亭集

按曝書亭年譜順治二年夏先生父安度先生避兵夏墓蕩九月本生母唐孺人病終丙舍先生奔赴三年歸留馮村是竹垞曾隨寓於夏墓蕩也

村舍二首

村舍朱牛感遇作也生年十七爲贅壻避兵五兒子橋

村舍有牛宮架以曲尺木特牯盈四三戀此共泥伏牧童驅使行跨之上原陸日夕齊下來各自舐其犢吾生命不辰早歲去邦族父母謂他人安敢望拊畜吁嗟犢不如寢訛從所欲

村舍有雞柵樹近蓬門樞。曉日披其樊。一雌將衆雞。村嫗導之前。握粟呼朱朱。當前或更却。母啄子必俱。吾生早離家。南北忽相踰。父母謂他人。衆中益羈孤。吁嗟雞不若。骨肉常相須。

夏墓蕩

夏墓蕩前停釣綸。荒溝極浦易迷津。夕陽滿地北風起。飛徧蘆花不見人。干戈靜處見漁師。羨爾花源信所之。豈意又魚艇子集。殺機不異銳頭兒。

過丘生

丘生避地夏湖曲。獨伴流泉結書屋。茅柴酒薄酬故人。破甌夜燒風折木。

贈若耶小史爲葉星期作

畫舸乘風一葉輕。紅亭相送客相迎。最憐小史如初日。不動離筵到五更。

鱸魚同魏坤作

水面曾排赤馬船。纖鱗巨口笑爭牽。吳娘不怕香裙濕。切作銀花鱠可憐。微霜一夜柳湖東。楊柳絲黃兩岸風。不信輕舟往來疾。筠籃驗取四鰓紅。已脫朝衫分卜耕。劇憐鄉味算歸程。秋風彈指今年誤。輸與江東老步兵。

翠網千絲白玉跳。蜀薑鏤切韭新苗。背篷圓笠平生慣。準擬抽帆第四橋。
爲魏上舍坤題水村圖二首

鷗波亭子趙王孫。曾爲錢郎畫水村。過眼雲烟難再覩。披圖髣髴筆蹤存。
斜插魚標颺酒旗。柳陰小犬吠笆籬。歸田最是分湖好。我亦相期作釣師。
鴛鴦湖權歌

秋水尋常沒釣磯。秋林隨意敞柴扉。八月田中黃雀啣。九月盤中黃雀肥。
百步橋南解纜初。香醪五木隔年儲。不須合路尋魚鮓。但向分湖問蟹胥。
爲魏上舍題水村第二圖二首

江鄉最好是分湖。紫蟹紅鰕雪色鱸。眯眼塵沙歸未得。倩人重寫水村圖。
綠蘋不礙板橋樁。紅葉空堆老樹腔。異日相過任風雨。抽帆直到讀書牕。

題竹垞壁

買斷竹垞將四載。園林新筍未經嘗。今來散帙時初夏。忽見抽梢喜欲狂。背市有人沽濁酒。
南鄰許我借匡牀。江村臥穩真堪樂。愁說燕雲射獵場。

葉 雙字星期一字已哇吳江葉家埭人天寥先生紹袁子邑籍康熙庚戌進

士官寶應知縣有二異草堂集

按錢佳遜溪詩鈔序有侍先相國於積翠庵先相國爲之改籍嘉善焉云云先相國卽息園老人錢士升爲天寥先生故交

採柳謠

去年采東鄉今年采西鄉東西兩鄉柳采之盡斧斨河隄決無時需掃如山岡高柳無遺槎
柳種纔成秧大府昨下檄催督肩相望境內柳色空越境有嚴防無已及他木槐榆楓櫟樟
違材式不程李難代桃僵百金縛一掃千夫提其綱投之滄海中厥聲逐沸湯河伯鼓赫怒
飄如馬脫韁哀哉累膏血一擲剜肉償何慮千百掃往往歸茫洋吾欲叩九關好生德之常
緬彼至治世大海無波揚

湖天霜

湖天湛然青盛夏飛嚴霜霜嚴結陰慘白日沉荒涼厲鬼啾啾鳴行路聞心傷埋冤爾爲何
毅魄非國殤生爲蚩蚩民安分柔且良眞盜失伏辜漁人惟禍殃殺人不抵死袖手反代償
有耳非不聞有眼詎失芒一人愛功名片語進斧斨斯邈矣三宥仁孰察五過章一朝四百指

駢首堆荒岡湖水自終古流恨徒湯湯寄語司牧者殺人宜慎詳

釣雪行爲顧茂倫作

昔人稱詩在驢背顧叟獨棹江南船叉手不揖千乘貴滿船風雪慣作緣髯鬢髻軀八尺倚船翻挂八尺帆荻花如雪雪如掌哦詩理釣心手閑意不釣魚只釣雪釣雪不用餌爲筌萬頃銀河千嶂玉一鈎釣出竿頭懸柔櫓數聲暝煙合叩枕思醉茫無錢顧叟顧叟詩名五十年昔時滿堂客高和斫地篇驢裘典盡脛不掩脫粟館去釜戛然等閒秋月春花夢老向江頭話歲寒

送王阮亭祭海還朝

使節天邊轉。韓碑讀罷還。挹泉臙主眷。探袖出民艱。飄沒依依樹。裝輕個個山。南枝留不住。高詠過重關。

同人夜坐康貽侄齋限人字

意外相逢是故人。衰顏燭影話重新。花殘幾易羅含宅。燕到重沾杜甫巾。無處避愁應擇地。有山送老不嫌貧。吾家二妙欣相慰。嬾向滄江再問津。

周 杭字祖望號湖干邑諸生原籍吳江曾寓分湖有湖干集

題倚劍牧馬圖

百金買一劍千金買一馬十年磨劍不得試驅馬歸來牧巖下憶昔錦衣狐白裘身挾兩龍
萬里遊爾時意氣輕王侯吁嗟丈夫有命那可說紫髯如虬悲白髮雄心難待馬生角袖手
應憐劍虛拔君不見古來窮達變化猶風雲南山尚有射虎手無人知是李將軍

沈大成字集元號瘦客邑廩生曾寓柳溪草堂有靜齋詩集

柳溪憶舊示新發

疏燈如明星耿耿照我床因之不能寐中夜起徬徨憶我在柳溪十載度春光小市入花竹
當墟耀明粧百壺取醞釀千金典鸕鷀一時發綺語四座驚清狂如何今年來鬱鬱守故鄉
對酒情不樂臨風心自傷遙想柳溪柳青眼遙相望何當尋舊侶一醉傾壺觴

春夜憶頻伽兼寄江庵

人生不滿百似夢天易旦信宜秉燭遊良夜樂清玩我年近三十鄉曲受羈絆自少慕相知
所往若冰炭江南郭林宗風流吾黨冠文字百年交星霜八載換意氣重別離心情託羽翰

去年罷秋闈。黃花開縵爛。君歸白下門。我客分湖畔。失路逢故人。悲歡一剖判。詩酒恣清狂。往復連晨旰。殘臘理歸裝。新年敍親串。既思出門行。潛居若逃竄。君約病徐熙。江顧我舟泊岸。新愁并舊愁。如冰遇風泮。詩人張渠齋與黃退庵。具酒佐芳讌。分韻復聯吟。擊賞頻拍案。雄談傾肺腑。逸興高雲漢。絲管太豪奢。肴紛凌亂何如。清雅集良會。人間罕投轄。君且留典衣。吾所願。離亭柳吹綿。別筵淚垂霰。轉眼悵風雲。片時忽流散。膏騰病眼中。好春去過半。有酒不同飲。有花不同看。遙知水村水。春至亦彌漫。耿耿一孤燈。終宵坐長歎。窗外子規啼。月落星辰燦。

舟過東湖

已綠東湖水。扁舟入畫圖。山光空外遠。塔影靜中孤。鷗鳥自出沒。夕陽明有無。煙波回首處。春色到平蕪。

寄懷秋士

不解愁來路。吟邊復酒邊。客中疏舊雨。病裏入新年。憐我踪無定。懷人夢有緣。遙知柳溪柳。多少別情牽。

哭江庵

渺渺分湖水。春來怕放船。故人成隔世。楊柳似當年。感逝添新淚。含辛檢舊編。孤魂招未得。或在小梅前。

去歲重陽節。移舟爲訪君。繩床扶病起。清話入宵分。往事休重說。泉台已不聞。數聲寒笛裏。燭淚亦紛紛。

林宗居獨近。孺子姓名聯。聞發吳江棹。旋回楚峽船。停雲捐舊恨。引紉悟前緣。飲恨無如我。生芻致隔年。

貧爾已如此。呼天欲奈何。論交憎命薄。到死悔情多。草草驚浮世。茫茫嘆逝波。有緣重見面。或者夢中過。

柳溪贈魏冬木丈

慷慨論交亦有年。東亭社裏識髯仙。別開生面驕時輩。幾費精心對昔賢。老去不須人勸飲。興來還與鬼談禪。指迷易得南針示。許我新詩寄一編。

柳溪草堂夜集卽示新發

寒煙疏柳問村居。苔滿空階積雨餘。舊侶不虛重九約。新詩多在菊花初。銀尊綠酒情何似。蘿屋昏燈夢不如。珍重良宵甚難得。殘更遠近小窗虛。

留別贈香楮並示秋士竹君

漸覺霜風作曉寒。匆匆又共一宵殘。行踪似我長無定。知己如君大是難。舊雨更教何日敘。新詩留向後人看。未成分手難先唱。猶是西樓下玉盤。

秋士以閨秀某所畫秋海棠見贈題二絕句

閒將沒骨效徐熙。想見粧台下筆時。可要更添雙蛺蝶。到傳神處費沉思。屏風六曲費周遮。小閣尤宜設畫叉。只恐近前看不得。海棠原是斷腸花。

正月十二日同退庵過訪頻伽齋時鐵門諸君已行矣即事得二首

楊柳如人草又芽。東風頗送好年華。偶逢熟客先相問。曾否主人今在家。未得前宵分片席。定知笑我有梅花。題詩報與羣公說。清夢南來路未賒。

一年一見豈無緣。何事相逢轉惘然。徐穉當年同下榻。王猷昨夜已回船。昏燈向曉渾如夢。新月窺窗未肯圓。明日離愁禁得否。分湖春水正連天。

魏塘竹枝 選一

分湖十里鏡光平。畫舫桃枝打槳迎。郎擷秀莚供客饌。妾調紫蟹作郎羹。

柳溪草堂與頻伽竺生江庵聯句四首 選二

二月垂楊亂似絲。瘦東風人到慰相思。頻花如夢裏春無幾。竺酒爲愁多醉不辭。江畫舫湘

簾游子路。瘦輕寒薄病女郎詩。頻今宵真個團團坐。竺猶怕燈殘夢破時。江

晚同仙侶好攜舟。頻燕尾波痕一棹流。竺又見落花知舊路。江且傾杯酒話新愁。瘦海棠庭

院懨懨病。頻碧玉簫聲夜夜樓。竺剩有長堤芳草綠。江春陽最好踏青遊。瘦

王炳裕字靜岐邑之西塘人諸生曾寓蕭家圩

題朱節母葉太孺人遺像

婺源家世著清芬。常得徽音巾幗聞。終古完人名節在。皎如海月淨如雲。
煌煌旌額令人看。門第清來並義桓。畢竟賜金虛此日。任他擯擋事艱難。
萊班剛喜舞萱階。玉鏡台空塵漸埋。要識白頭甘自訣。却關同穴舊情懷。

查奕照字麗中號丙唐官至通判曾寓北要浜沈氏有東望閣詩鈔

乾隆癸未前邑侯梁恒齋徵修築圩岸圖陳湘波屬題

前癸未後癸未六十年來失水利四塘三泖積淤沙一雨半年成地肺

道光三年一雨數月四鄉盡淹

其時

我邑道殣多長堤曲沼皆盈科縣官赤脚下鄉去鴻嗷遍野啼層波私捐官賑十三萬

大賑七萬

有奇合邑公捐六萬餘兩又施粥米三千餘石民氣始蘇

浹歲方能弭大患卽今年穀屨不登蒿日時艱增永歎梁侯梁

侯肯重農閱世之後思侯功陳君好義復好古披圖使我心忡忡

袁簡齋先生寄題東望閣圖卽謝以詩

大河方前橫從天下注地一瀉貫百川何論淮與泗汝古得精奧讀書了大義發爲洪鐘音
畢天下能事徐庾作奴隸柳韓供指臂文章寫性情經史抉訾議讀者盡失色作者實遊戲
儒林與文苑問誰能位置

高論軼漢魏次亦步李杜此皆前人言攬拾供揮塵處處有性靈何必立門戶公才通造化
落筆總千古籀籀破羣儒音響振聾瞽大哉風騷主公其振天斧

入寺不佞佛入山不學仙出處任所之萬事皆隨緣休官築別墅六朝貯雲煙隨園花木多
亦各全其天扶筇上山椒縮地至海邊詩文奇妙處時時吐青蓮始知仙與佛公身早兼焉

丁大椿字頤庵邑人嘉慶癸酉舉人曾寓北要浜有凝香室剩稿

題竹溪夢鷗閣

世事何妨任去留。面溪小閣等漁舟。臥聽風起蘆花急。夢醒江南一段秋。
羨君盟與白鷗堅。何日尋君煙水邊。生怕白鷗來笑我。紅塵馳逐十餘年。

陸母朱太君六十壽詩

桂萼英杼八月天。瑤池青鳥舞蹁躑。宜男草蔭娑婆樹。婺女星輝玳瑁筵。松柏凌霜節日勁。
芝蘭映日色彌鮮。稱觴共奏霓裳曲。待熟蟠桃歲幾千。

壽香涓六十辰

算周甲子未華顛。壯歲浮名一笑捐。同社共推君絕學。論交偏與我忘年。水村小隱三椽屋。
門外秋成數頃田。酒喜甕頭芻正熟。不須重掛杖頭錢。
客歲登高步後塵。而今又慶設弧辰。最難九日無風雨。定卜千秋屬老人。天上雙星兼婺朗。
膝前二美捧觴親。讀書努力須年少。冀博高堂含笑頻。

題魏忠節公遺像

忠孝千年事。尤難萃一門。貞心堅鐵石。大義立乾坤。笏抗批鱗氣。衣留迸血痕。披圖瞻像廡。浩氣至今存。

汪如藩字復如秀水諸生曾寓柳溪

題袁二恬水邨圖

煙景蒼茫水國秋。一村葭白晚霜稠。佇看鶴影舟邊掠。較勝髯翁赤壁游。

閒意

短夢初回酒漸醒。斜陽正射小牕櫺。年來消盡功名計。除却吟詩筆總停。

將赴省試

桂花香裏動輕愁。躑躅功名記昨秋。只爲西湖拋不得。又攜琴劍上杭州。

顧文治字桐君邑之西塘人諸生曾寓東市

題郭松泉松風蘿月之廬圖

一幅襄陽潑墨圖。蒼蒼莽莽筆頭粗。青鞋萬里探奇徧。可有崑崙俠骨無。能書能畫復能吟。蘿月松風合鼓琴。賀爾主人非穎士。兩無孤負愛才心。

張聃齡字是龍號李仙吳江葫蘆兜人諸生曾寓北袁

題顧小洲繞屋梅花圖

披圖恍入孤山路。老屋當中面面樓。一種勝情傲君復。筆端還有冷香流。
冷雲晴雪壓檐端。沁得吟懷一味寒。却愧敝廬偏近市。好花不種一枝看。

題顧覺齋兼葭秋水圖

一白渺無際。蘆花瑟瑟秋。伊人厭塵市。身世託扁舟。我亦隱淪者。能無洄溯不斜風兼細雨。
此況最清幽。

客歲一爲別。相思長滿湖。芳音滯鴻雁。小隱雜鷗鳧。雲擁千山遠。風捎萬葉枯。詎輸白眉郭。
獨擅水村圖。

秦光第號次遊秀水人咸豐舉人曾寓圓覺寺

按次遊在禾中七子之列詩文著作甚多與圓覺寺僧露森善晚年養病寺中旋病歿詩稿散佚予少時曾見其重裝羅漢啓頗古潔現亦無從記憶矣

題藹亭梅林弄笛圖

花間橫笛譜新詞。疑是仙人宴雪時。自有月明想顏色。歲寒愁過李家祠。
梅里三李祠梅花極多

送薛時雨大令去任四首

能吏到處皆是誰令民氣回春我侯別無表見但能學道愛人
兵火相望不遠災荒更待扶持正是好官世界莫云生不逢時
境內方歌來暮驪駒忽繫門前陽城自署下考豈能多留數年
程門紛紛祖道投詩燦若卿雲別有鄉村父老歎息不能成文

水仙花

幾日晴光到畫屏。翠衣齊解玉璫玲。洛川更奏陳思賦。上界應逃女史星。微步何來塵漠漠。
橫琴相憶水冥冥。夜深燒燭重簾下。彷彿明璫見衆靈。
生小盈盈愛道粧。不堪洄溯斷人腸。低頭只共梅花笑。照影可憐春水長。初日鏡奩呼欲活。
早寒池閣夢俱香。坐愁天上東風緊。一夕凌波去渺茫。

孫爾榛字友山邑貢生曾寓朱家港

題計午莊蓬萊散仙耕種圖

曾讀幽風七月篇。農家風景總無偏。鳩飛濃柘尋春日。兕酌華堂樂有年。原草芟餘誰濟世。

野花簪去髻如仙。扶犁叱犢終吾分。冀缺於今有繼賢。

孫錢泰字蘭坡。邑附貢生。候選鹽大使。曾寓徐河浜。張氏菱蕩灣。袁氏有刳餘。

小草

辛酉寒夜客館偶懷

時館柳溪
袁又松家

蒿目江南北。咸銜瑣尾傷。人情同鬼蜮。世態感滄桑。酒力因寒薄。愁懷共夜長。何當烽火熄。日月復重光。

甲子春就館水村草堂贈居停張又村

地偏心遠隔羈塵。謝絕繁華守樸淳。把酒吟詩饒興味。栽花種竹寓經綸。兵戈不擾真安宅。雞犬相聞盡德鄰。村中未遇寇自是桃源風宛在。我來可是武陵人。

購得端硯一方。旋被竊去。又村兄轉售相贈。詩以謝之。

自遭離亂走倉皇。書卷長拋筆墨荒。身世蕭條歸夢幻。田廬寥落付滄桑。忽君相贈端溪石。令我重尋楮國香。從此當增長畫課。摹臨古帖兩三行。

寄贈張絨堂

百計籌防佐邑侯。往來日日駕扁舟。不因寒暑辭勞瘁。總爲紛榆解困憂。仁里本來稱樂國。大江今始慶安流。我身幸得枝棲所。求友嚶鳴不自由。

又村約同泛分湖旋至蘆墟卽景

曉色陰陰晝放晴。東風催客泛舟行。開窗煙水茫無際。惟聽漁歌欸乃聲。蘆荻抽芽綠滿汀。煙波上下望瓏玲。舟人遙指林深處。一抹浮青是洞庭。

癸亥六月初度臘月十八喜得一孫二首選一

遠紹清芬三百年。家聲不墜卽稱賢。清貧苦守無多望。祇望書香一派傳。

李斐然字簡齋邑之西塘人廩生曾寓湯家浜有樹萱室集

壬子正月讀書湯溪試筆呈漣浦崙園

明師兼益友。僥倖得追隨。束放不思酒課餘。閒詠詩。曠心遣世事。屈指憶前期。幾欲問花信。出門何所之。

崙園見和疊前韻答之

梯几晨昏共。眞教形影隨。學書從借帖。放膽快論詩。淳意可相印。良朋契所期。羨君風貌好。

瀟灑似宗之。

由平川至湯溪風便

放棹尋歸路。蒲帆張我軍。浪隨風帖岸。舟共鳥穿雲。孤樹鄰村認。橫橋別港分。紅霞滿天末。一綫閃斜曛。

嶺梅訪余於湯溪別後却寄

仁耕堂裏疏狂客。抱膝無言情脉脉。舉頭忽見故人來。歌呼互把吟肩拍。拂塵曳坐笑顏開。慰我連宵夢。幾回第一關心先。問訊可曾袖得好詩來。憐我新吟同布鼓。蒙君擊節相誇詡。但藉清才借齒牙。便教喜色生眉宇。劇談世事撫吳鉤。戎馬中原恨未休。且覓醇醪拚醉死。不須空作杞人憂。主人薄設陳家釀。手捧大杯神欲壯。肯令吾輩傳詩書。那識酒徒非將相。笑余量淺面先酡。玉山頽倒入南柯。一覺黃梁君已去。急鋪巨紙寫長歌。

題邵韻樓課餘吟草

騷人住近柳溪東。着意吟哦奪化工。滿目雲山詞絕妙。好將詩派繼宗風。三句係堯夫句

朝來小病倚匡牀。粥碗茶甌畫苦長。喜接故人詩一冊。幾回雜誦當良方。

寄邵韻樓

豆花褪紫菊花黃。一水迢迢別恨長。底事與君最相契。大家情性各疏狂。近來幽事報君知。晨起看花夜弄棋。靜裏別尋消遣法。芭蕉葉上寫新詩。

浦澹菊和詩至疊韻再答

藤鞋筇杖古須眉。促膝談深喜不支。笑我竟無三日醒。識君轉恨十年遲。論交許附忘年友。折簡新裁疊韻詩。遙想漁溪今夜月。弟兄同覆掌中卮。

題魏忠節遺囑後

勝國丁末造。大闢秉國鈞。乾兒滿朝右。狐媚同一羣。東林與之抗。正氣賴以伸。骨鯁遭璫忌。黑獄興同文。填尸牢戶中。千載猶酸辛。我鄉廓園公。抗論實斷斷。被逮赴詔獄。不畏獄吏尊。當其授命日。遺書告家人。讀書與安貧。助之辭諄諄。處分及死後。悲慘不忍聞。至今讀其書。筆墨含血痕。思陵既御宇。昭雪諸忠魂。崇封葬忠骨。崇祠懸溫綸。紛紛媚璫者。泯泯隨飛塵。此紙三百年。流傳落吳門。六幸翁得之。題詩壽貞珉。拜觀竊興起。如見公精神。

謝昌年字椿伯號壽田嘉興人光緒丙戌進士官金華府教授歸掌駕湖書院

曾寓金家灣齊河浜有匱園集

遊仙詞

蠟花璀璨爛銀缸。月映珠衣雪滿窗。一樣朝來晴日好。快騎白鹿渡螺江。
詆蕩門開岱嶽顛。白榆歷歷莢飛錢。碧霞塞斷朝天路。啼煞千山紅杜鵑。
瓊樓金闕絳雲封。洞口桃花鎖二龍。三十六爐金鑄錯。繁霜逼碎玉芙蓉。
寒山拾得本禪僧。佛祖傳來一鉢燈。怪煞香車雷樣厲。狂飈吹斷塔層層。
曾記瑤台聚八仙。大羅天上奏鈞天。玉皇香案餘煙散。碧染瀛洲草色鮮。
天街南畔遇雙成。手擊雲璈赴玉京。更約麻姑擘麟脯。紫薇花下共調笙。
銀漢橫斜耿碧空。鵲兒飛散月如弓。隔河賸有牛郎影。機杼聲沈織女宮。
淮南菽乳卽瓊漿。伴食天廚賽笋香。祇惜飛昇雜雞犬。丹爐藥轉斷人腸。
太液真人詠絮辭。丰神綽約憶芳姿。無端欲寫湘妃怨。羅襪淋漓月黑時。
杏花村裏見高壇。四顧河山綵霧漫。眼底不知何世界。復攜靈杖笑驂鸞。
虎嘯雲中識采鸞。腰橫秋水欲臨凡。鳳靴窄小尖尤銳。十里金湯倒踢翻。

藜杖青輝照百城。分光西射耀長庚。人間絕少文章伯。聒耳鶉音誤鶴鳴。
赤松邀作武夷遊。廣駕星軺道侶稠。金母木公齊拍手。褰裙來賞幔亭秋。
昨夜羅浮會百神。山頭依約見靈椿。要尋博望乘槎去。喜看東皇萬歲春。

黃鳥哀

有序

山城僻陋邸報鮮。通里巷傳言知徐尙書。

用儀

許侍郎

景澄

袁太常

昶

得旨復官

憤彼強敵念我故人。有子車氏之餘痛焉。泫然走筆。遂成長篇。名其辭曰黃鳥哀。

時光緒辛丑仲春也。

瓊林紅杏春景明。交交黃鳥枝頭鳴。出幽集苑侶丹鳳。來儀王國充嘉賓。讀史啓龍匱。遠遊
擁鳧旌。丰毛若比翼。嚶嚶求友生。胡圖止庭有大鳥。計殲突鶻策奇兵。展翅一扇蔽萬里。槍
榆啄粟非其倫。麒麟滅迹駿骨朽。鳩鷓粥誤鵬。沙螟賊蠢伺隙奇。鶻闇伏潛與羣。焚
惑晝見盜夜謀。開門長揖蛾撲燈。梟鸞溷雜鬼車軋。家雞野鷺玉石焚。鶻鷓畢竟備諸惡。錯
認鶻鷓發三軍。將戮爰居弋海燕。禁鎖支祁封海鯨。爽鳩失作司。扈走華堂鵲。徙文鴛。驚貌
是內諛。負外侮。蜃蛟跋浪翻滄溟。地維欲絕天柱折。破巢累卵口口傾。斯時黃鳥相對泣。暗

啞叱咤憤莫平引。嗥效臯鶴愁雲霧。糜障猩屏舉。翮退都鷁。轟雷藥彈環。蟻營尙書府。第緹
騎入短衣縛去。袵葛輕不就。廷尉鞠不覩。獄吏尊朦朧。受刃血汗污。南樓風月悲。劫塵三良
一弱。二難并。朝衫直曝並轡行。橫刀邏卒呼奉詔。奮拳遽碎中散琴。生同釋褐籌運幄。死同
勿頸冠結纓。北邙氣盡合全節。束市冤教益極刑。噫吁嘻。九頭祆肯兆。斷頭路旁伏尸多。公
卿翦尾可憐鴉。室毀裹革忍見鴟。夷盛翹翹羽。檄燕趙。晉倉皇雉竄忽。向秦秦隴鴻。嗟望
殭虎狼。逐隊日邊屯。我歌秦風氣。蕭索爭雄得。雌類刻鵠。鵠難株。連棘刺心。鵠址草薶。葵傷
足回首。長安舊雨稀。金星冷落尼山鐸。鸚之鵠之帝。奈何蓉麓啼。鵠淚珠落。悔過剛逢德。又
新魂招粉社。吞聲哭鷹窠。層接釣台高。橋李亭荒森。古木鼎峙。千秋吊夕陽。犀濤怒捲錢江
曲

寄懷陶莊諸友

芙蓉峯下老寒儒。楊柳溪邊舊釣徒。橋巷六朝悲盛謝。壘麓兩美憶髯蘇。臨深嘯山昆季擬開三徑
遲歸客。愁向雙溪作餓夫。待到秋風倍惆悵。願隨張翰味莼鱸。
蓮溪理學紹家傳。市隱村居各一廬。鳴山春君樂彼采芹思後進。遣誰種秫慰衰年。策鼇怒灌

扶桑足。驅馬稀從甫莠肩。參透紫陽真實際。

梅泉父子

桂香蟾窟會羣仙。

東來狐火膽猶寒。伏莽還探赤白丸。聞道師干資保障。

舍弟函來梟匪四處搶劫防營未撤

重教井里得平安。

梨花古里聯文酒。

梨里

蘆葉荒墟把釣竿。

蘆墟

寂寂山齋增悵望。武陵源裏足盤桓。

金沙浜西金家灣。

蓬來雲來昆李

金志公橋日往還。鴨綠半篙三泖水。螺青一綫五湖山。劇憐有客

依邱壠。

愚舍祖塋俱在陶莊

到處無家戀園闌。三十年來棲隱處。夜深飛夢落鄉關。

寄老友張又村

我愛張夫子。論交有古風。十年願兄事。千里報詩筒。祿薄官如寄。家貧仕亦窮。何如拚五斗。

長與耦耕終。

題何黎閣小影

水淨池潭浪拍堤。何山高與妙員齊。不須五柳門前種。家住汾南柳滿溪。

縷指交情廿六年。故園烽火憶從前。

予家自紅羊劫遷陶已二十六年矣

我今老作無家客。始信新知盡宿緣。

臣家近市本無求。博得頭銜麴麩侯。酒不醉人人自醉。醒觀獨坐酒壚頭。

六街簫鼓正嬉春。又促殘裝踏軟塵。輸與碧梧修竹裏。香爐茗碗寄閒身。

時將北上

謝昌言字鵠臣號毅人昌年弟嘉興歲貢生曾寓北要浜

題許介生獨立圖

光風霽月是前身。獨立翛然不染塵。跡寄一塵聊市隱。歡承四代慰慈親。持躬有道先崇儉。處世無他但率真。會看後昆爭雀起。優遊蔗境倍怡神。

贈沈鉅齋廣文

世澤齊梁舊詠樓。冷官居處劇清幽。多君腰腳藏青骨。負我田園剩白頭。萎野星霜嗟久闕。吳淞煙月憶同遊。回尋三十年陳迹。蓮社追隨更唱酬。

題胡學齋小照

小築名園曲曲通。芳菲春色滿亭紅。畫圖一幅留題處。花柳爭妍掩映中。蕩漾春風泛小池。兒童垂釣一竿絲。委懷別有天機在。偷得閒身且誦詩。一曲霓裳宛轉歌。管絃聲裏落花多。幾時修到清閒地。無限深情寄綠波。絕妙丹青寫入神。知君瀟灑出風塵。莘川門第由來舊。何用移居結比鄰。

謝咸慶字錫章吳江盛澤人歲貢生曾寓北要

次黃丹秋盤字韻時寓江城

歲歲舟經釣雪灘。垂虹亭接杏花壇。鄉離笠澤思還切。身上蘇台界亦寬。旅夢孰憐孤館集。佳章好向夜燈看。愧予名幸成均附。有願猶虛首藉盤。

柳溪寓次遣懷疊前韻似臨深

小市臨溪水半灘。相從結伴盡吟壇。盟心應鑿池先淨。託足何嫌地未寬。旅寓暫當繁澗隱。鄉居還作輞川看。詩成幾翦西窗燭。旋覺銀河轉玉盤。

陸擁書字西巖號鷗安吳江蘆墟人歲貢生有引玉集

按鷗安題予柳溪竹枝詞醉花陰一闕自註云余弱冠時從魏塘孫先生友山館朱家港姚宅故月必到柳溪一二次云云則先生亦柳溪寓公也

六十述懷

花甲而今愧已周。不堪往事溯從頭。境多拂逆常甘受。質本庸愚敢妄求。毀譽全憑人月旦。迂拘深鑿世風流。明知過眼浮雲幻。荆棘叢中萬慮休。

容易光陰閃電馳。無端鬢髻已成絲。貧而非病言深佩。壯不如人老可知。失足慎貽先德辱。檢身遑恤俗情嗤。才疏自分應終棄。冊載窮居忝作師。予訓蒙已及卅年矣

我是人間孽重人。生孩七月失慈親。

書於元旦生至七月廿一日慈親即見背

重幃未報劬勞德。承祀空存屬望

身。頭白依然肩息愧。眼青深負契交真。齊眉幸有同心侶。荼苦薺甘共樂貧。

負負頻呼亦自憐。不揣蟻力漫仔肩。修祠助幸資將伯。結社班聯敢學仙。易示養蒙期有濟。書詳保赤計難全。窮民無告誰援手。力薄常存志願堅。

花樣翻新共好奇。自知作事異時宜。填胸孤憤鳴雙劍。入世良圖讓一棋。鬼怪紛爭徒感歎。腥羶徧染孰維持。幾回蒿目傷時變。愧我無才合醉癡。

爆竹聲喧雜市囂。耽閒差喜借禪逃。清香爐內頻虔燕。白髮風前屢自搔。祇爲無能常守拙。敢言有志永堅操。興狂漫詠髯蘇句。不是詩仙卽酒豪。

陳 楸字小江吳江蘆墟人曾寓柳溪

秋日感懷

秋日淒淒雨又風。淨池忽地到烏篷。故人一別經三月。應有新詩寄遠鴻。有耕有讀有樵漁。恨我生平各不如。借得一枝聊自慰。不堪生意漸蕭疏。

董書紳字乾生吳江蘆墟人諸生曾寓中市

柳溪旅舍偶成

功名無我分，便取藥囊挑。喬木遷從谷，荒莊姓問陶。寓居鹽店街，門對油車橋。日算懸壺久，人無折簡邀。晝長神欲倦，居索歎無聊。幸遇周張至，芷畦仲愷還聯袁沈交。三省錫侯苔岑逢異地，甘

苦話連朝時。局行將變，山林隱共招。盪胸塊壘積，信口酒盃澆。醒後楹書讀，追蹤薛一瓢。

夜坐口占

喚妻早起煮晨餐，惘惘出門露未乾。秋水綠波舟羨穩，誰憐路上步艱難。行來六里到陶莊，賣藥遲歸帶夕陽。夢裏猶驚人疾亟，檢書燒燭覓奇方。

計寶璜字頌君號鈞人秀水諸生候選訓導曾寓南勝沈氏

讀青箱館詩集偶成

文采風流迴不羣，清才當代沈休文。四聲譜就諧如許，髣髴鈞天樂可聞。俊逸清新庾鮑兼，醴醴書味足涵淹。推敲想見當時樂，妙諦多由信手拈。

縹緗無恙滿書齋，當日詩翁寫逸懷。指顧文孫能繼起，青箱世業早安排。時予館南勝課其後人一隅無復草堂存，蝸寄年來就近村。一隅草堂集先會祖壽喬公著讀罷鴻篇一惆悵，南窗攔筆喚吟魂。

王文溶字蘭坪邑之西塘人光緒甲午舉人龍泉教諭曾寓金家灣有蘭坪吟稿

汾南看水嬉

旗傘縱橫夕照中。沿堤柳綠間桃紅。行來一路船多少。都泊汾南小廟東。

夜歸柳溪

已過村北向橋西。樹影參差映柳溪。斷續鐘聲來古寺。模糊人語隔長堤。渡頭露重泥防滑。水面風微浪湧低。明月爲儂偏早上。歸途曲曲指津迷。

晚泊楊溪

薄暮行舫路不迷。收篷投宿綠楊溪。烟籠漁艇燈光淡。月照江村樹影低。幾處聽殘鄉野曲。客舟繫遍短長堤。明朝願望東風起。直抵南金卽南金邨小港西。

留別長康棣

栖遲喜得一枝安。周府供給周到絕勝當年作冷官。至竟青氈吾故物。素餐却笑飯加餐。從古師交自有真。不愁形迹不相親。明朝兩地融心鏡。始信天涯若比鄰。

徐瑞驥字少雲邑人光緒甲午舉人曾寓菱蕩灣

題芷畦浮漚集

一別音塵二十年。鱗鴻迢遞隔雲天。而今浣誦浮漚集。益信先生本愛蓮。

原书空白页

柳溪詩徵卷六 閨秀 方外

嘉善周 斌志頤輯

葉純紈字昭齊吳江葉家埭人紹袁長女趙田袁祚鼎室有芳雪軒集

按祚鼎儼子昭齊詩入柳溪從夫之義也

春日看花有感

春去幾人愁。春來共娛悅。來去總無關。予懷空鬱結。愁心難問花。階前自悽咽。爛縵任東君。東君情太熱。獨有看花人。冷念共冰雪。

冬夜有感

疏雨滴寒庭。幽風弄簷鐵。獨坐何寥寥。寒燈靜翻閱。浩然起感歎。慷慨向誰說。

題瓊章妹疏香閣

朝霞動簾影。紗窗曙色長。起來初捲幔。花氣入衣香。中有傾城姿。春風共迴翔。玉質倚屏暖。瑤華映貌芳。佳人真絕代。遲日照新妝。還疑瓊姓許。獨坐學吹簧。

病中

西風滿庭樹。黃葉亂雕楹。草謝傷心色。雲飛故國情。病中消短夢。愁裏過浮生。搔首獨長歎。寒花落晚英。

梨花

有序

家有舊室。敝甚。余稍修葺之。求一齋名於老父。父曰：汝庭外梨花數樹。今如此老。幹蒼枝皆汝太翁手植也。我昔與汝翁嚼花醉月。其下今杳不可得矣。王融梨花詩有芳香照流雪之句。可名芳雪軒。余因漫作二首呈父。

亞粉蒙茸透箔融。盈盈流雪綴芳叢。窗前長鎖三春月。林下相尋一徑風。夢對池塘春草碧。香飄庭樹暮煙空。新來幾陣黃昏雨。門掩愁消玉鏡中。

燕語鶯啼寒食天。紅妝不學露桃鮮。清含瑤蕊飄香雨。淺放瓊絲拂素煙。曉月歲隳侵冷豔。夕陽縹緲弄輕妍。芳魂若應能憐我。寂對西風共愴然。

初秋感懷

忽忽悠悠日倚樓。不堪蕭索又逢秋。流年冉冉侵雙鬢。長夜漫漫起四愁。舊事經心空染淚。

壯懷灰去漫凝眸。唾壺擊碎還搔首。泣向西風恨幾休。

閒居卽事

雨後碧苔長。春歸綠蔭濃。楞嚴閒讀罷。殘日下簾櫳。

悲秋

井桐黃葉墜。秋思入重樓。無限樓中意。悲秋不爲愁。

暮春赴嶺西途中作

煙樹重重迷故鄉。雲山疊疊恨偏長。不知何日是歸日。杜宇聲聲最斷腸。故園別後正春殘。陌上鶯花帶淚看。何處鄉情最悽切。孤舟日暮泊嚴灘。

秋日偶題

一番搖落一番嗟。咫尺天涯夢裏家。莫道秋來不憔悴。滿庭都是斷腸花。

哭亡妹瓊章

十首選二

別酒同傾九日前。誰知此別卽千年。疏香閣外黃昏雨。點點苔痕盡黯然。月落青軒徹夜光。寒桐冰井對銀床。遼陽化鶴何時返。仙路無憑總渺茫。

吳黃字文裳。邑人。駕部志遠。女孝廉。錢拭室。塞庵相國之子。婦也有荻雪集。

按文裳詩見吳江沈剛中分湖志稿本。尚有分湖賦與釣鼈生並傳。蓋亦一代大手筆也。賦長不備錄。錄其序云。分湖者在西浙南直交具區之衍波也。以其半爲松陵。其半爲武水。故名分湖。地多亭臺池館。見於鐵崖詩老之記。蓋一方之勝矣。自鐵崖以擊伎文酒跌宕其間。又泐石爲記。而地並勝。後吳江教訓釣鼈陶先生又賦之余。慕焉。因遊水村一再過之。訪當年亭館已不可得。獨賦與記尙傳。歐陽子所云託於文字者。可以無窮。不余欺也。遂爲之賦。

過分湖兼懷鐵崖先生次外君韻

一水界南北。平分見越吳。濤迴笠澤。波瀉秀州。孤經野。疑天塹。分藩壯帝都。扁舟閒宿處。弔古獨躊躇。

詩老昔流寓。高踪今未磨。風塵辭鳳闕。烟月伴漁叢。舞動翻紅袖。詩成醉綠莎。可知餘韻在。倚棹聽菱調。

水村卽事

柴門落日晚波明。閒立沙頭杖履輕。鷗鳥有情如索句。又成蘆荻送秋聲。寒波南去接分流。詞客精靈此尙留。料得月明三五夜。玉龍吟送水西頭。陸觀蓮字少君別號兩鬢道人。邑人。丹生室。有蔣湖寓園草。

蕪湖寓園對月 有序

夫觀於劍者能劍觀於賦者能賦服習衆人豈不然哉余少依姆師僅通章句長隨夫子遂曉詩篇柳下棲遲未見薦禽之客隆中高臥誰爲友葛之人以是同梁生之出關深慙德曜異少伯之辭越不羨夷光長與蠹簡爲親蕭條三徑獨向芸編爲伴離別經年兒既能文女亦識字歷冬夏以靡輟慣飢寒而不啼旣而遊子來歸不殊師友之對時有高人造訪實多贈答之詞稍知工拙之分略窺正變之則荏苒數載常如不繫之舟留滯他鄉盡是若浮之梗昨因避水來止斯園門掩深村對琅玕之個個人歸遠浦汎雨雪之紛紛盼望故廬不逾衣帶言旋舊里終隔山河落花與芳草相依明月共清風自舉顧此幼女夙慕古人如左氏之有芬才華挺茂在荀家則爲灌志略英蕤朱粉不施自是蓬門之質丹鉛能好居然林下之風以此消愁愁可知矣嗟夫篇章孰誦詎爲失意之悲兒女關情不作無家之別況聞郗公築室植松桂以相招陶令卜鄰樂晨夕而不返輿言在邇益復牽懷簡棄舊懷獨存新什豈徒誇謝庭詠絮蔡閣焚琴而已哉

青天掛明鏡。輝光照我床。展轉不能寐。起坐空徬徨。徬徨亦何爲。日思我故鄉。瓶齋舊隱處。乃在茜水陽。廿年幾播遷。渺渺天一方。回思手栽樹。橘柚徒含芳。安得生羽翼。摩天一翱翔。

念沈氏老姊

昔聞恆山鳥。四海各分飛。念我同生子。四女相因依。辛苦效反哺。力盡心亦微。仲姊久長逝。淚落不可揮。所遺我三人。戀母願空違。伯也失所天。忍死鞠孤兒。兒年近四十。與婦同分離。滄滄一孫女。遣嫁時來歸。上堂問祖母。終朝無苦飢。嗟予季與叔。相見時迹稀。撫琴彈此曲。此曲聲殊悲。

寶劍篇贈外

吁嗟哉。荆卿劍術既不成。雖有寶劍徒空名。千年黯黯閉秋水。雙匣眇眇埋龍精。狐狸夜號風雨惡。蛟螭晝舞波濤驚。我持此劍若明月。衆星朗朗隨其行。又持此劍若白日。羣妖退走機槍平。機槍平衆星沒。送君贈君君莫惑。古來遇合自有時。神物出處當知之。

寄兒

十年流寓憶西村。朝暮隣兒日倚門。一自移家居鶴市。又因避水過桃源。梁間乳燕穿簾戲。

竹裏雞鳩喚雨喧。對此不禁傷往事。來歸應拭淚珠痕。

將移家人九峯題西園一粟軒

懶向桃源再問津。西園擬欲結芳鄰。風花雪月無多景。南北東西只此身。九點煙巒長在望。三年燈火自相親。茫茫漫說劉安事。雞犬雲中恐未真。

焚香讀道書口占

紅窗花影自紛紛。一卷常持冰雪文。却憶夜深禮斗罷。彩雲遙送小茅君。

父 默字季齋小字墨估丹生女

和母寶劍篇贈兄

牀頭夜半雙龍吼。光攝羣妖暗星斗。風雨霹靂一瞬間。木拔沙飛石亂走。古來神物本平常。遭時遇主生晶光。拂拭霜花將解贈。時無烈士空旁皇。皇莫歎息木蘭啣啣當戶織。阿兄少年射白額。歸來摩挲看太白。

憶震澤西村

忽忽難忘處。西村明月中。荷花低拂露。菱葉靜含風。煙火經旬斷。音書隔歲通。茅堂知在否。

應有白雲封。

和母寄兄

離羣鳴雁隔芳洲。東望仙山春水流。爾侍嚴親長作客。我隨慈母獨登樓。不思故國新移住。轉向他鄉又久留。遙憶煙巒九點外。音書早晚莫教愁。

臨曹娥碑

花骨離披愁帶軟。銀鈎歷歷未能工。多慚阿母頻頻屬。不比尋常學戲鴻。

辰山步虛詞

闔闔初開黃道邊。鳴鐘伐鼓會羣仙。多緣誤折瓊枝樹。滴下瑤台十五年。

魏于雲邑人趙田袁華聘室有焚餘稿

按于雲吾邑人與趙田袁華爲中表有婚約會事中阻自縊死袁氏族譜載爲華聘室從其志也援葉昭齊例錄之

送遠曲

我本西山來。送君南浦去。離歌一曲月落時。夢魂半入雲飛處。渺渺行踪數客程。布帆風送隔谿行。含愁更作相思調。抱得瑤琴不忍鳴。

子夜春歌

郎意甚殷勤。妾心殊繾綣。繾綣與殷勤。終恐有時變。

擬古四章

自君之出矣。輕暖見花新。羅綺親裁就。春衫可稱身。
自君之出矣。酷暑晚涼侵。端養由來久。炎涼莫繫心。
自君之出矣。白露滿亭台。萬寶皆成日。時乎不再來。
自君之出矣。雨雪又霏霏。富貴非吾願。長歌將毋歸。

懷人

西風憔悴傍迴闌。孤雁悲鳴倦羽翰。漫道故人顏色遠。空梁落月夜中看。

婕妤怨

颯颯寒飈撲翠樓。空將紈扇獨悲秋。六宮何處新承寵。一片歌聲出御溝。

過書齋有感

書齋風景澹。取次采幽踪。小逕深圍竹。空亭低護松。開軒青靄繞。入座紫煙封。坐久臨階去。

誰攜話碧叢

沈氏北黨人秀水楊堂聘室

楊象濟曰沈氏嘉善之北黨人許字我族叔祖堂未婚歿氏守志於家閱八年父母欲嫁之氏遂絕粒以死年二十九時道光六年正月也閱二十餘年象濟輯家譜因請於沈氏迎其柩與堂合附云云見揚氏族譜

述志

薄命自兒身天何不諒人柏舟能矢志吾亦抱吾真

汪婉玉如藩妹適袁住東袁墟

送弟遊中州

片帆斜掛向中州芳草青青正麥秋柳暗河堤遮客路花明山驛送行舟
豫中陳迹憑誰吊
洛下名賢取次求故國鱗鴻如有便莫辭頻寄慰離愁

二兄閩中寄鮮荔支歸賦此

三山五月荔支香滿載筠籠寄魏塘重謝伯兄能愛我故教遠惠得分嘗
白膚堆處沉沉玉
紅袖遮來各各房
道暑肯教煩惱屏
甘鮮沁齒易生涼

見新月有懷

一縷清光入畫樓。閨人底事怕抬頭。舊愁自與新愁接。鉤起何須月似鉤。
生來鎮日慣縈愁。新舊連綿不自由。若使心緣鉤月釣。也堪洒掃掃眉頭。
浦潔芳邑之西塘。人民則女。袁雲楣聘室。

曉坐

浙瀝枕函夜雨。熹微簾額朝晴。且復梳頭小坐下。階恐蹴殘英。

奕棋

勝負總成坐穩。攻圍惟仗心兵。半晌綠窗人靜。微聞落子丁丁。
孫清瑜字佩瑛。曹駿良室。有茗餘小草。

春陰

郊外草初肥。春從陌上歸。一雙新蛺蝶。輕逐落花飛。

秋晴

江澗攜桂楫。邨舍傍溪斜。爽籟起秋荻。夕陽明野花。

接山左馴夫致書并詩兩絕依韻寄答時光緒六年七月十六日也

當樓涼月十分寒。遠笛悠揚却憶桓。迢遞雲天飛一雁。開絨不厭百回看。
此去齊州作麼生。未詢何日理歸程。秋來寒煖須珍攝。莫忘臨行囑付情。

簾燕

社雨聲初歇。花風信緩吹。蝦鬚時蕩漾。蝶夢正迷離。補壘頻黏絮。尋檐尙繫絲。玉樓人喚醒。
春日故遲遲。

寂 勗圓明庵僧

四時擊竹歌

湖波灩灩煙融融。十里五里皆春風。烏鸕羣臥芳草綠。黃鸝細囀野花紅。一歌兮湖之東。吾
擊竹兮將三終。祥雲繚繞法王宮。

其二

炎陽烈烈熏湖潭。槐陰日午蟬吟酣。蒲團欲灸誰趺坐。玉塵生煙誰清談。二歌兮湖之南。吾
擊竹兮聲聲諧。涼風習習來茅龕。

其三

秋林慘澹秋煙迷。嚴霜徹夜驚烏啼。策杖遙看黃葉下。芒鞋響踏荒草蹊。三歌兮湖之西。吾擊竹兮聲清淒。征人魂夢斷鼓聲。

其四

朔風凜冽雪花落。滿湖一白渾如玉。南陽諸葛臥有餘。東山謝傅吟不足。四歌兮湖之北。吾擊竹兮聲應谷。梅香浮動春漠漠。

靈 具字可生祖家浜人圓通庵僧

湖上春遊

掛錫出門去。東風滿路歧。野花含雨笑。芳樹覺春遲。吾道從茲悟。幽人不可期。胡頭孑煙景。負手立移時。

實 定字竟安江都人崇福庵僧

按汾澤廟一名崇福庵
見許王猷崇福庵記

分湖雜詠 選一

水色天光上下空。澹雲疏樹晚濛濛。一聲欸乃衝煙去。彷彿鷗波畫本中。

天 寥俗姓吳名鵬號獨遊後爲西塘雁塔寺僧有天寥集

按吳廷璜寄北萊上人箋有族弟獨遊將拜上人爲師云云又予幼時聞潘硯耘丈云獨遊披剃雁塔時大船由絳田至西塘蓋不忘初地也據此則天寥爲絳田人矣

過蘆墟見郭氏舊宅有感寄丹叔

隨意微行欲自娛。無端步履到分湖。故人老屋前頭是。舊巷重過失口呼。臨水垂楊易憔悴。繞門花木盡荒蕪。此游轉覺無聊甚。應被閒鷗笑我孤。

端午日分題靈芬館中是日所懸畫幅得鍾馗賣劍圖

我來魏塘纔浹旬。瞥見安榴幾花吐。故人情深不放歸。留我齋頭作重午。家貧好事絕可憐。只有圖書尙撐拄。壁間橫幅聊應時。幅幅新裁不師古。終南山人老佷伉。鬼伯鬼雄視如鼠。爾侯一劍雖缺鑿。聊怖羣魘我甚武。如何一旦輕脫腰。萬鬼挪揄掌爲撫。人生利器那可假。恐一失之爭笑侮。方今聖治如天中。盡掃妖魔膏質斧。廟廊文物日雍容。吏治循良皆卓魯。高冠櫛具定何爲。說劍談兵了無取。九幽倘有田可耕。急買烏犍及新雨。

馴鹿莊探梅

步屨尋詩繞曲廊。詩成要素酒開缸。阿誰檻外移燈過。梅影枝枝橫上窗。

重陽寄頻伽

試登高望路漫漫。黃菊離披不共看。西風又作重陽信。江北江南一樣寒。

答丹叔寄懷

音書頻寄煩君念。淪落難歸愧我生。四壁蕭蕭誰共語。一年草草若爲情。酒思舊雨循環飲。詩候新涼取次成。客裏又經時序換。小樓昨夜有商聲。

郊行

半是嬉春半送春。陌頭風軟落花輕。護鶯邨巷柴荆靜。積水溝塍科斗生。佳景却從郊外得。新詩每在淡中成。不妨泥飲逢田父。野店青帘照眼明。

苕溪道中忽遇順風次頻伽韻

風帆去似鳥飛輕。百里苕溪計水程。山肯論交林外見。詩聊記事醉中成。臨湖柳似分曹立。連榜船如並馬行。試看長年添喜色。一杯賀爾酒同傾。

絕句

雨過花前立一回。見花零落亦徘徊。徘徊且自掃花去。花掃不完雨又來。

丁卯新正三日靈芬館作

有約無辭便過從。行藏肯與俗人同。齊年我覺先驚老。好客君猶未悔窮。但得清閒原是福。只愁漂泊易成翁。新年此事差強意。酒殘詩筒日不空。

歲朝

歲朝睡起無餘事。斗大茆齋位置些。烏几拂塵安筆硯。胆瓶注水養梅花。晴窗學寫宜春帖。活火親烹穀雨茶。家廟焚香門不出。靜聽老母誦蓮華。

雪 舫字覺堂一號水晶庵主杭州僧曾寓清凝道院

題蘭竹小幀爲琴舫居士作

修竹幽蘭別有春。托根山谷絕紅塵。高人棲跡仙人佩。二美原當作比鄰。

志 南字明淵寶筏庵僧

墨菊贈湘泉居士

重陽一事無風雨。正懷友。醉灑墨三升。聊當白衣酒。

不用調朱粉。東籬點綴鮮。由來高隱者。色相本天然。

題許竹溪水邨圖

禪關晝掩午炊遲。一櫂分湖正及時。鈴語磬聲雲樹外。阿誰來唱畫中詩。

原书空白页

跋

芷畦先生博學敏於才，負詩名垂四十年。今歲中秋，忽捐館舍，知者痛之。平生富著述，其中柳溪詩徵六卷，更其一生心血之所在。自宋迄今，一鄉先賢之遺詩，具萃於是，是可傳已。念余與芷畦交逾十稔，風雨過從，每及鄉邦文獻事，蓋余時亦有平川詩存之輯，嘗謂余曰：維桑與梓，必恭敬止。吾輩在鄉，則言鄉耳。若欲推而及於一邑一郡，恐非一二人所能勝者。余每歎爲知言。乃者介弟志成星使返，自東瀛將以斯稿付梨木，謀於袁弘深先生、袁先生，以余與芷畦有雅故，屬爲參校。余不才，安敢辱芷畦於身後哉？因憶庚申冬，柳君亞子效鐵厓故事，招集吟侶，泛舟游分湖，時亞子以分湖文獻失墜，爲念倡輯分湖詩徵，其區域則合柳溪、鶴溪、蘆漪、莘溪、禊湖、斜塘、金溪、東江八區，緣延百數十里，纂輯之事，議各隸籍者任之。庶衷合附庸，彙爲大國，顧十餘年來，世變叢生，人事多故，竟無所成，可慨焉。芷畦當時雖不與斯遊，而獨能本其在鄉言鄉之義，蔚爲絕業，實先獲亞子之心者也。使亞子見之，或得奮發畢其所願，寧非快事乎？然則斯編也，其分湖詩徵之嚆矢也。歟？參校既竟，遂僭書之，聊以答袁周兩先生之意，亦以見芷畦之所成者，不僅有功於柳溪一鄉而已。癸酉冬，斜塘蔡文鏞

謹跋

柳溪詩集